

興城縣志

王恩士
題



興城縣志卷之八

交通

鐵路

郵務

附圖

電報

電話

馬路

道路

橋梁

海口

興城縣志卷之八

交通

郵傳迅速利達全球王路蕩平賓接亞歐縮地航空載重致遠門
戶洞開地失要險商賈庸集懋遷有無昔日荒涼今爲衝衢何海
之瀕文明導線交換智識利器稱贊述交通

蓋聞國民知識之開通與否必視其國中海岸線之有無鐵道之多寡
以爲比例差是鐵道之有益於國不獨可以利運輸備緩急而且爲全
國中交換智識之利器至於航路四達帆檣如林鴻儒碩士托足所在
實具溝通文化之大力歷觀古代帝王都會莫不以河海爲發生文明
之導線故交通者無形之競爭而國力消長之樞鑰也惜本邑商務弗

盛名勝勢少其乘舟車而饒者半係商販淺夫有水陸輻輳之名無灌
輸學識之實良可浩歎然遠方遷貨既便居奇輪舶暢行便利商戰靈
通消息宏啓周行或亦談貿易者所樂聞乎

鐵路

京奉路興城縣車站 在縣城外西北一里許清光緒十九年山海關

外鐵路興工先築土基二十年冬因中日戰事停工二十四年繼續

修築二十五年開車設興城車站於今處二十六年八月爲俄軍占

據二十八年冬始交還我國繼續修築鐵路西達北京東接瀋陽總

名爲京奉鐵路由交通部直轄管理局設於天津各站悉歸管理興

城車站爲第十段設段長一員站長一員客票司事一人驗票員二

人電報處領班一人電報生二人鐵路警察設巡官二員巡長一名

警兵二十五名全縣車站五西來下行車由六股河沿姚家灣地方


入境至東辛莊車站計華里十六里由東辛莊車站東行三十里至

沙後所車站又十五里至白廟子車站又十五里至興城縣車站又十八里至韓家溝車站又東行七里至老和尚台又東行八里至分界牌則出縣境矣縣境鐵路橋工共五處而以興城縣西河橋工爲最鉅烟台河橋工次之

郵務

興城縣二等郵局 設立縣城內東街路南清光緒二十五年三月初設爲郵寄代辦所舊設於縣城北關車站附近嗣於宣統元年七月一日改爲二等郵局始遷今址設局長一員襄辦一員信差五名郵差一名爲保險及代收物價包裹局爲甲類匯兌局爲汜機通運局

爲聯郵包裹收寄局爲電報所通之處民國五年八月設郵寄代辦所四處其地點一在縣城西南二十里白廟子一在縣城西北三十里五里紅崖子一在縣城北四十五里舊門一在縣城西六十五里下城廠信櫃二處一在縣城西北六十五里松樹卯一在縣城西北二十里興水縣民國十年六月復設村鎮投遞收攬處八十四處派信差二名每四日輪送一周其四鄉郵路全圖列後



電報

興城縣電報局 在城內西街南胡同民國十四年一月十三日創立
歸奉天省垣奉吉黑電政管理局直轄以興城局列爲三等乙級純
係商電性質西達綏中東達錦縣所管路線修工事宜東至韓家溝
西至沙後所以兩處車站爲分界處電費以官報爲鉅宗商報次之
常年收欸因設立未及一年度無從核計局長一兼領班電生一局
役二工人三

電話

興城縣電話局 在城內南街路東民國十三年九月十日奉文創設
(規模職員俱詳本志職官)以靈通消息輔助營業爲宗旨除政治

各機關暨警察各區所並准商民租用全境已設有六十餘處又於沙後所設立分機官商共設話機十四具每具話機費奉小洋十二元每月租費七元二角附加賑費六角共七元八角常年進款約七千餘元支出經費洋四千七百餘元約餘奉小洋二千二百餘元

馬路

附郭馬路 城外西北赴火車站路於民國八年經縣知事劉士元派本邑教育所長韓國卿等監修長約半里許橋二爲由城赴車站之

坦途

道路

縣道

由縣城正東達錦西縣道 出城東門東行五里至茶棚菴又三里至

東八里舖又二里至金家嶺又一里至韓家溝又二里至乾柴嶺又

三里至小南莊又二里至雙樹堡又二里至老和尚台又三里至交

界牌入錦西縣界共計境內縣道二十三里

由縣城東北達錦西縣道 出城北門東北行二里至花園又六里至

北八里舖又二里至吳家屯又五里至藥王廟又五里至陳家嶺又

五里至白家甸子又四里至燕家屯又六里至安山口入錦西縣界

共計境內縣道三十五里

由縣城正北達錦西縣道 出城北門正北行六里至姜女河又四里

至梁家窪子又二里至上元台子又三里至聶家嶺又三里至下砬

山又四里至上砬山又五里至三官廟又二里至孫家溝又七里至水口子入西錦縣界共計境內縣道三十六里

由縣城西北達朝陽縣道 出城西門西北行二里至火石嶺又二里

至栢家墳又三里至蘇家屯又三里至老邊又三里至廣糧堆又三

里至興水縣又六里至張工夫嶺又十里至頭道河子又八里至金

雞嶺又八里至常屯又二里至半道子又三里至舊門又三里至劉

屠戶屯又十里至松樹卯又五里至白廟子又五里至下鴨路溝又

二里至雞皮嶺又三里至新台門入朝陽縣界共計境內縣道八十

一里

由縣城正西達凌源縣道 出城西門正西行二里渡河又一里至披

甲屯又五里至沈家窩舖又二里至芹菜溝又七里至大嶺又三里至榆樹林又二里至二道邊又二里至三道邊又三里至梁家屯又三里至紅崖子又六里至蔣家屯又三里至大山台又三里至小山台又六里至楊樹溝又四里至楊家溝又四里至下城廠又五里至上城廠又六里至摸戶山又八里至石梯嶺又八里至二道溝又六里至白土嶺子又六里至梨樹勾門又五里至白石嘴門入凌源縣界共計境內縣道一百里

由縣城西南達綏中縣道 出城西門西南行二里渡河又四里至頭台子又六里至曹莊又六里至七里坡又四里至王家窪子又二里至東嶺上又六里至沙河所又三里至永安橋又五里至烟台河又

四里至望海甸又三里至曲尺河堡又九里至三里橋又六里至東關站又八里至二台子又八里至報官嶺又四里至六股河沿入綏中縣界共計境內縣道八十里

由縣城正南行十里至海

由縣城東南行十二里至海

以上縣道六共計三百五十五里

區道

由縣城至第一區七里坡區公所區道十八里

由縣城至第二區紅崖子區公所區道二十里

由七里坡至第三區望海甸區公所區道二十五里

由望海甸至第四區郭家屯區公所區道二十五里

由紅崖子至第五區梨樹溝門區公所區道六十里

由紅崖子至第六區新台門區公所區道五十里

由縣城至第七區新莊子區公所區道八里

由縣城至第八區藥王廟區公所區道十五里

以上區道八統計二百三十一里前經董委員暘按鄉道規定里數多不適用茲照區另定

里道 從略

全境里道統計一千六百九十四里

橋梁

附郭木橋

城西關外通火車站

萬寶屯草橋

城西南八十里

披甲屯草橋

城西五里

老邊屯草橋

城北十五里

青水縣西草橋

城西二十里

花園西草橋

城北五里

烟台河草橋

城西三十八里

龍泉寺草橋

城西南二里

以上各草橋均建於春秋二李能通車馬

朗月溝板橋

城西北十五里

柳河溝板橋

城西十五里

黃土坎板橋 城西十八里

狼洞子板橋 城西十八里

前劉台子石橋 城西六十里

餘見本志古蹟慈善

海口

釣魚台海口 城東南十二里昔爲商船往來之要港帆檣林立並設

有常關稅局分卡出口以紅糧小米大豆爲大宗入口以麪粉線布

及外洋物品爲大宗往來之船概屬天津烟台大連營口等處清初

稱極盛至光緒末年京奉鐵路暢行後各口帆船頓形減少惟有少

數爲節省運費者尙胥由此已有今昔之殊矣至常山寺娘娘頂二

海口雖在本邑界內然以距城較遠出入口貨向爲綏中所利賴亦

地勢使然也

興城縣志卷之九

人物上

名宦

鄉賢

孝義

文學

隱逸

耆舊

仙釋

興城縣志卷之九

人物

無文猶興與凡庸異惟大英雄能造時勢亦有忠烈扶翼綱常乾
坤正氣潛德韜光天生淑貞松筠冰雪彤管不輝真賞殆絕百世

興起頑廉薄敦行高澤遠是謂聖人述人物

縣境帶海屏山風淳土厚磅礴鬱積閒氣鍾靈嶽降甫申風希夷惠孝
稱人瑞忠爲國楨至巾幗之賢或居窮課子荼蘼同欽或之死靡他冰
霜比潔他如龔黃政績元白才華惇史昭垂遺編尙在旣歌功而頌德
亦摘豔而薰香因思代間熙攘只爭位高多金而不朽之圖轉在於富
厚功名之外鄒東郭有言問邑之貴則數高位者以對問邑之富則數

積財者以對問邑之人物則數修德勵行濟世範俗者以對而富與貴
不齒焉然則士生今日欲求有所表見不至隨庸衆芸芸以生泯泯以
死宜何道之從焉

名宦

後漢

趙苞字威豪甘陵東武城人舉孝廉爲遼西太守抗厲威嚴名振邊俗遣使迎母及妻子道經柳城值鮮卑入塞劫其母以擊郡苞督兵禦之賊出母示苞苞號謂母曰爲子無狀本欲以微祿養不圖爲母作禍今不得顧私恩毀忠節母遙謂曰人各有命何得相顧以虧忠義卽進戰賊悉摧破母妻皆爲所害事平封苞爲郇侯苞歸葬訖謂鄉人曰食祿而避難非忠也殺母以全義非孝也如是何面目立於天下遂歐血而死

按伊川程氏謂苞以君城降賊而求生其母固不可矣然亦當求所

以生母之方奈何不顧而遽戰乎必不得已身往降之可也徐庶於此蓋得之矣（綱鑑易知錄）然則苞之歐血而死其情固可矜其忠固可嘉倘能權衡之於義理則更善矣

三國魏

牽招字子經安平觀津人曹操將擊袁譚而柳城烏桓欲出騎助譚操以招嘗領烏桓遣詣柳城說令罷兵後從討烏桓至柳城拜護烏桓校尉文帝立拜招使持節護鮮卑校尉廣布恩信招懷降附至十餘萬落

隋

李景字道興天水休官人大業七年從征高麗爲將攻武厲城破之九年復出遼東師旋追兵大至景擊走之進爵滑國公十二年煬帝令景

營遼東戰具于北平粟帛山積景無所私江都之變盜賊蜂起遼西太
守鄧暉救景遂歸柳城將還幽州遇賊見害契丹韃韃素感其恩聞之
莫不流涕

度地稽粟末人本白山渠帥煬帝時窘于高麗因率所部降拜右光祿
大夫居之柳城及遼東之役從戰有功十三年從幸江都尋放還柳城
爲李密所邀前後十餘戰僅得免（謹按度地稽唐書作突地稽）

唐

全客努懷州武涉人開元中室韋首領段普洛數苦邊節度使薛楚玉
使客努單騎襲之斬其首以歸拜左騎尉將軍數戰有功安祿山反平
盧節度副使呂知誨降賊害安東副都護馬靈察客努與諸將殺知誨

遣使與安東將王元志相聞天寶十五載以客努爲柳城郡太守賜名
正臣以元志爲安東副大都護正臣遣使道海至平原與太守顏真卿
相結且請出師未至而平原失乃還

元

懷閭公西域鄂勒歡人太祖時爲瑞州達嚕噶齊民感其惠立德政碑

按元太祖時置達嚕噶齊監治郡縣瑞州即今寧遠州○鄂勒歡滿洲語
乾也原作阿魯渾達嚕噶齊蒙古語首領也原作達魯花赤今俱譯改

明

曹鳳南直隸臨淮人洪武時以功調廣寧中屯衛指揮同知始築城池
開創衛治撫恤士卒仕至都指揮同知

劉斌南直隸崇明人永樂初以靖難功授指揮使進都指揮僉事備禦

甯遠築城建衛時值歲儉外禦邊陲內撫軍士政理民安甚有能聲

王祥河南固始人宣德時以都指揮僉事任廣寧開府僉事修築寧遠蒲河等城掌遼東軍恤下興學頗多善政

巫凱南直隸句容人幼穎異七歲賦牡丹詩十九歲代父百戶職宣德初以都督僉事充總兵官鎮守遼東敵掠西山凱擊敗之盡得所掠者降勅褒勉時朝廷勤遠略造舟松花江招諸部地絕遠轉輸大困凱力請罷之已而造舟役復興中官阮堯民都指揮劉清等董之所爲多不法凱劾堯民等下之吏凱性剛毅饒智略馭衆嚴而有恩在遼三十餘年威惠並行邊務修飭前後守遼者皆莫及正統三年卒於官

王翱直隸鹽山人正統七年以右僉都御史提督遼東軍務時遼東將

屢失機勦以軍令久弛因諸將庭謁責以失律罪命左右曳出斬之皆
惶恐叩頭願效死贖勦乃躬行邊自山海關抵開原繕城垣浚溝塹五
里爲堡十里爲屯使烽火相接練將士恤鰥寡軍民大悅又以邊塞孤
遠軍餉匱乏緣俗立法令有罪得收贖人皆便之

文廣南直隸江都人正統時以署都指揮僉事備禦甯遠諸延犯邊廣
率兵窮追遇伏中流失死贈鎮國將軍

李榮南直隸江都人正統時守備塔山追敵至利州大戰長坡自午至
暮不少挫敵棄所掠遁邊境以安學士仇謙爲賦塔山李將軍歌

范廣遼陽人正統中嗣世職爲甯遠衛指揮僉事積功進遼東都指揮
僉事廣性剛果精騎射驍勇絕倫每臨戰身先士卒英宗北狩廷議舉

將材于謙薦廣充左副總兵額森犯京師廣躍馬陷陣敗之又敗之於紫荆關錄功進都督同知景泰初以總兵官巡邊駐居庸還京副石亨提督團營軍馬亨素銜之英宗復辟誣廣黨于謙下獄死成化初廷臣訟其冤命子昇仍襲世職（額森原作也先今譯改）

耿賢定遼前衛人由指揮陞都指揮僉事掌都司印備禦金復鐵嶺尋守備寧遠轉右參將分守開原善撫士卒不妄交際致仕歸所屬憫其清苦各餽金幣賢悉分之軍士後卒葬城東杏林山與其師顧能墓相近詩人弔之以爲師弟雙清云

李英其先盧龍人遷義州成化中爲廣寧中屯衛指揮歷左軍都督僉事充右參將分守錦義二城講武恤士訓練之暇以書史自娛敦尚古

禮建祠宇謹祭祀一以朱子爲法在任七年百度具舉

王銘錦州人成化中守備寧遠講武練軍重修二城廟學甲辰有寇警銘率精騎捲甲直趨百餘里遏其歸路盡獲所失人畜而還自是數年無犯境者

曾銑南直隸江都人嘉靖十四年擢巡按遼東時都御史呂經苛急爲政軍士遂叛銑按部至復州聞變卽還入城開諭禍福以安之是月丙申廣寧撫順兵變銑各檄示撫安密受諸將以計謀擒渠魁七月甲子銑行射禮文武畢至忽出袖中姓名分令官卒捕之逾時縛八人至明日擒撫順爲變者七人計殺廣甯賊首擒十二人不假兵革三城肅清

遼人廟祀之

按曾銑於明嘉靖二十五年四月以兵部侍郎總督陝西三邊軍務是冬俺答以十萬騎入掠延安慶陽銑率兵數千駐塞門而遣前參將李珍搗巢於馬梁山後敵始退嗣因嚴嵩爲仇鸞復仇誣奏夏言納銑金法司坐銑交結近侍律斬西市妻子流二千里此在專制時代強臣當國生殺予奪本無公理之可言雖由君主庸闇使然亦可見專制之不能久存早爲天演淘汰之定理矣

李松直隸大城人嘉靖進士官至甯前道威惠並施歷十二年晉秩至右都御史撫遼三年軍民悅戴

熊廷弼湖廣江夏人神宗三十六年巡按遼東杜饋遺核軍實時巡撫趙楫等棄寬甸新疆徙編民六萬家於內地廷弼勘得棄地驅民狀劾

二人罪歲大旱廷弼行部金州禱城隍神約七日雨不雨毀其廟及廣
寧踰三日大書曰牌封劍使使往殺之未至風雷大起雨如注遼人以
爲至誠感神天啓時爲御史馮三元等劾罷去任遼士民莫不垂泣後
以廣甯失守論誅清乾隆四十八年特奉旨錄其裔孫泗先授教諭

袁崇煥廣東東莞人天啓二年駐守關內安置遼人之失業者常夜行
荆棘虎豹中時十三由難民十餘萬久困不得出崇煥將五千兵駐甯
遠以壯聲援別遣驍將救之三年督修寧遠城工成爲關外重鎮崇煥
在職勤慎善撫將士由是流移駢集商旅輻輳遠近望爲樂土清乾隆
四十八年奉旨錄其裔孫袁炳授縣丞

金冠里貫未詳官參將天啓六年清兵略覺華島冠死之乾隆四十一

年賜諡節愍

金啓侗浙江義烏人起小吏勤敏有志略天啓六年清兵攻寧遠啓侗以燃礮死乾隆四十一年賜諡節愍

何可綱遼東人天啓中爲守備典袁崇煥寧遠道中軍廉勇善撫士卒以功累遷署寧遠副將事崇禎元年崇煥再出鎮仍以可綱爲中軍請令可綱專防寧遠且言可綱仁而有勇不破公錢不納私餽敝衣糲食不異士卒事至善謀其才不在臣下臣向所建樹實可綱力詔加都督僉事進右都督三年永平灤州失守可綱連戰有功尋復永平加太子太保已而錦州被圍督諸將赴救與祖大壽監築城大凌河工甫竣清兵十萬攻之可綱堅守不下糧絕援盡大壽及諸將皆欲降獨可綱不

從大壽令二人掖出城外殺之可綱顏色不變亦不出一言含笑而死
乾隆四十一年賜諡忠節

祖寬遼東人少從軍有功累官寧遠參將勇敢善戰部卒多塞外降人
所向克捷崇禎五年叛將李九成圍萊州詔發關外兵討之寬爲前鋒
率五百騎遇賊兵三千於沙河寬殊死戰賊退走解萊州圍進都督僉
事八年爲總兵官討流賊挫張猷忠於焦村復遇汝州賊寬率軍至大
敗之十一年清師下山東濟南失守時誣寬以失陷藩封被逮棄市寬
敢戰有功稱良將性剛使氣不爲文吏所喜卒罹大辟莫爲救論人頗
謂失刑云

金國鳳宣府人素懷忠勇有捍禦才明崇禎間以副總兵守松山十二

年二月清以重兵來攻環城發礮台堞俱摧城中人負扉以行國鳳聞
出兵突擊輒敗還乃以木石甃補城壞處清兵屢登屢却遂分兵攻塔
山連山令銳卒分道穴城國鳳多方拒守終不下閱四旬圍解帝大喜
立擢署都督僉事爲甯遠團練總兵官再論功著都督同知蔭錦衣衛
千戶是年十月清兵復攻甯遠國鳳憤將士恇怯率親丁數十人出據
北山岡鏖戰移時失盡力竭與二子俱死帝聞痛悼贈特進榮祿大夫
左都督賜祭葬有司建祠（明史本傳）清乾隆四十一年賜謚忠烈
邱民仰陝西渭南人始爲縣令有治政後擢巡撫遼東崇禎十四年清
兵圍祖大壽于錦州民仰轉餉甯遠偕洪承疇進至松山爲聲援八月
五將皆潰清兵遂進圍松山民仰誓以死守十五年二月圍急援絕城

破被執民仰死之乾隆四十一年賜諡忠節（以上見盛京通志）

清

楊道隆正藍旗人陰生康熙三年任州事除暴安良四境不擾政簡刑

清遐邇傳頌

吳秉禮福建福安縣人拔貢雍正十一年任州事興利除弊尤以清廉

自牧

伊湯安滿洲人字耐園乾隆年任州事創修州治城垣建柳城書院置

學田延山長士林愛戴邑之文風由此大啓後升浙江杭州府知府去

任

劉大觀里貫未詳字松嵐進士嘉慶十年任州事聽斷如神無伏不發

既而訟庭草長與民無事振興書院開課衡文得士如劉登泰潘紱麟
吳景春朱孔揚唱學誠王元濤姚夢瀾諸人皆文名冠一時州署西偏
有隙地構退思草堂三楹爲公餘讀書之所曾製一聯云袍笏呼來先
拜石管絃揮去獨聽松頗膾炙人口移官至山西河東道去官後隱於
王屋山著有玉磬山房詩文集

強上林江蘇溧陽人字杏齋由庶吉士於道光二十七年任州事務以
德化惠及于民催科不是敲朴而輸納恐後感民之心可見重修城垣
不勞于民捐廉購書藏諸學宮以貺寒峻時州治西南烟台河北岸風
沙壓田公親臨履勘勸民治河植樹而沙壓之患遂除至今猶利賴之
張鼎庸江蘇人字芷生舉人咸豐八年任州事其時盜賊蜂起州城戒

嚴公到任治之如法四境肅然民賴以安（以上見甯遠鄉土志）

朱克揚字北垣浙江蕭山縣人監生在任時待民恩厚刑法極寬曾出

其宦囊所蓄銀一千六百餘兩按六緡約合東錢一萬緡發商生息留

與柳城書院培士優其膏火厥後交卸並未携去又隔數年經伊孫將

歛提出向來有司下鄉驗屍場費大村須東錢千餘緡至少亦數百緡

克揚下鄉所乘敝車羸馬祇帶長隨一人字書件作各一人一切規費

絲毫不取人欽其廉先是馬州刺宗武在任因署中人購炭福源店過

秤例不去皮因與該店夥計口角遂將執事嚴押該號財東武生徐殿

魁率姪武生徐洵徐瀛等來署見門房理論值馬州刺下鄉驗屍又與

門房役人衝突氣忿自搗堂鼓役人遂自將堂事棹推翻帷幕損壞誣

賴殿魁等所爲馬州刺不察行文省署擬以闕堂塞著之罪未及執行去官克揚到任廉知其屈又不便結同寅惡感故將殿魁武生斥革並定罪徙刑三年發往遼陽其武生後亦開復至今土民德之

談廣慶字雲浦先世駐防廣州隸鑲白旗漢軍籍以繙譯進士改知縣揀發奉天其在任時值歲饑饉紳士公請定價或斷運廣慶謂定價小糧益外運若大何定爲不如使商家赴他處購糧官與紳商咸集股官任其鉅紳商任其細來糧出售不計利寧賠少許議定使和生厚鴻發源商人赴大城子購買紅糧辦平糶不但足食而且及新秋仍餘糧數十石廣慶諭衆商攤收商家以官忠厚互相推諉廣慶留爲已用以飼馬至朽蠹焉厥後其子國楫國桓同登科第接武宦奉廉能有父風人

咸謂廣慶居官清介所致云

趙臣翼字燕孫江蘇丹徒人進士於光緒二十四年任州事甫下車整頓柳城書院不遺餘力每逢官課躬自衡文評定甲乙優其膏火尋奉省令以柳城書院故址創建集寧學堂延閱次元爲英文教習學正李崇瑞爲漢文教習招生二十餘人究研科學此爲嚆矢二十六年拳壇召釁俄兵入城闔城人民驚恐惟臣翼義重守土不忍舍去嗣以供給得當俄人漸就範圍賴此鎮靜商民安堵本年十二月間有關裡徙匪盜販洋鎗子彈乘火車東行至本城車站被洋兵查出擊斃二名遂疑城中藏匿奸宄知會駐山海關俄兵統領二十九日突來馬隊千餘名臣翼聞信馳赴車站力辯其誣始而言語齟齬既而拚命力爭遂被俄

人羈留於車站暗室監視經宵臣翼化絕命詩以見志後因本地紳商聯名力保乃免其不畏強禦視死如歸有如此者旋去官後官至奉天東邊道

民國

程銘善字復初安徽合肥縣人由舉人大挑知縣蒙段芝貴上將軍奏調來奉於民國四年任州事實心任事公正廉明見義勇爲不避勞怨跡其在任善政更僕難數且文理優長如自擬四六公啓募修聖廟復有志創修縣志均以籌款爲艱無人擔任不果行今其文贈炙人口復自擬四六公啓募修城垣數十餘丈具呈省憲會同鐵路工程司修築北河佟家屯等壩以紓水患全活人民無算而民間所擔負欸項究屬

無幾事詳東北關公民所立德政碑文中辦理居民與日本人交涉案

件共二一爲南街李洛殿市房租與楊洛玉日本人大韋串六明石開

葺等間接強佔與李洛殿口角歐傷李洛殿工人陸美一案一爲錦縣

五里營村莊頭張立之有伍田地若干日坐落縣屬白馬石蔣家寺等

屯地係多年長租老佃增租變產一切不得自由嗣經張立之指地借

日本人中村佳一票洋若干元因欸不能償中村佳一遂親至該屯等

處欲實行履地管業衆佃戶赴縣呈控一案其代表中村佳一涉訟者

即本板好長亦日本人前案經銘善以李洛殿並非直接租與日本人

其租約不能發生效力理由具詳省憲蒙選潘道尹榮厚派前署州刺

劉培荃查覆結案將日本人驅逐出境後案經銘善將莊頭張立之暨

衆佃戶傳案訊究限期令佃戶出賃還日本人債而出款無多即將其土地所有權讓渡於衆佃戶至今該屯等居民感恩刻骨興城從此永無殖民之患後以口音不同去官邑人追懷其德咸尸祝之

恩麟字錫三奉天法庫縣人清之宗室熟於刑律之學歷任奉天典獄廉惠有聲以勞績擢署熱河開魯轉任興城知事下車伊始查知鈞魚台係公共海口爲邑紳串通私領冀圖壟斷罔利乃毅然追銷私領之大照仍歸公有立解紛糾商民爲之立碑頌德餘如整頓警察維持治安擴充學校宏展教育安設城鄉電話以靈通消息創設屠宰場所以慎重衛生海雲寺爲廟產訴訟十有餘年立即解決縣公署之房屋失修勢將傾圮募款修補辦理民刑各事案件必出親裁一秉大公從不

受人請託聽訟不事威嚇而咸得其情跡其創修縣志以端風化重修孔廟以興文運獎勵植樹以厚民生倡導養蠶以興地利設村長講習會則躬爲之師立圖書閱報社則民牖其智叛兵城內變亂處以鎮靜而秩序賴以不紊民間食糧缺乏嚴禁外運而民食得以維持在任三載兩經直奉戰事歷受蠻野威嚇備嘗顛險卒以人民愛戴之故克免於難逆軍敗後潰兵數千人乘汜車由京奉鐵路西竄屯集車站有逆軍團長要求開城歇兵乃急下令閉城四門屯以土囊堅執不許竟賴其力保全甚衆至今民思慕之目覩警察廢弛撤換所長者再方欲大加整頓遽升任瀋陽縣以去其他禮賢下士知人善任流風善政不勝

鄉賢

唐

李楷洛營州柳城人本契丹渠帥中宗時累官左羽林大將軍封薊郡公吐蕃寇河源楷洛擊走之初行謂人曰賊平吾不歸矣師還卒於道

諡忠烈

李惠登營州柳城人爲平盧軍裨將安祿山叛從董秦泛海略定滄棣等州輕兵遠鬪賊不支戰輒壯史思明叛惠登陷賊中以計得脫依來瑱及李希烈反以兵二千使屯隋州惠登挈州歸朝即拜隋州刺史居二十年興利去害田闢戶增人歌舞之節度使于頔上其績詔加御史

大夫

李光弼營州柳城人楷洛子襲父封以防破吐蕃吐谷渾進雲麾將軍
安祿山叛郭子儀薦其能詔加魏郡太守河北採訪使光弼以朔方兵
五千東救常山降賊將安思義又却賊於饒陽郭子儀守雲中詔悉衆
出井陘與光弼合擊史思明於九門西大敗之及拔趙郡士多擄掠光
弼坐譙門收所獲還之民至德二載思明等將兵十萬攻光弼於太原
時麾下兵不滿萬光弼徹屋爲礮石車石所擊輒傷賊思明爲飛樓障
以木幔築土山臨城光弼遣人穴地頽之又時遣突騎出乘賊俘斬萬
計思明乃遁去乾元初九節度師潰於相州光弼整衆還太原未幾爲
天下兵馬副元帥賊方闕洛光弼悉軍趨河陽擒安太清於懷州廣德
元年擒浙東賊袁晁賜鐵券圖形凌烟閣光弼知兵善用人謀定後戰

能以少覆衆初與郭子儀齊名而戰功推中興第一卒贈太保諡武穆
李彙光弼子有志操廉潔自矢元和初徐州符離分爲宿州以光弼有
遺愛擢彙爲刺史後遷涇原節度使罷軍中雜徭出俸錢贖將士質賣
子還其家卒贈工部尙書

金

持嘉暉字仲明先居遼後家萊州體貌雄偉慷慨有志略太祖天輔六
年從棟摩定興中府義錦等州破張覺及再伐宋功皆最留撫河間時
居民被掠老幼存者無幾暉下令軍中聽贖還之及攻降濟州暉約束
軍士秋毫無犯連敗宋軍遂至餘杭及還載資治通鑑板以歸累功遷
歸德軍節度使宗州（即唐萊州在今寧遠州境）舊無學暉爲營建學

舍勸督生徒肄業者復其身人競趨之屬縣民家奴王夔者嘗業進士
暉以錢五十萬贖之使卒其業夔後至顯官天德中封暉河南郡王拜
平章政事卒諡武（持嘉八旗姓原作赤蓋今譯改）

按西哲謂國家用人苟能功食相準去其所傳則其國無不强其羣
無不進者昔諸葛忠武嘗謂諸有忠慮於國者當勤攻吾之缺是以
得崔州平法孝直諸人之助毆陽文忠好士士有一言之合於道不
憚數千里求之甚至過於士之求公呂文穆爲相夾袋中有冊子謁
見者必問人材客去即疏奏之故用人稱職歷觀古今來史冊所載
凡爲國家樹根本縣遠之計者無不以汲引人材爲首務興城自民
國以來其當路而操進退人材之枋暨具有推薦資格之强有力者

不得謂絕無其人而拔茅連茹顯揚側陋至今無所表見豈十室之邑渺無忠信耶抑憂先天下雖有其人而未遑舉耶蓋嘗紬繹其故而不可得噫殆所謂賢者固難測也

元

姚樞字公茂本柳城人後遷居洛陽世祖至元二十年爲遼東按察使武平縣民劉謐訟其嫂與所私同殺其兄成縣尹丁欽以成屍無傷憂慙不食妻韓問之欽語其故妻曰恐頂顙有釘塗其迹耳驗之果然獄士上讞公召欽詢之欽矜妻之能具以告公曰若妻處子耶曰再醮令有司開其前夫棺毒與成類併正其辜時人比之包孝肅云

明

畢恭廣甯前屯衛人其先山東濟寧籍恭有文武才正統間以巡撫王
翱薦授百戶歷指揮僉事圖上方略開設迤西邊堡墻壕增置烽戍兵
威大振進署都指揮僉事守備寧前等衛在任五年邊鄙寧謐進掌都
司撫士卒革姦弊廣屯田興學校政事平理軍民咸稱之所著有邊城

吟稿

陳壽字本仁其先新淦人祖志弘代兄戍遼東遂籍寧遠衛壽少貧甚
得遺金坐至夜分還其主從鄉人賀欽學登成化八年進士授戶科給
事中言時政無隱彈劾不避權貴弘治十三年以右僉都御史巡撫延
綏敵兵入掠擊却之未幾和碩托囉率衆大至壽自出帳擁數十騎據
烏皮几指揮敵疑之遂引去旣而授諸路將領方略邀擊之皆克捷軍

聲大振尋遷右副都御史掌南院正德初劉瑾矯詔逮南京科道戴銚等壽抗章論救瑾怒罷其官九年復起巡撫陝西盜賊屏息廉名尤著夏大旱戒刑清獄齋心誠禱天乃雨歲大熟尋拜南京兵部侍郎陝人呼號擁輿移日不得行進刑部尙書致仕卒年八十三壽清廉歷官四十年無家可歸寓南都所居不蔽風雨其卒也尙書李充嗣府尹寇天叙爲之殮（和碩國語方隅也托囉國語桃也）

楊照字明遠前屯衛人都督鎮之孫嗣世職爲前屯衛指揮使嘉靖中以功累遷遼東總兵官屢立戰功嚴嵩怒照不輸賄解職嵩取朝廷以宿望起之四十二年蒙古深入金海諸衛總兵官吳瑛不能禦詔罷瑛以照代其秋又聚衆廣寧塞外謀大入照率諸將由鎮夷堡分道掩之

夜失道去塞六十里遂爲敵所困力戰中矢死照忠勇負氣撫士有恩
嘗淫盡忠報國四字於背誓以死自效起官數月間屢戰皆捷竟殞於
陣贈少保左都督謚忠壯

楊維藩照叔父結髮從父在行間屢效首功積官指揮僉事擢廣寧鎮
武營遊擊痛照陣亡誓滅敵雪恥嘉靖四十四年蒙古萬餘騎攻鎮武
維藩兵不滿千迎之於境內蓮子湖台與衆誓曰此死地也血戰或生
遂進戰殺敵幾半手刃數十人力竭死之詔贈都督僉事與線補袞並
立祠祭祀子襲職贈三秩

線補袞寧遠衛人世職衛指揮歷官進寧遠參將嘉靖四十四年敵攻
小圍山補袞擊却之追至黃土台敵大至圍之數重補袞與遊擊楊維

藩塵戰良久補袞手殺數人面中二矢鏃出腦後突圍還營數日而殞

詔贈都督僉事

(以上見盛京通志)

李如松甯遠人父成梁萬歷間張居政當國推選名將是時成梁與戚繼光齊名而武功較戚爲多故得封世襲伯五子俱膺節鉞其長子如松智勇傑出萬歷間寧夏哮拜父子合劉東陽時倡亂命如松討之如松先登入城功第一會日本攻陷朝鮮宋應昌舉如松爲征東提督奮勇先登倭軍驚動半載之間連平大寇威名甚著後追敵陷伏中死之贈少保襲寧遠伯諡忠烈(甯遠鄉土志)

祖承訓字偉績祖仁次子少有大志不是咕嗶好習弓矢嘗謂人曰人之功名何必讀書然後得乎能馳馬試劍爲國家折衝禦侮亦不在筆

墨之下日習技成銳然往廣寧提督李成梁軍門請見即置部下後征倭多立首功神宗時由百千累官至遼陽副總兵加左軍都督橫玉帶又立功授甯遠衛指揮同知協守遼陽時嘗一日而禦九門之敵兵備道栗公佚其名登城觀戰躑足嘆曰若斯驍勇書生能不爲之執鞭有此一將國家之福不爲申報論功監軍者無本心矣奏凱往廣甯與成梁備述是事成梁恐已無色私謂承訓曰祖副將欲奪提督印乎承訓曰何敢成梁曰堵禦九門將報貴協獨力乎抑報我合力乎承訓曰是斷在上台成梁曰稍存我體可也後竟不報全功承訓臨陣勇氣莫敵

中外名爲鷁鷹（祖氏家譜）

王廷臣邑西南沙河所人官遼東都督同知明崇禎十三年代劉肇基

爲遼東總兵十四年八月戰於錦州諸將連敗廷臣與洪承疇退守松山十五年二月城破承疇降廷臣被執不屈死之清乾隆四十一年賜諡忠節（錦縣略志）

李輔明遼東人累官副總兵崇禎初從祖寬南伐連破流賊於嵩縣海州確山明年追破流賊於滁州加都督僉事擢山西總兵官被劾罷洪承疇出關使從征旣而楊國柱戰歿遂代爲援遼總兵十六年冬清兵薄寧遠輔明馳援力戰歿於陣乾隆四十一年賜諡烈愍

楊倫前屯衛副總兵以拒守陣亡又前屯衛總兵李鳳鳴前屯衛副總兵羅文耀寧遠總兵王定宸俱遼東人皆櫻城拒守城破死之清乾隆四十一年賜楊倫諡烈愍李鳳鳴羅文耀王定宸俱諡節愍

清

張尙寧遠州人隸正黃旗漢軍清太祖定遼來歸崇德三年任戶部啓
心郎以稱職列優叙順治十二年擢福建右布政使時海氛甚熾陷漳
州泉豐以南震動大軍進勦資糧供頓日費數十萬錢尙督餉無匱監
造巨礮攻具往來海上親冒矢石備歷險阻卒復漳州遷左僉都御史
巡撫甘肅卒于官閩人思之祀名宦祠

線國安遼東人隸正紅旗漢軍崇德元年隨孔有德航海歸誠從征海
外各島及克服朝鮮皆在事有功順治元年隨大軍入關追勦流賊李
自成於潼關破金溝寨復從征江南克揚州以兵先渡揚子江克江陰
四年隨征湖南取衡山六年授總兵官復隨攻湖南多所擒獲招安反

側官兵六七萬人隨進取廣西之桂林柳州功最遂鎮南壽七年李定國犯桂林提師赴援定國遁去九年授提督十年李定國擁衆數萬復犯桂林國安與陳維新計敗之遂平定全粵十一年復永寧州叙功加太子少保征蠻將軍順治十二年叙恢復桂林功授三等伯世襲十五年隨進取滇黔戰李定國於涼水井殺賊五十有餘復戰於水寨山口殺賊萬計十八年授都統康熙五年因老乞休十四年卒國安性廉介二十餘年清操如一人咸以爲難

張朝璘隸正藍旗漢軍父士彥明廣寧守備爲巡撫王化貞中軍化貞遁入關士彥來降授三等輕車都尉朝璘襲職崇德七年以佐領從攻登州八年從克中後所前屯衛二城晉世職爲二等任兵部理事官順

治二年從豫親王多鐸下江南攻克揚州城駐防蘇州擊敗明總兵黃
蜚等軍蜚復擁千艘來犯朝璘以舟師迎戰春申浦大敗之四年從恭
順王孔有德征明桂王朱由榔於武岡乘夜疾進遇明將曹志建軍擲
火毬焚其營志建軍潰復敗僞國公劉承允於夕陽橋承允乃以武岡
降由榔走靖州朝璘轉戰黔陽破僞伯張光璧所部五營進克沅州六
年從睿親王多爾袞討叛鎮姜壤於大同復渾源左衛及朔州汾州太
谷等城歷官副都統晉爵至一等男累遷戶部侍郎尋奉命巡撫江西
時南昌瑞州二府經金聲桓之亂戶口凋耗田多荒落巡按御史笏重
光請蠲賦興甦下朝璘議具言二府荒田六十餘萬畝自召墾以來新
甦雲集成熟者四十萬未墾者尙二十餘萬若一槩徵科必將以荒田

之賦飛寄熟田新甿若賦重勢且委之他徙則不特荒者終荒漸至熟者亦荒應如重光言蠲之便得旨報可十四年加兵部尙書十八年擢江西總督康熙二年右布政使王庭請減南昌府屬賦額復下朝璘議朝璘博考江西諸府縣志知南昌袁瑞三府橫征之弊自陳友諒始友諒以武甯乃其鄉縣故縣賦獨如宋元舊額而他皆倍之明沿其弊未革前撫臣蔡士英按臣吳贊元欲革其弊而是時府縣新定舊志散亡僅據右布政使莊應會所得故牘奏減袁瑞二府賦額未及南昌今庭請減之誠恤民至計疏入遂減六縣一州歲徵銀十九萬五千餘兩米十四萬九千餘石民甚德之四年裁江西總督乃還京五年復出爲福建總督六年以老疾致仕越十餘年卒子聖鐸襲職

張朝珍廣寧人隸正藍旂漢軍初任工部啓心郎順治十八年巡撫安徽凡所陳奏皆切中利弊康熙十二年任湖北巡撫時大軍進勦滇黔軍務旁午朝珍不遑寢食造戰船以練水師建浮橋以渡兵馬運糧抵蜀不派民夫歲饑捐賑全活甚衆在楚數年招流亡安舊業絕饋遺禁火耗政有實惠嗣以勞瘁卒於官祀湖廣名宦

張朝瑞廣寧人隸正藍旂漢軍順治五年知河南登封令年少英毅洞悉民隱邑經兵燹土曠民稀招徠流亡多方勸墾凋殘頓蘇以循能擢御史巡按湖北瀕行父老追送百餘里蒞楚後清節益著屬吏皆敬憚之

穆爾謨甯遠人順治初知江南贛榆縣精明強毅聽斷如流案無積塵

時士寇猖獗爾謨親帥鄉民勦捕斬其渠首賊遠遁不敢復犯縣境以安（以上見盛京通志）

祖建衡世居城內清世祖丙戌年歲貢生任山東兗州府金鄉縣知縣歷任福建按察司廣西布政司卒於官欽賜御祭康熙年間入祀福建名宦祠（祖氏家譜）

柏天儲世居城北柏家墳村清順治時由侍衛充佐領於十八年出征永利在湖南陣亡贈一拖沙喇哈番入祀忠臣廟（柏氏家譜）

劉登泰字仙一邑西南新民屯人清歲貢生文學品詣超邁一時咸豐初年部選直隸無極縣學官抵任年餘值髮逆北竄擾無極守土者有潛意登泰昌言曰讀書數十年當知城存與存城亡與亡甯死勿去之

義次子中義隨侍在署亦不忍去後賊陷隣封而無極無恙尋解組歸田猶如布衣後進者皆以登泰爲矜式

朱光宇字錦橋原名鳳儀邑西南沙河所人清道光己酉拔貢生以州判分發河南歷知各州縣事循聲卓著其官禹州時也值髮逆北竄禹境適當其衝光宇興辦團練督剿擊賊大獲勝仗著有禹州用兵紀略藏於家其治汝陽也捐廉一千二百金創設孤貧院光字母張復措貲六百元爲助凡汝之無告窮民得不流離失所咸豐十一年宰祥符時有寇突至城下光宇整隊出勦上峯阻止越日賊遂西竄難民麇集城下光宇以蒸餅繼下與之食全活無算同治元年春團練大臣毛河督黃豫撫鄭交章以河南第一賢員薦奉上諭毛咏熙黃贊湯鄭元善等

奏特舉賢員一摺河南祥符縣知縣朱光宇才守兼優膽識並壯勇能禦寇惠足孚民洵爲河南第一賢員著依議欽此遂由祥符令擢開封守加道銜二年春因母老乞養歸里是時也關東盜匪猖獗四年欽差大臣尙書文祥將軍福興督師東征奏派光宇與在籍紳士同知李鵬揚辦理甯屬團練五年春丁內艱河南巡撫李鶴年奏調光宇辦理汴省軍務七年秋安陽民聚衆抗糧大府檄公往剿光宇曰剿不如撫民苦糧而官之督民者必曰速完糧民苦差而官之令民者必曰速辦差是驅民速之亂也遂携二三僕往河北撫輯百姓欣相告曰我朱公來凡我百姓敢不唯命是聽不費一兵而事蕪凡遇大災捍大患大府咸倚重之同治九年八月擢開歸陳許道未到任而卒

劉汝敬字慎齋清恩貢生邑西北黑莊科人同治元年舉孝廉方正敦
品勵行尤長制藝講學里門人爭就傅家夙豐好施與設粥廠乞食者
接踵至歲以爲常光緒九年選授直隸南皮縣學官之任時囑家人曰
博施濟衆是讀書人應盡事須體我心好爲之每寄家書猶殷殷以鄰
里之疾苦爲問卒於官

楊光第字錦堂城西南沙河所人清同治辛未武進士光緒四年以藍
翎侍衛特授直隸通永鎮通協采育營都司甫下車時營兵半吸鴉烟
又兼餉素棚扣服率襤褸債家每倚貲呵叱光第慨出金代償並出葺
數斤佐戒烟服敝者易之營政遂肅六年采市陳姓與鄰縣伊指揮營
村(俗名回子營)伊姓口角械鬥經毛巡檢賡虞傳訊杖責且嚴押伊

姓回衆憤甚翌日聚衆數百咸身畫白記持械來鎮意欲威嚇劫伊姓
出汎官周義和率兵彈壓突被回衆刀傷營弁以情同叛逆咸請勦翼
功賞光第弗聽且盡力爲之解脫得免重坐該村故多盜自是咸感泣
相戒不入境九年歲大饑文欽使恰奉旨設粥廠時饑民過衆賴光第
盡力彈壓始無擁擠傷人情事後蒙李直督鴻章准予記大功二次十
六年復大饑胡欽使聘之率員設廠時飢寒比曩尤衆擁擠亦甚於前
光第到廠必諭以婦女外出情非得已各宜安分勿貽人非笑胡公爲
是派光第襄辦賑務斟酌使無遺憾自是星出哺返積勞過甚廠未蕪
事即得歾血症幾殆差竣胡公升京兆尹蒙奏獎以遊擊升用先換頂
戴翌年楊通永道宗濂與桂道本誠董修鳳河皆躬至營署訪利弊鎮

南舊有大石橋年久失修行旅艱之士人議修屢以欸絀不果光第爲
謁楊道宗濂大興謝令裕楷籌畫得七百餘金又爲婉商隣邑鉅富何
星岩得灰磚石足用工賴以竣十八年歲又饑謝令因設廠半在所治
苦支費擬將采局移置于馬駒橋賴光第面謁岑欽使春煊局得復設
采人咸慶再生全活無算二十六年夏間拳壇肇隙聯軍入都兩宮西
巡民心惶駭兼之餉源已絕光第惟以忠義勵其部下藉免星散遲至
閏八月二十九日突有德兵入境闔鎮官吏皆遁惟光第以不忍斯民
之故衣冠堂上爲民乞命時光第長子附生蔭芬與署馬駒汎把總張
進忠在側詎要素無算光第抗論不屈德兵怒擁光第父子等至鎮東
馬神廟見其軍官軍官似有所詰責光第聲色俱厲憤不欲生德兵出

鏡照像訖遂傳哨轟擊蔭芬身中四鎗瀕死復甦光第遂與張進忠同時遇害嗣經崑欽使崗奏請卹典奉旨著照遊擊例賜卹又經李直督鴻章奏請卹典奉旨仍照遊擊例賜卹並入祀本籍昭忠祠民國十三年七月經光第次子蔭芳呈請縣公署援例入祀鄉賢祠蒙批該紳故父楊光第在任盡忠報國應准入祀鄉賢祠以資觀感遂於九月初三日備具載主乘輿牌繖儀仗咸備一時公署重要人物暨各機關領袖咸衣冠濟濟恭送入祠云計光第在任二十三年囊無餘資每歲廉俸所入除竭力供其二子延師課讀外餘盡以之分潤宗族俛助友朋生平嘗舉范文正公就祖宗上論均是一樣子孫子孫有發籍者不當獨享富貴薄待宗族等語勗其二子雖自奉儉約而在任供其堂侄春育

讀書春芳業武胞弟光璧胞侄春甲咸待之舉火全族中不受沾潤者
絕尠其篤於宗族蓋天性也

按此稿因纂修避席由協修趙述代纂理合聲明

孝義

宮守禮寧遠衛人生員性端謹好古守禮父思問病衣不解帶藥必親
嘗及卒廬墓三年有白雀來巢於廬上事繼母尤謹朝夕率妻拜問繼
母初欲改適感其孝遂止與鄉人飲守禮在坐少長莫敢喧嘩其風動
流俗如此嘉靖間守臣上其事詔旌其門

朱國正

按盛京通志所載朱國禎事蹟與朱國正恰合妻亦節婦劉氏與寧

遠鄉土志亦合寧遠舊爲廣寧中屯前屯二衛地故稱廣寧衛人正
禎二字同入八庚韻或係當日採訪之誤故附錄其事蹟以備參考
朱國禎廣寧衛人父歿居喪盡禮力營葬事治墳塋松楸鬱然皆手
植也結廬墓側朝夕哭奠如初比初制羸瘠而死妻劉氏艾年守志
撫孤成立同時節孝並稱

李暄字明作邑西南新民屯人清歲貢生豐於財樂善好施常年設粥
廠凡附近鄰村之乏食者咸往領粥道光十四年大饑除常年粥廠外
另設粥廠四方就食者日數百計活人無算至今鄉人稱之

鄧瀛波字心齋清附貢生城西北茸角溝人賦性嚴正不苟言笑居鄉
有盛德尤好施與常爲人排難解紛代親友伸雪冤抑對於族人因伯

母孀居年老堂弟德裕少不更事致被官差誣告瀛波挺身出任其事
向官府力辯其枉得免所有費用不取償焉光緒二十一年歲大饑時
值三月軍旅之後十室九空雖有湖南各處義賑難以徧濟瀛波請于
賀前州刺擬照州署所調查之黑松林押兒山二鄉約界災民戶口冊
按口施放賑糧經手人爲州城商人信興號張洛凌和興裕王洛振見
符付糧時紅糧價約十吊小米約十二吊芝麻約六吊綠豆約五吊紅
糧小米放罄繼以芝麻綠豆共施糧約合現銀三千餘兩至今縣署有
案賀前州刺擬代爲請旌瀛波婉言謝絕後光緒二十五年歲中饑瀛
波又施舍賑糧於黑松林一界由紅崖子商號福順永出糧數目約在
二三百石二十六年秋因受拳匪影響俄兵肆行騷擾官府無力保護

瀛波慨然奮發舉辦鄉團嚴定規章五日一聚聚則爲兵散則爲民因
此賊人遠颺計茸角溝五頂山梨樹溝門一帶二百里內不受蹂躪至
今土人德之

文學

吳景春字澤園邑西北小三台人清歲貢生道光初年講學於團山別
墅出其門者如朱光字李鵬展李鵬揚劉汝敬諸人或爲循吏或爲鄉
賢其他如鞠樸吳文炤趙毓芝等文學之士指不勝縷同治初元安徽
巡撫故城賈臻製關東大師匾額旌其門卒年八十有九

朱鏡涵字春圃城南朱家屯人清道光間歲貢生賦性誠篤幼受業於
吳澤園明經敦品勵行鄉里無間其爲文筆勢夭矯叙事簡而有法子

汝賡成光緒丙戌進士足徵家學淵源所作文字膾炙人口惜遺墨無
多人咸重之

李鵬展字挹汀邑西南新民屯人清道光辛卯優貢生以官學教習授
教諭道光二十七年重修州城派爲總監修舉文廟文昌宮奎星樓柳
城書院皆出自心裁規制宏敞後出仕直隸同治三年署理廣宗縣以
勤儉爲本嚴懲土棍不數月邑大治有夜不閉戶之慶量移他缺邑之
在藉紳士河南巡撫鄭元善具稟懇留大府照准又留廣宗一年後官
至冀州直隸州卒於官

吳文炤字曉峯號蓮渠城西北小山台人景春子清道光庚子優貢生
考充盛京漢教習期滿引見以知縣用因家貧親老故無意仕進文炤

天性最篤胞弟文燾早卒無子祇一女弟婦郝守節自矢擇姪輩中之
賢者嗣之女字趙氏將嫁前數日妝奩被竊殆盡猝難再置郝與女啼
恨欲死母孫亦驚憤成疾文炤憂甚遣人四出尋之期在必得人多笑
其迂既而賊竟獲物無損失咸以爲孝慈所致云族兄某欲奪文炤園
圃以廣其宅詭言先世已析與之時距析居已閱兩世鄉隣悉爲不平
文炤怡然與之其雅量不爭如此立身敦品以古人自期見戚友子弟
必諄諄勉以孝悌否則不得齒於人語皆剴直他如祭祀之誠義利之
辨尤終身兢兢不敢忽焉爲文胎息大家筆姿蒼秀雖極沈悶題能以
醒豁出之詩賦蘊藉瀏亮老嫗可解書法毆柳秀勁有致以此才名藉
甚一時惟中年失明未竟其才士林惜之

慶春字松岩蒙古人住本城清光緒乙酉拔貢戊子舉人庚寅進士分戶部主事旋應陞中允未就改直隸州分湖北知荆門直隸州事在光緒季年初興學校慶春曾奉文親赴東洋考察政治著有遊東瀛日記未梓已刊本有東政稟稿一冊言日本興國事頗詳後以廢弛公務去職家於京師曾出宦囊創設學校冀謀開復未幾卒

郭鴻達字脈坡城西紅崖子屯人少歧嶷有大志讀書記誦絕人年二十四補邑庠生數應舉子試未售乃設帳於鄉循循善誘無怠志一時入膠庠者多出其門文思敏捷轉瞬成篇曾撰本邑鄉土志一冊考古證今識者謂其學有根抵焉其處戚黨以慈善爲懷施與不吝處家庭以節儉自勵漸致小康至光緒末葉應局董之選秉公服務素爲官民

所欽佩嗣因精力不佳辭退仍以授徒終其身

隱逸

董柏蒼字雪巖邑西南董家屯人少聰穎喜讀書博聞強記居家孝友無間言行無僞後師事王務之先生於昌黎始聞治心修身之要從此遂致力經史無意進取立身行己純以古人自期一時所與遊者如劉慎齋劉子明周星垣馮建侯李墨林等皆知名之士妻死誓不再娶携子澍在外授徒居無何諸弟求析爨又以所分多不滿意求與兄易皆聽之後弟暨弟婦屢有所貸雖久不償亦弗問也其處戚黨朋友亦然居母喪哀泣過禮不茹葷酒以此見重當時其子澍欲聘同姓女爲媳並以昔人有行之者爲請柏蒼曰古今人事實繁凡事而不揆之以理

輒云昔人有行之者此傷風敗俗之所由衆也又曰汝旣廢學暇時可
瀏覽經史則是非邪正久之自然分曉遇事庶有把握所作詩蒼老迥
勁膾炙人口著有海外山人詩集藏於家卒年八十有一士林惜之

李賡唐字月秋邑南關人武庠生國柱之子光緒己丑歲貢生賦性狷
介寡交遊幼年知讀書堅苦刻厲年十五即負笈求學百里外前後從
朱雲生常嘯谷兩先生教深資啓迪於同治甲戌歲入泮始肆力於舉
業以近地無良導師遂赴錦受業於朱子良太史門下及門五年造詣
殊深尋赴秋試獲薦未售嗣丁外艱以無昆弟分責遂無意仕進經理
家政宣統改元蒙闔邑士紳公舉孝廉方正堅辭不就其恬退有如此
者生平爲私人權利事無一字入公門民國六年園房租驟增至園戶

房戶咸以爲請賡唐稍稍增之弗重視也雖納筮生子克繼書香然糟糠念舊終其身無寵庶薄嫡行爲可爲後進模範晚年尤工書摹做柳碑維肖所書商號匾額端整迥勁人爭寶之未幾卒

耆舊

王元濤字松亭邑東關人清優貢生道光元年舉孝廉方正陞見時蒙清宣宗賜問曰朕奉兩宮皇太后旨議打關東圍記是先走錦縣後走寧遠州元濤磕頭對曰是我皇上奉兩宮皇太后旨議巡幸奉天迴鑾時是先走錦縣後走寧遠州上大悅御筆欽賜孝廉方正第一後官至河南彰德府知府

邵春卿字惠堂本城人清道光己酉舉人庚戌進士籤掣廣西時廣西

值洪秀全之亂無人敢往春卿以書生不更事遂往焉歷官州縣數邑

尋陞柳州府知府後以賊匪攻城殉難中丞奏聞子作霖恩蔭雲騎尉

李鵬揚字海帆邑西南新民屯人清道光甲午優貢生以官學教習需

次縣令咸豐元年選授浙江遂昌縣知縣縣境毘連溫州甌匪時來滋

擾百餘年來鄉閭莫安鵬揚訪明匪來之寄窩於二年除夕日帶親信

丁役前往勦捕出其不備擒獲匪首李銅錘訊明實情斃於杖下餘匪

潛逃終不敢犯鄰邑松陽自此亦無甌患遂松兩邑士民德之在朱村

地方建生位祠附以義倉置祭田歲時展祀四年冬調署乍浦海防同

知八年春髮逆竄江右而浙境戒嚴衢州府之江山常山爲浙西門戶

大府檄鵬揚隨同金衢嚴道繆梓辦理三衢防勦事宜駐紮衢郡五月

間常山告陷旋即克復因積勞嘔血告病乞休歸里咸豐十年間關東地方盜賊蜂起各處土匪結黨作惡鵬揚舉辦鄉團呈請格殺勿論告示先後拏獲放火訛人之棍匪高連登等十數名匪首高連登正法示衆餘匪悉逐境外除暴安良以勸善規過爲己任尋卒里人誦其功德輒感歎不置

李毓楨字子才邑南關人清附生由附貢生隨西安將軍庫克吉泰征回匪蒙保知縣加同知銜歷任直隸贊皇滿城隆平等縣政聲卓著光緒十六年在隆平縣任內因順直水災奇重遵其母李陳氏命捐棉衣二千件經直督李鴻章奏請旌獎於光緒十七年二月十七日奉准在原籍地方自行建坊給子樂善好施字樣光緒丙戌毓楨丁外艱在籍

曾倡修城垣又倡議以城工之贏餘補書院之不足寒士賴以霑潤後於光緒乙未年卒士林惜之

李國風字先周邑南關人由清附貢生報捐府經歷分發直隸因充當火藥局差出力保升知縣曆署直隸沙河邢台宣化等縣尋提補萬全縣(張家口等處)知縣在任保升同知後免補同知以直隸州知州升用萬全風俗婦女尙妝飭不事紡績國風爲製紡車數具傳民間老幼婦女入署習之又其婦女不顧廉耻夏日在外輒肉袒乘涼國風出示嚴禁至每逢公出先行使人鳴鑼以便迴避云

李恩需字子霖邑西南新民屯人優貢生鵬展長子同治庚午舉人官直隸廣平府教諭文風大振後卒於任所

朱汝賡字繼臬邑南朱家屯人歲貢生鏡涵子清光緒丙子舉人光緒初年整頓柳城書院充監院不支薪書院之設汝賡之力居多丙戌進士分直隸即用知縣未幾卒

李如芝字瑞庭邑南關人清附生光緒初元舉孝廉方正以臬經歷歸河南補用後保升知縣歷署甯陵永甯等縣知縣所至有政聲性孝友每以嚴慈逝世不得祿養爲憾故於其父所遺葺室事之如生母恒居以禮自持有不履邪徑之風於光緒甲辰年卒於官

鄭文欽字瑞亭漢軍旗人光緒己卯舉人庚寅進士由翰林院庶吉士散館分戶部主事嗣改道員分發山西光緒二十六年任署歸綏道任內與毓中丞賢同罹戕害教民罪文欽去職在回省途次憂憤仰藥卒

時年未四十人咸惜之

劉松年字鶴亭滿洲人住河西劉八斗屯光緒乙酉舉人庚寅進士分江蘇試用知縣未獲補署於光緒辛丑年卒

楊慶瑞字雲閣盛京滿洲鑲紅旗人世居邑西北新台門清同治庚午舉人甲戌進士以知縣分發湖南曆任藍山新化巴陵等縣其在署衡

陽任內嚴懲罷考不稍寬貸對於士紳插訟慶瑞不假辭色厥後因之歛跡衡州府城原係兩縣過往辦差不勝其繁歷任因無暇聽訟向由道署委員幫審慶瑞日間接送雖勞夜間猶必躬親聽訟惟恐假手他人案有冤抑每月結案比較尤多因之上峯時加獎勵後以清慎勤明

長于吏治爲守兼優等考語上聞奉旨以知州升用慶瑞雅爲彭剛直

原书缺页

原书缺页

公玉麟所器重其在衡服官至四年之久者皆暗中維持之力也後于巴陵縣任滿致仕歸田時年六十閱數年乃卒

李麟閣字筱岩邑南關人有幹事才由河南候補府經歷洊升知縣歷官河南商水伊陽等縣知縣當有清末葉麟閣適知伊陽縣事時邑有大股土匪冒稱革軍值寶中丞蔡已出走或剿或撫均無人負責遂憂憤成疾共和告成即解組去旋卒

李岱雲字峻卿邑本城人清國學生才具明敏善治事光緒乙未吳湘撫大澈出關征日本過邑憫荒旱散放賑米岱雲贊助之庚子之役俄軍到境一切應付岱雲之力居多趙州刺臣翼深資臂助嗣土匪起招撫後又以岱雲馭之時稱爲雲字營賴岱雲日夜勸誠未爲大患地方

亦賴以安凡吾邑商會巡警皆由岱雲創辦其有幹事材亦可見矣

李縉雲字蘊卿邑西北劉屠屯人後徙居本城前清候選同知由光緒

三十年起遵照新章創辦學校稟官立案設裕民官帖局以餘利充作

學校常年經費立速成師範前後數班及初等高等小學各學校得人

之盛如程慎前尙鵬程張麟楊蔭棠其傑出者任劉君兆蘭爲校長整

頓學務不遺餘力民國二年去職呈繳公餘銀二千餘兩留作織廠基

本金未幾卒

趙春甲字顯廷邑西關人清光緒戊子武舉己丑武進士以營用守備

指分山東需次時值張曜巡撫山左勵精圖治甚蒙優遇屢派短差惟

春甲不嫻酬酢故淡於仕進無何以親老請假歸省遂不復出春甲在

籍裏辦地方公益十數年遇有與民興利除弊之事均能破除情面認真調查以故前州刺賀堦欽遲其爲人甚倚重之今其哲嗣鶴年頭角嶄露長教育已數年餘慶之延正未有艾矣

李蓬瀛字芝境邑西梨樹溝門人由清武生蒙署錦州府知府章樾委充綏錦右營管帶尋改編爲巡防統帶光緒三十一年因巡防出力蒙奉天將軍增祺以文職保升知府宣統三年蒙奉天將軍趙爾巽保以道員留奉補用民國元年蒙奉天督都今東三省保安總司令委充奉天全省漁業總局局長兼充帶兵輪事宜民國九年蒙黑龍江督軍孫烈臣調委江省廣信公司及官銀號會辦兼總辦民國十二年公司銀號改組撤消總辦會辦蒙黑龍江督軍吳俊陞委充坐辦蓬瀛少有大

志經其拔擢者以孫烈臣督軍爲最著名尤善理財廣信公司之委任蓋因人擇地也以是年五月卒於江省差次時年五十有九

元

仙釋

劉秉忠本瑞州人（按瑞州今興城縣境）因曾祖官邢州徙家焉初名侃字仲晦少補邢臺節度使令史慨然投筆去隱武安山中遂從浮屠法更名子聰後遊雲中留居南堂寺世祖在潛邸時海雲禪師被召過雲中聞其博學多材藝邀與俱入見應對稱旨屢承顧問秉忠於書無所不讀尤邃於易及邵氏經世書至於天文地理律歷三式六壬遁甲之屬無不精通世祖正大位一世規模制作皆所草定賜第奉先坊拜

光祿大夫太保參領中書省事至元十一年扈從至上都築精舍於南屏山居之秋八月無疾端坐而逝（按劉秉忠在元既以勳名顯貴位至師保本不當以釋目之然其始也寄跡山林其沒也亦以蟬脫是終始以禪蛻者也故仍志之仙釋）



興城縣志卷之九

人物下

烈女

氏族



烈女

貞女

明

孟姜許氏

清

姚法珠未婚之妻賈氏

民國

姚永緒字大忠前寧遠正紅旗佐領慶韜之少女也慶韜生子二長永祺次永賡少女即永緒女年十二母故兩弟俱幼父恐前室兒女失蔭不忍繼娶永緒晝製衣履夜伴讀書卒撫兩弟成立無何長弟永祺夭

逝永緒經此棖觸矢志不嫁伴弟婦金守孀慶韜行年八十有疾永緒躬侍湯藥辛苦備至洎歿永緒麻經墨面輔次弟永賡喪葬如儀尋永賡亡弟婦呂又嫠永緒守貞之志益堅律已冰霜以端表率持家勤儉若將終身初永賡在日感姊恩刻骨屢以婚事爲言永緒慨然曰姊有不肖舉動爲弟所窺耶人各有志以吾家尙豐何虞無羸糲啖我姊弟遂相對而泣從此不敢復請民國九年永賡同叔父趾祥浼戚在京請褒蒙前大總統徐世昌給予至性過人字樣併授黃綬徽章以嘉貞孝永緒以自慚德薄屢阻懸額遲至民國十四年八月念六日始迫於叔父命製額懸掛時年已五十有一也戚友知其事者咸贈聯表揚藉伸

敬忱云

佟萬成之女城西二十里二道邊人自幼未聘矢志不嫁現年五十三歲鄉里以貞女稱之

節婦 凡已嫁殉夫及已嫁殺身以拒強暴者則謂之烈婦

谷薦馨妻田氏寧遠州人守節三十餘年平時親黨罕有得見者其謹慎若此

趙世祿妻董氏甯遠州人夫亡家貧奉姑至孝守節數十年

吳來尹妻趙氏寧遠州人夫亡事祖姑及姑以孝著一門三孀閭儀整肅尤堪矜尙

王守良妻李氏寧遠州人夫亡辛苦撫孤教子詩書及長成立曰吾夫有嗣吾無憾矣

溫成祥妻王氏寧遠州人守志食貧織紉以給饗殮節孝尤彰

王六妻楊氏寧遠州人夫死氏艱苦備嘗呼天誓志至死不移

王進才妻孫氏甯遠州人女德素嫻及夫亡志凜冰霜貞操彌著（俱

於清雍正三年旌表）

趙廷弼妻張氏甯遠州人夫亡氏耐守清貧艱辛萬狀人稱苦節

劉成業妻馬氏寧遠州人氏青年喪夫哀毀骨立貞一之操垂白盟心

（俱於清雍正九年旌表）

廩生梁維屏妻張氏寧遠州人夫亡守節二十餘年勤奉翁姑訓子成

立

溫自選妻王氏甯遠州人夫亡守節三十餘年事姑盡孝撫孤完節

杜爲禮妻楊氏寧遠州人夫亡守節三十餘年事奉孀姑訓誨子女不惰不倦鄉鄰俱爲稱歎

趙仲金妻張氏甯遠州人夫亡守節二十餘年奉姑克盡孝道撫孤成立守志安貧

辛朝選妻李氏寧遠州人夫亡守節三十餘年敬事孀姑撫養幼子閨門肅有禮法

趙連茹妻張氏寧遠州人夫亡守節二十餘年上事孀姑下撫孤嗣有孝慈聲

李進孝妻馬氏寧遠州人夫亡守節三十餘年堅耐清貧撫孤成立

崔崇妻陳氏直隸臨榆縣人寄居寧遠夫亡守節二十餘年上事繼姑

下訓幼子孝慈兼盡

李養妻李氏甯遠州人夫亡守節三十年家赤貧針紉事姑撫子成立
孝節無虧

劉天祿妻崔氏甯遠州人夫亡守節三十餘年孝奉翁姑撫養孤子矢志終身（俱於清乾隆四年旌表）

郭洪基妻王氏甯遠州人夫亡守節三十餘年奉事孀姑能體其心撫子成立艱苦備嘗

李進富妻王氏甯遠州人夫亡守節四十年奉老育幼堅貞之操風動

鄉黨

許大成妻曹氏甯遠州人夫亡守節三十餘年備歷艱苦訓子成立

楊守富妻溫氏寧遠州人夫亡守節三十餘年上事繼姑曲盡婦道撫

孤有成克守宗祀

宋九思妻劉氏甯遠州人夫亡守志四十年奉姑撫幼節著堅貞俱

於清乾隆十六年旌表

劉天榮妻張氏寧遠州人夫亡守節四十餘年堅耐情貧久而彌勵

呂萬魁妻趙氏寧遠州人夫亡守節四十年勤奉孀姑克盡孝道撫養

幼子苦志完貞

常思明妻黃氏寧遠州人夫亡守節四十餘年食貧完節孝奉孀姑撫

孤成立

劉登科妻潘氏寧遠州人夫亡守節三十餘年事姑進禮撫孤有成允

稱孝節

許碧妻周氏甯遠州人夫亡守節四十餘年家無升斗奉姑克盡孝養

菽水之歡未嘗稍缺（俱於清乾隆十七年旌表）

石越凡妻楊氏甯遠州人夫亡守節三十餘年家貧矢志撫子成立

龔俊妻李氏甯遠州人夫亡守節三十餘年家貧針紉奉姑甘旨撫子成立咸稱孝（俱於清乾隆二十二年旌表）

張景龍妻劉氏甯遠州人夫亡守節三十餘年孝奉翁姑克盡婦道（

清乾隆二十六年旌表）

劉國卿妻劉氏甯遠州人其翁夤夜入室圖奸氏守正不污投繯殞命

節烈懋著（清乾隆二十七年旌表）

邱萬倉妻李氏寧遠州人夫亡守節三十餘年勤奉孀姑孝行尤著（清乾隆三十九年旌表）

倪華兆妻姚氏甯遠州人夫亡守志五十餘年事奉翁姑生養死葬皆針紉拮据撫孤成立艱辛備至貞操最爲堅久（清乾隆四十二年旌表以上見盛京通志）

節婦孝子朱國政之妻劉氏

烈婦劉國卿妻劉氏

烈婦趙毓蕃之側室王氏

節婦崔崇妻陳氏

節婦張大鵬妻姚氏

節婦陳 凝妻張氏

節婦梁成邦妻李氏

節婦趙大用妻馮氏

節婦劉登舉妻潘氏

節婦杜維禮妻楊氏

節婦趙連茹妻張氏

節婦張會雲妻雷氏

節婦白萬聰妻張氏

節婦李 義妻李氏

節婦倪華兆妻姚氏

節婦邱萬倉妻李氏

節婦張維繼妻田氏

節婦王勤妻溫氏

節婦巫文魁妻蕭氏

節婦趙恕妻陳氏

節婦張景龍妻劉氏

節婦馬甄妻劉氏

節婦趙公妻張氏

節婦劉英妻張氏

節婦甯景武妻左氏

節婦常思明妻黃氏

節婦龔俊妻李氏

節婦劉步蟬妻單氏

節婦李進學妻馮氏

節婦劉元榮妻張氏

節婦關承業妻王氏

節婦陳文凝妻徐氏

節婦王家興妻萬氏

節婦溫自選妻王氏

節婦李芳妻張氏

節婦郭景春妻李氏

節婦明 璐妻陳氏

節婦許大成妻曹氏

節婦趙應時妻王氏

節婦劉廷選妻胡氏

節婦王元浩妻岳氏

節婦吳文著妻郝氏

節婦李進富妻王氏

節婦梁維屏妻張氏

節婦高 文妻陳氏

節婦高登科妻李氏

節婦郭洪基妻賈氏

節婦呂萬魁妻趙氏

節婦宋九思妻劉氏

節婦劉天祿妻崔氏

節婦王煦維妻汪氏

節婦石越凡妻楊氏

節婦朱國翔妻王氏

節婦王觀生妻錢氏

節婦陳守仁妻穆氏

節婦楊守富妻溫氏

節婦趙仲金妻張氏

節婦馬世太妻王氏

節婦許碧妻周氏

節婦劉永金妻谷氏

節婦辛朝選妻李氏

節婦郭環妻李氏

節婦范湖妻周氏（以上錄節孝祠）

武庠生李國華之繼室李氏邑東南海山人年二十歲來歸國華性溫

和貞靜撫前妻所生遺子一遺女四如已出同治元年夫故氏年二十

六歲以柏舟自誓守志撫孤里人咸稱其賢嗣遺子故躬率孀媳楊氏
過度清白貞潔蓋數十年如一日焉卒年七十四歲計守節四十九年
李希謙之妻劉氏邑南關人劉俊臣之次女也性貞靜和順年十七爲
希謙室二十四歲夫故矢志守節始終無二奉孀姑以孝聞撫子女三
人長鴻魁次鴻恩遺腹女一均各成立女爲前清吉林伊通州知州王
榮昌室遺產薄田僅十畝餘賴氏以女紅勤儉度日現家道頗稱小康
殆氏之茹苦含辛有以致之現年六十九歲計守節四十五年

李希讓妻薛氏年二十來歸希讓二十四歲夫故矢志守貞生遺腹女
一撫養成立無子奉孀姑以孝稱現年六十四歲計守節四十年

王純源之妻梁氏邑西北大山台人年十九于歸純源二十三歲夫亡

守志不渝越二年姑逝其翁又續娶後姑生一子純昌翁尋沒氏與其後姑度日情同生母共撫夫弟純昌成立至四十餘歲始過胞弟純澤子之良爲嗣現年六十歲堪稱竹節松筠

陳永吉之妻王氏城北白家甸人年十九適永吉爲繼室二十六歲夫病故矢志守節而家貧無子翁姑年老因勸其嫁氏曰翁姑以無子故始過子娶媳今子亡媳再嫁二老將誰倚從此矢志靡他勤紡績以供菽水及翁姑相繼病故氏鬻簪珥殯葬後欲仰藥從侍地下遇救得甦人問其故氏曰翁姑沒吾事畢矣聞者皆淚下後不得已以遠族陳永萬子名殿魁者爲嗣殿魁農人粗識字義事之尤孝人咸謂節孝之報云邑紳咸嘉其節代氏請旌立碑於白家甸村北氏享年七十九歲弄

孫三人及病知死期含笑而終

董長生之妻王氏邑西南董家屯人年十五來歸長生性仁孝勤女紅二十九歲夫故以柏舟自誓守志撫孤初氏甫過門日爲兩大姑所聞未能得姑歡心一日命裁衣弗與剪請於其姑怒詈相向氏隱忍弗與較歸房自取剪裁成之以獻其姑爲二女所構送烟送茶故意不按甚至加以怒罵氏怡然受之侍立良久必待霽顏然後去而毫無怨心及姑臨終氏問所欲言姑徐曰汝平日能作家率兒度曰汝二姊家給人足吾無所怙念所最關心者汝大姊之孤苦耳汝善視之吾泉下瞑目矣言訖遂卒氏哀慟治喪盡禮先是其姑善蓄積遺金滿篋既葬兩大姑給氏以要事他往及歸兩大姑將其母所蓄金盡納包裹中瀕行以

二壯夫力扛猶不勝焉氏明知其伎倆以姑遺囑故殊不介意弗與較也從此銳意治家教子而外惟思以餘饒潤姊餽遺不殊曩時而大姊家道日落時來依母家生活刁難毒詈有時仍其故態時氏年已七旬餘髻髮頽白往往率諸婦暨諸孫婦侍立於側不去以平其怒蓋數十年如一日焉會大姑死氏爲營衣衾棺槨一從敦厚跡其生平行事知遵姑氏遺囑而不知有宿怨以忠恕二字爲圭臬但罪已而不罪人雖士夫無以加焉韓魏公有言惟父母不慈而子不失爲孝乃爲可稱若氏其庶幾乎惟當年旌表已請而無力建坊惜哉

梁國翰之妻穆氏夫故矢志守節奉姑教子僉稱孝慈艱苦備嘗始終不渝清同治十二年立坊於城西南十二里曹莊村東

趙智之妻孔氏青年守節撫孤成立含辛茹苦里黨賢之清光緒三十年立坊於城南六里頭台子村西（並詳本志古石坊）

蘇永利之妻李氏青年矢志始終完節清光緒十八年奉旨立碑於城西南九里二台子村西（並詳本志古碑額）

王節婦董氏城西南曲尺河堡人年十七于歸十九歲夫故僅遺一女過族人王忠義爲嗣現年七十四歲苦節五十餘年

朱節婦馬氏城西南曲尺河堡人年十九于歸二十七歲夫故現年七十歲苦節四十餘年

楊明之母楊張氏城西南望海甸人於二十二歲夫故現年六十六歲守節四十四年

于永和之母曹氏城西南烟台河人於三十歲夫故現年七十二歲守節四十二年

劉喜懋之妻孫氏城西南廠子溝人年十七于歸二十五歲夫故遺五歲子一苦守柏舟撫孤成立族黨賢之年八十九歲卒守節六十餘年現其家住宅尙有府衙門之稱以該氏守節時非至親不得入其門故也

李暢然之妻邢氏城北梁家窪子人年十七于歸二十九歲夫故矢志守節事翁姑以孝聞教二子以有方著里黨稱賢於民國十二年冬贈以竹節松齡四字橫額以表揚之現年七十三歲守節四十餘年

李福雲之妻滕氏城北下砬山人年十七于歸二十二歲夫故守志食

貧事孀姑以孝稱撫繼子如已出誓死靡他歷盡艱苦現年七十三歲
守節五十餘年

李春坡之妻魏氏城北下達子溝人年十七于歸二十六歲夫故矢志
柏舟孝養翁姑食貧無怨里黨賢之現年六十二歲守志三十五年

李夢庚之妻王氏城北下達子溝人年十七于歸二十六歲夫故安貧
守節孝養舅姑現年六十一歲苦節三十五年

丁作廣之妻谷氏城北丁家嶺人年十五于歸二十二歲夫故遺子女
各一家素貧氏矢志冰霜紡績度日教子有方至於成立現年六十五
歲守節四十餘年

劉鍾秀之妻陳氏城北白塔峪人年十九于歸二十一歲夫故無子孝

事翁姑撫育繼子勤紡績以度日鬻錢鈿以葬親卒年五十六歲守節三十五年

郟鼎之妻梁氏城西關人年二十二歲夫故矢志守孀敬事翁姑二十餘年始終如一鄉鄰欽其節孝清宣統元年九月奉旨旌表優予品重璇閨四字橫額現年七十歲守節四十餘年

張永豐之妻郭氏城西後王家屯人年二十九歲夫故矢志守孀食貧茹苦老而彌堅清宣統元年經本界紳董候選直隸州州判劉紹文等公舉節孝予以竹節松齡四字橫額卒年八十一歲

張慶鐸之妻石氏城西後王家屯人年二十三歲夫故矢志柏舟孝事翁姑三十餘年如一日鄉鄰咸稱賢孝卒年八十四歲守節六十餘

年

聶林之妻謝氏城西南李相屯人年十九于歸二十七歲夫故遺子二
奉養翁姑克盡孝道教子成立漸致小康現年七十二歲守節四十五
年

劉順之妻張氏城西南馬蹄溝人年十七于歸三十歲夫故遺子一家
綦貧以紡績度日上事翁姑下撫幼子僉稱孝慈家道漸致小康現年
七十八歲守節四十八年

陳節婦晏氏城西南二台子人年十九于歸二十七歲夫故遺子二女
一敬事翁姑曲盡孝道教養均各成立鄉里稱賢公送節孝無雙四字

橫額以表揚之現年七十八歲守節五十一年

汪銀之妻薛氏城西南汪家屯人年十七于歸十八歲夫故青年矢志
孝事翁姑卒年七十五歲守節五十七年

佟金香之妻劉氏城西南楊樹溝人年十七于歸二十一歲夫故矢志
不貳節勵冰霜現年六十三歲守節四十二年

楊青林之妻劉氏城西南四間房人年十七于歸二十八歲夫故無子
矢志守貞撫繼子如已出家道清貧備嘗艱苦現年七十歲守節四十
二年

楊萬祿之妻孫氏城西南四間房人年十九來歸二十歲夫故青年接
處動守禮節人無間言現年六十二歲守節四十二年

張振芳之妻謝氏城西南吳家屯人年十九于歸二十九歲夫故遺子

二女一勵節松筠撫孤成立克繼家聲里黨以賢母稱之現年七十一
歲守節四十二年

馬廷舉之妻張氏城西廣糧堆人年二十一于歸二十九歲夫故退于
一矢志不嫁家貧以紡績度日上事翁姑下撫幼子僉稱慈孝現年六
十五歲苦節三十六年

趙鵬齡之妻曹氏城西披甲屯人年十九于歸二十五歲夫故矢志柏
舟家素貧以紡績爲生活撫繼子如己出鄉里稱賢卒年七十五歲守
節五十年

田萬金之妻魏氏城東關人性賢淑尙氣節年十七于歸萬金二十六
歲病沒氏年三十而寡生一女二子年俱幼家窶貧氏茹苦含辛矢志

不二姑老多病侍奉維謹然生計艱難惟恃紡績針黹度日雖饗殮不給衣服不完晏如也姑沒後家人暨母族咸勸其嫁百計陳說氏心如鐵石終不爲動教育子女苦守柏舟現年七十計守節四十餘年長子學成次子學周年俱四十餘在外經理商業克自樹立家道小康人皆謂天之報施節婦者爲不爽云

祖文璽之妻武氏邑人武悅桐之女也幼讀書頗知大義有同胞弟若妹共九人凡提携縫紉氏輒挺身任勞父母甚利賴之年二十一于歸時翁已沒事姑以孝聞翌年其夫溺河死氏撫屍慟絕及甦屢欲觸棺飲瀟自殉因衆救不果最後氏父武悅桐以義宜孝姑延嗣相勗從此竭力事姑撫夫兄子廷恩爲繼子如己出氏年三十六歲時氏母病革

歸侍湯藥者月餘及沒痛不欲生以姑老子幼不能廢離遂喪葬盡禮而返尋氏父病重歸侍一如母病時並焚香祝天願減己算延親壽父病果愈此舉雖近迷信然至性愚誠不可及也越數年姑病氏則夜不交睫者數十日而姑始沒以此積勞形瘦骨立年五十一遂沒跡其生平事蹟孝行節義有足多者殆所謂無愧倫常者歟

王汝舟之妻錢氏城西南三間房人年十九于歸二十四歲夫故青年矢志白頭不改壽七十三歲卒守節五十餘年

王汝欽之妻張氏城西南三間房人年二十一于歸二十四歲夫故六十九歲卒守節四十餘年歷盡艱苦垂老霜操彌堅

石金之續妻陳氏城南朱家屯人年二十三于歸二十五歲夫故守節

事翁姑以孝聞撫一歲子如璋至於成立爲清增生度日節儉漸致小
康壽五十八歲卒

姚世成之妻楊氏城南朱家屯人年十九于歸二十歲夫故守節事姑
克盡孝道撫嗣子以慈著鄉里稱之壽五十歲卒

楊麗堂之妻姚氏城南朱家屯人清貢生姚士璵之女年十七于歸三
十歲夫故有子方二歲矢志守節子歿又過孫以延宗祧勁節不渝現
年八十歲

陸鳳山之妻趙氏城南朱家屯人年十九于歸二十七歲夫故矢志守
節孝事翁姑教育繼子人稱完節壽五十六歲卒

張正永之妻李氏城南朱家屯人年十七于歸十八歲夫故立志守節

家綦貧勤針指以奉事翁姑撫養繼子尤善醫小兒病里人德之壽七

十三歲卒

聶信之妻劉氏城北雙樹堡人年十七于歸二十三歲夫故守節教子

有方務勤儉以成家業於六十二歲卒鄉里僉稱賢婦

侯德發之妻王氏城東南關人年十九于歸二十三歲夫故矢志柏舟

事姑教子以孝慈著卒年六十七歲守節四十餘年

劉振舉之妻牟氏下長茂河人年二十二歲先於十七歲歸劉氏平日

孝事衰翁伉儷甚篤十四年五月十八日晚九時適駐興三十九旅八

十六團一二兩營以俘虜改編之軍隊六百八十餘名鳴鎗譁變連夜

向城北逃逸翌晨日出時抵該村逃兵入劉氏院者四有至該氏室者

豔氏年齡突起淫念遂其翁外出氏恐被污亦奪門出逃兵以未遂其所欲忿鎗擊之彈由背後穿小腹出本村聞耗鳴鐘聚衆逃兵遂相率逸去迨其夫回家看視該氏已氣息僅屬仍口述與逃兵拚死抵抗情形遂絕夫鎗逼之下何求不遂該氏以青年幼婦竟能不爲威怵致命全貞其節操堅定洵過人矣

吳文著之妻郝氏城西北四十里小山台村人年十七于歸二十二歲夫故操凜冰霜鄉里賢之卒年六十七歲守節四十五年清同治年間請旨建坊旌表（並詳古石坊）

周伯之妻楊氏城西三十里周家屯人年十七于歸十八歲夫故茹荼捋苦誓不二志守節五十餘年清光緒十五年氏年六十二歲奉旨建

坊旌表

徐亮之妻張氏城西北十八里榆樹林村人年十七歲于歸二十七歲夫故遺子一孝事孀姑慈育幼子現年六十七歲苦節四十年

傅連陞之妻馬氏城西三十里古城子人年十七于歸二十六歲夫故遺子一家貧以針黹度日撫孤成立現年六十六歲苦節三十九年

李景元之妻馬氏城西三十里周家屯人年十七于歸二十二歲夫故遺子一矢志不嫁撫育幼孤至於成立現年八十三歲守節六十餘年

張永貴之妻王氏城西北三十里馬溝屯人年十七于歸三十九歲夫故子一家貧以紡績度日以耕讀教子卒年八十三歲守節四十餘年

李勤之妻張氏城西北三十二里廟溝屯人年十七于歸二十二歲夫

故節勵冰霜始終無間卒年八十二歲守節六十年

周連雨之妻張氏城西北四十里舊門屯人年十七于歸三十四歲夫
故子一矢志柏舟垂老不渝卒年七十四歲守節四十年

王國相之妻趙氏城西北四十里舊門屯人年十七于歸二十九歲夫
故遺子女各一矢志堅貞撫孤成立卒年六十七歲守節三十八年

王連舉之妻張氏城西北四十里舊門屯人年十七于歸二十六歲夫
故子一勁節不渝撫孤成立卒年六十四歲守節三十八年

李萬有之妻侯氏城西三十里梁家屯人年十七于歸二十九歲夫故
遺子女各一教養成立皆有義方戚族額其門曰冰霜之操卒年九十

歲守節六十餘年

王永順之妻牟氏城西三十里東檢金溝人年十七于歸二十歲夫故
青年矢志茹苦終身卒年六十六歲守節四十餘年

劉德仁之妻王氏城西四十里黃家屯人年十六于歸二十九歲夫故
遺子一立志不嫁教育有方卒年六十六歲守節三十七年

楊德之妻劉氏城西三十里小楊樹屯人年十九于歸二十六歲夫故
堅持清節鐵石不磨現年七十歲守節四十餘年

榮緒之妻姜氏城西三十里邊壕子村人年十七來歸二十一歲夫故
遺子女各二家貧以紡績度日雖境處饑寒而貞一不二現年六十八
歲守節四十七年

何有連之妻劉氏城西三十里邊壕子村人年十七來歸三十歲夫故

遺子女各二事親教子咸盡其道現年六十九歲守節三十九年

榮自萬之妻王氏城西三十里邊壕子村人年十七于歸二十一歲夫故遺子二甘心茹苦撫孤成立卒年六十八歲守節四十餘年

李萬恒之妻程氏城西五十里大水泡子村人年十七于歸三十一歲夫故遺子二矢志撫孤貞行無二卒年六十八歲守節三十七年

劉張氏係武庠生劉仁輔之妻十七歲于歸次年夫故氏痛不欲生經伊母再三勸慰乃止自是矢志守節孝事翁姑歷三十四年如一日至光緒十三年八月姑故停靈七日仍守喪如儀遂絕粒食姑靈未出而逝隨姑入塋夫堂兄昭輔擬浼戚在京請旌以氏夫胞弟各貲中止邑人哀之

李步瀛之妻趙氏長嶺子屯人年十八于歸十九歲夫故遺前房子一甫晬撫養如己出翁姑相繼歿殯葬如禮家貧以紡績度日教子成立現年六十九歲苦節五十年

王國翰之妻馬氏城西南十八里後湖村人年十九于歸二十六歲夫故立志堅貞動循禮法卒年五十九歲守節三十三年

劉永湖之妻孔氏城西南十八里後湖村人於十二六歲夫故秉志貞潔人無閒言現年六十一歲節守三十五年

王國風之妻王氏名光增城西南後湖村人其夫王國風於清光緒二十一年外出迄今三十餘年未歸氏守志不移閭儀整肅現年已五十五歲於民國三年在本村設立女小學校教誨有方成績頗著鄉里咸

稱賢德

吳景安之妻姜氏城內人年十七于歸二十二歲夫故遺子一甫四月翁姑年皆六旬事老撫幼咸稱孝慈子名殿卿於氏年五十三歲時病故家綦貧氏與孀媳李氏紡績度日教孫森讀書數十年如一日現年六十八歲苦節四十六年

朱煥閣之妻劉氏城西南沙河所人年十七于歸十九歲夫故遺一女纔數月上事翁姑下撫弱女艱苦經營終無二志及翁姑病時氏親侍湯藥及歿喪葬以禮尤爲孝義兼全現年五十八歲苦節四十一年

王世榮之妻楊氏城西南三間房人年十七于歸十九歲夫故氏既無子女冰霜勵節始終不渝卒年六十九歲同治年間奉旨旌表

郭應麗之妻馮氏本城人年二十一于歸逮事翁姑以孝聞伉儷甚篤
僅七閱月又二日而夫故氏悲痛不已冰霜矢志以三門次子承惠繼
時方襁褓撫養如己出及七齡遂遣入學歷肄業於奉天興華書院天
津南開學校卒得北京中國大學商學士學位氏之素志以償卒年七
十二歲計守節五十年現蒙奉天省長莫援例題褒給予志潔行芳字
樣併獎給白綬銀質褒章

氏族

祖氏 其先世爲商祖己之裔晉以後世居范陽至鎮西將軍逖之少
子始流寓於滁歷數十傳至明有諱世榮字遠揚者於元至正十五
年佐明太祖起兵洪武六年改遼東行省爲衛所隨都督何世隆駐

定遼中衛是爲祖氏出關入遼之始卒贈承信校尉子二長興洪武
十八年設滁州衛所以功補總旗次忠建文四年陞正百戶承信校
尉永樂元年改調定遼中衛正百戶世襲忠子原承襲正百戶官承
信校尉追贈宣威將軍原子慶承襲正百戶官承信校尉宣德五年
改鎮寧遠衛遂家焉是爲祖氏居寧之始卒贈宣威將軍慶子二長
述寧遠衛正千戶正統八年追贈武節將軍次起正統九年襲正千
戶官武節將軍景泰四年陞寧遠衛指揮僉事封宣武將軍追贈定
遠將軍起子二長綱承襲指揮僉事宣威將軍追贈定遠將軍次純
追贈榮祿大夫綱子旺承襲指揮僉事宣威將軍陞指揮同知封定
遠將軍贈昭毅將軍純子鎮太學生命以十字名其子孫卒贈榮祿

大夫並誥贈少傅特進光祿大夫右柱國旺子武官遊擊指揮使掌

印封昭毅將軍鎮子三長仁性嗜飲有大志見族人貧困者必周濟

之解推不吝萬歷間誥贈榮祿大夫崇禎三年誥贈少傅特進光祿

大夫右柱國次義誥贈昭毅將軍三禮誥贈昭毅將軍武子承大承

襲指揮同知廣寧右屯衛防禦封定遠將軍仁子三長承祿未仕次

承訓明萬歷間官遼陽副總兵左軍都督府三承教任寧遠指揮僉

事兼中後所遊擊義子承業明神宗時累官指揮同知誥封定遠將

軍承大子大松官指揮同知封定遠將軍承訓子三長大壽明萬歷

間官提督遼東關寧十三營官軍掛征遼前將軍印左軍都督府後

以恢復瀛永功加少傅次大弼明萬歷間官陝西寧夏總兵掛平西

將軍印左軍都督府加太子太保三大成明萬歷間官叅將承教子
二長大定襲指揮僉事官至遼東寬甸營叅將誥贈太子少保次大
樂官至遼東前鋒營東協副總兵承業子四長大榮承襲指揮同知
誥封定遠將軍次大助累官至都司指揮僉事誥封宣威將軍三大
培明懷宗時累官陝西靈州叅將誥封昭毅將軍四大眷承襲指揮
僉事提標都司清太宗時拜他喇哈番世職大賢承功子甯遠衛武
庠生累官至遊擊大民甯遠衛學庠生庚午選貢明懷宗時累官河
南歸德府寧陵縣教諭陞鳳陽府天長縣知縣大明承惠子明熹宗
時官陝西寧夏叅將陞鎮標副總兵誥封定國將軍大松子澤濬廕
監生官廣東新惠縣知縣又任從化縣知縣大壽子六長澤溥明崇

禎間官陝西經略中軍副總兵清任御前一等侍衛順治間官山東

總督康熙間官福建總督次澤淳明崇禎間任錦衣衛指揮同知清

任御前一等侍衛又正黃旗副都統三澤清康熙間官廣東高州總

兵四澤深清康熙間官江南淮海宣府口北江南松常湖廣荆南各

道五澤汪清康熙間任戶部河南司員外郎六澤浹清康熙間充正

黃旗佐領大弼子二長澤潛清順治間進士官至浙江提學暨河南

督糧各道次澤溶清康熙間舉人官至江西南康府知府大定子三

長澤洪襲指揮僉事官至遼東平彝營副總兵清順治間任吏部左

侍郎兼纂修實錄館總裁次澤沛明崇禎間官參將三澤遠明崇禎

間官遼東杏山營副總兵清崇德間任禮部侍郎順治間加平南將

軍鎮守杭州尋提督江南官至川湖總督兵部尙書加太子少保大

榮子澤裕明懷宗時承襲指揮同知大眷子澤原清世祖時拜他喇

哈番世職官副都統大民子澤宜明宏光間恩貢清世祖時任浙江

嘉善縣縣丞大明子澤浯清康熙年間由廕生任廣東龍門縣知縣

順天武清縣知縣陞河南彰德府同知雲南沅江府知府澤盛大貴

子明懷宗時累官至都司授三品服俸清世祖時誥封資政大夫澤

厚大貴子清世祖時任陝西固原遊擊直隸朔州參將江南寧國府

參將廣東惠州府副總兵澤濡大錫子清聖祖壬子科武舉任廣東

瓊州守備澤裕子建韓清康熙間官湖廣竹山營把總澤源子建德

清世祖時官鎮江駐防驍騎校澤盛子二長建衡清順治丙戌歲貢

生初任山東兗州府金鄉縣知縣歷任福建按察司廣西布政司順

治十七年卒於官欽賜御祭康熙年間入祀福建名宦祠次建極清

世祖時任鑲黃旗佐領陞參將福建副都統澤浯子良屏清康熙間

任河南舞陽縣知縣凡十有二代簪纓不絕按其譜牒分流別派又

有所謂遼東北宅一支者斷自九世始九世祖承忠明代審遠衛正

百戶傳至十一代澤潤明懷時官遼東招練營副總兵清太宗賜一

品服俸世襲澤潤清順治辛卯舉人壬辰進士官山西隰州知州四

川達州知州廣西梧州府知府福建鹽運司澤茂清順治戊子考貢

官福建南安縣知縣澤潤子四長植柏清初官陝西白河縣知縣戶

部員外郎正黃旗佐領次植棟清正黃旗佐領三植松清世襲一等

侍衛正黃旗副都統四植桂清二等侍衛植桐世臣子清監生任山

東朝城縣知縣陞陝西慶陽府同知植春世祥子清鑲白旗叅領陞

副都統植檜世祥子清鑲白旗叅領陞陝西駐防副都統澤闕子二

長建樞清廕生官順天南樂縣知縣湖廣岳陽縣知縣次建藩清正

黃旗廕監生官四川建始縣知縣澤茂子二長良佐清廕生浙江駐

防防禦次良籌清佐領陞參將植棟子允圖清正黃旗廕生官陝西

綏德州知州刑部江南司員外郎戶部雲南司郎中江南龍江關抽

分山東兗州府知府陝西督糧道良籌子允休清乾隆癸酉舉人候

選知縣至此凡傳十三世家稱列戟里著鳴珂爲本邑世族之冠今

子其孫在籍者多業農商尙稱小康

張氏 其先世肇基青陽諸族散處歷漢迄明千餘載傳至諱留注者

始以指揮同知由上蔡移廣寧從此世守弗替是爲張氏之始祖留

注以下世及斌玉敬昇表凡六傳俱應顯秩表子鳳儀官參將鳳儀

子九思官薊遼參將九思子應种世襲都指揮同知陞遊擊將軍擢

山海關叅將調寧遠衛叅將改開原左叅將陞副將誥封定國將軍

子士彥字東越生而奇嶷器識英睿值遼陽失守清太祖武皇帝延

攬英雄士彥仗劍以從官驃騎將軍管佐領事累晉秩都堂世襲阿

達哈哈番子三長朝麟字溫和世襲三等阿達哈哈番陞一等阿達

哈哈番兵部職方司郎中累陞一等阿思哈尼哈番管副都統事都

察院左副都御史戶部左侍郎江西巡撫加宮保銜陞江西總督福

建總督太子少保兵部尙書兼都察院右副都御史正一品次朝瑞

字祥如河南登封令補授山東道監察御史巡按湖北三朝珍字玉

如由刑部他齊哈哈番陞工部啓心郎歷拖沙喇哈番加拜他拉布

勒哈番督捕右理事管佐領參領事提督操江巡撫安徽池太廬鳳

廣滁等處加工部尙書巡撫湖廣等處地方提督軍務兼理糧餉兵

部尙書都察院右副都御史正一品朝璘子長聖碩字子厚官巡視

中城監察御史管佐領事次聖弘字子遠恩廕授湖廣岳州府澧州

知州三聖謨字子顯恩廕官大理寺寺正四聖弼字子良恩監候補

主事五聖詔字子明恩監候補大理寺寺正朝瑞子長聖清恩廕候

補主事次聖錫恩廕候補同知朝珍子長聖猷字嘉侯恩廕大理寺

左寺正刑部廣東清吏司員外郎次聖經廩膳生候補主事三聖佐
四聖簡均太學生候補同知五聖德六聖敬均太學生候補知縣今
傳十餘世

柏氏 其始祖世居江南自四世祖本二公於明洪武四年調撥遼陽
五世遂居關東按其家乘亦斷自五世肇修焉五世祖真以下世代
相傳經旺浩英瑾鳳凡六代均襲父職廕指揮使旺與鳳更晉封將
軍至於朝用朝勳朝楣朝瞻朝重朝忠於次序爲七代於譜牒則爲
十一世祖朝用子世爵官參將誥贈榮祿大夫勅封鎮國將軍子二
長永馥初授他喇布勒哈番晉一拖沙喇哈番清順治三年署四川
永寧總兵後因殺賊搖黃等有功加左都督八年實授總兵官康熙

三年由陝西西甯總兵陞本省平涼提督次永慶未仕永馥子二長

天祐世襲阿達哈哈番康熙十六年隨征開府廣東補授虎頭副將

協理總兵事務三十九年管佐領事務次天儲由侍衛管佐領順治

十八年出征永利在湖南陣亡贈一拖沙喇哈番入祀忠臣廟天祐

子三長遐年世襲三等阿達哈哈番署佐領次堯年康熙十三年由

監生吏部考授州同三嵩年由監生中式康熙庚子科武舉効力漕

標襲三等阿達哈哈番遐年子之瑞文庠生永慶子天成溫州營遊

擊天成子嵩琪康熙五十九年官鄧州知州誥授奉直大夫嵩琪子

之芬文庠生朝勳子世桂選貢授教職子二長永年文庠生次永吉

未仕子天魁官遊擊將軍天魁子二長成棟次成樑成棟字懋貞初

任河南彰德府磁州知州陞吏部員外郎刑部郎中任陝西寧夏道
隨征噶爾丹有功補授江西九江道子之著陝西延安府安塞知縣
縣候補河南汝寧府羅山縣知縣成樑子二長之謨江南鳳陽府蒙

城縣知縣後任河南南陽府葉縣知縣調海豐縣知縣次之蓋順天

府儒學生員有集唐宮詞一册行世朝楣廕正千戶子世泰官指揮

僉事朝瞻子二長世香邑庠生次世傑歲進士官山東教諭世傑子

永麟文庠生朝重子世魁未仕子二長永清官指揮使次永元江西

總督標下左營副總永清子天擎官副將鎮守江南溧陽句容高淳

三縣陞廣西桂林府永寧州副總兵子騰霄又庠生清世祖恩賞癸

卯科舉人以知縣選用朝忠子世蕃未仕子二長永蔭官都司次永

鎮官副將永鎮子天植授山東登州營副總子成桂由刑部筆帖式任四川保寧府通判今傳十餘世子孫繁衍皆務農商

李氏 其先世居山東壽光後遷德平傳至四代祖熙字子明於清乾隆七年始出關抵寧遠遂家焉又二傳至永清字際泰子四長馥字

潤庭六品職銜次需字豐年三榮字向春四馨字香侯均誥封奉政

大夫需子國樑字雉山從九品職銜誥封奉政大夫子四長如藻字

文言貢生捐納縣丞清同治八年投效陝西將軍庫克吉泰營中奏

保賞戴藍翎試用知縣籤分直隸次如芝字瑞庭附生光緒元年孝

廉方正歷任河南寧陵永寧等縣知縣另有傳見耆舊三如藩字猷

庭武庠生四如霖字文溪太學生宣統元年孝廉方正子奎閣歷充

本縣各校教員受有教育廳一等褒狀如藻子麟閣字小言歷任河南商邱伊陽等縣知縣另有傳見耆舊如芝子葆臣字穉瑞歷充河南陝縣承審員信陽縣推事榮子四長國風字光明號仙洲任直隸順德府府經歷保陞知縣任沙河唐山邢台萬全等縣知縣另有傳見耆舊次國棟業儒三國重四國柏均未仕國棟子二長毓楨字子才歷任直隸滿城贊皇隆平等縣知縣另有傳見耆舊次維楨字文孚貢生子樹聲附貢歷充直隸陸軍二十三師書記官餘見選舉馨子國柱字砥齋武庠生子賡唐字月秋另有傳見隱逸子二長慶麟次陰麟皆讀書未成名至今傳十世書香不絕

潘氏 其先世爲浙江山陰縣籍世爲刑幕由清順治末年避難至甯

遠甯遂家焉傳若干世（因無譜牒不可考）至名玉堂者嘉慶戊寅

舉人任直隸柏鄉縣知縣子二人長履謙歲貢生任直隸香河縣訓

導次履泰歲貢生候選訓導履謙子一人承曾附生承曾子二人長

崇麟附生曾充州署統計處調查員次崇琦附生曾充本州巡警局

總董履泰子三人長希曾附生次憲曾由河南候補府經歷保陞知

縣旋升知州指分山西候補賞戴花翎三嗣曾附生子翌坤補山西

托克城巡檢署五原廳同知玉堂之堂弟玉書歲貢生子二人長履

恒道光丁酉拔貢歷任直隸文安武清邢台等縣知縣官至平泉州

知州次履豐道光癸卯優貢任湖南新化縣知縣無子履恒子二人

長拱辰歲貢生任直隸河防北六工州判次丙辰附生任雲南霑益

州吏目後失蹤至今傳五世

興城縣志卷之十

古蹟

古山川

古州縣

古城堡

古衙署

古祠祀

古石坊

古亭臺

古墳墓

古浮圖

古碑額

古橋梁

古驛站

其他古蹟

興城八景

興城縣志卷之十

古蹟

滄桑迭變代謝有時惟德不朽可以詠思墩號謝公碑稱叔子遺
愛永留名譽不死功成而退像鑄黃金君子之澤感人者深禹穴
會稽文章發展奇氣弗存無益遊覽述古蹟

從來名宦釣遊去思最永聞人泥爪襲弄尤珍故棠詠召公人猶愛樹
柳稱補闕政紀利民燕人立爨公之社總是銘恩齊國建石相之祠無
非戴德至若壁上題詩擱筆每因崔顥額間醉墨神助幾類張顛歲月
如流人琴增感是篇遠溯前徽博徵往迹廿四史之舊聞尚在五千年
之芳躅猶存世驚桑海之遷人切榛苓之慕而讀韓陵之片石可訂知

音過江都之遺墳彌深崇拜已

古山川

三首山 即今之首山距縣城東五里界於七八兩區之間三峰相峙

狀若人首其上有泉下注東南流八里入海層巒疊翠屏蔽城東山

北峽有廟曰朝陽寺面海倚山青松四合昔人詩有松張翠蓋封山

面海湧銀濤對寺門之句即詠此寺也戰國時燕太子丹避秦兵於

桃花島秦將李信屯兵於首山（見列國志）俗乎首山有由來矣近

年植樹節縣知事率各界領袖種樹於此山之麓二十年外可望成

林考後漢書地理志遼西郡柳城縣有馬首山晉書慕容皝遣封奕

率騎潛於馬兜山注馬兜山疑即馬首山兜與首音相似盛京通志

按史稱故柳城在直隸永平府西則馬首山確非首山無疑（綱鑑

易知錄

螺峯山 即今之窟窿山距縣城水北五里界於七八兩區之間鄉中父老相傳明將金國鳳父子俱死於此山按明史崇禎十二年十月清兵復攻寧遠金國鳳以松山塔山之役已擢爲寧遠總兵官憤將士懼怯率親丁數十人出據北山岡鏖戰移時矢盡力竭與二子俱死似此北山岡殆即窟窿山之古名歟盛京通志清太宗天聰元年夏五月癸巳率兵攻明至甯遠城北關太宗諭以逼近城垣難於縱擊可稍退以觀動靜於是退軍踰山岡及大敗明軍又還駐雙樹堡按今雙樹堡在窟窿山之東麓里餘以此攷之北山岡即今之窟窿

山更無疑義

高黃山 即今之九窪山距縣城西北二十五里山之下有塔矗起邑

中八景九窪烟塔其一也山中所產藥材極多土人頗利賴之

懸峯山 即今之石湖山一名黑峰山距縣城西二十五里現屬第二

區境內其山峽間有石廣約數尺外高中窪彷彿湖泊上有泉水注入故名形勢天然不假斧鑿亦一奇也山有古寺僧人住持於此惟邇來青紗帳起輒爲票匪出沒盤踞之地以致幽險難探奇景莫賞良可概也

桃花島 俗呼大海山即覺華島古稱桃花浦距縣城南三十里係兩

端寬闊中間狹細形勢孤懸海中證諸史冊即戰國燕丹避秦之桃花島亦即明末祖大壽兵敗逃匿之地石洞土壘古蹟猶存或稱菊

花島波翻浪滾雲水蒼茫濤湧潮流叫吼不息土人出入駕一葉之扁舟凌萬頃之茫然驚風駭浪無如何也其間惡山怪石平原無幾土壤礪薄海風凜冽因而民多蠢陋歲鮮豐收所賴生活半資漁業其略可稱村者僅城子裏嶺西屯雷家屯三處不過數十戶餘或獨立門戶或二三比隣非依山爲巢即傍水築室蓋猶有古風焉歷來官府亦視爲特別區域以致警學保甲調查戶口諸要政概付闕如亦良可惜也是在有心政治者提倡而振興之開風氣於海角化愚昧爲文明其庶幾乎本邑鄉土志覺華島俗名海山在城南海中距北岸釣魚台十八里距城三十里島之南坡有九頂石一座內係土洞相傳有九石柱頂一板石今只剩石柱三根島之東面有大悲閣

一座閣之東南有八寶琉璃井一面此井係用石條砌八角形故名
井之南蓋以大板石迤南有唐王洞四圍均係板石砌成相傳唐王
征東時曾駐蹕於此大悲閣下大石上有窟如盆形俗呼爲淨水盆
島之西南有石佛寺島之東北約二十里許有古石頭城相傳名曰
唐王城潮漲則城形微露潮退則全城俱顯每逢往來之船無不越
此石頭城也（新唐書地理志）登州東北海行過大謝島龜歌島
烏湖島三百里至都里鎮二百里東傍海壩過青泥浦桃花浦杏花
浦（金史地理志）興城縣有桃花島（通志）按桃花島即桃花浦
明初海運泊船於此今在寧遠州城南按以上各說考之當以桃花
島之名爲最古云

六州河 俗名六股河城西南七十九里源出邊外自高台堡東十里南流入州境繞中後所城（今改綏中縣城）南流入海名六股河明一統志自大甯等六州之水合流入南故名（盛京通志）今爲興綏兩縣之界限有如鴻溝焉

湯沙河 城東一里餘一名姜女河自火燒門山發源南流遶城東合女兒河（盛京通志）按此距離方向似即今東門外之護城河但向無湯沙姜女之名稱想係代遠名湮之故歟姑錄之以備考

古州縣

柳城郡 秦置縣屬遼西郡（漢書地理志）遼西郡柳城縣西部都尉治（十六國春秋）慕容皝以柳城之北龍山之南福德之地也

使陽裕築龍城構宮廟改柳城爲龍城縣九年遷都龍城十二年號

新宮曰和龍宮（魏書地形志）營州治和龍城大延二年爲鎮眞

君八年並柳城屬焉（隋書地理志）遼西郡舊置營州開皇初置

總管府改龍城縣爲龍山十八年改爲柳城大業初府廢置郡（舊

唐書地理志）武德元年改爲營州總管府七年改爲都督萬歲通

天二年爲契丹李萬榮所陷神龍元年移府於幽州界開元四年復

移還柳城八年又往就漁陽十一年又還柳城舊治天寶元年改爲

柳城郡乾元元年復爲營州領柳城一縣室韋靺鞨並在東北遠者

六千里近者二千里西北與奚接界北與契丹接界（遼史地理志

）中京道興中府本漢柳城縣地唐營州都督府後爲奚所據太祖

平奚乃完葺柳城號霸州彰武軍重熙十年升興中府治興中縣金
因之元至元七年降爲興中府屬大寧路又按土默持右翼西有柳
城據此似不應以柳城入錦州郡古蹟但隋唐時柳城郡所隸甚廣
寧遠實爲柳城郡地是不得以故城在外遂缺而不誌也（見盛京
通志）漢熹平六年遼西太守趙苞到官遣吏迎母道經柳城（注
故城在永平府西）又晉咸康七年燕築城於柳城注故城在直隸
永平府西）之北龍山（注亦在永平府西）之西立宗廟宮闕命曰
龍城（見綱鑑易知錄）據以上諸說可瞭然於柳城之所在及屬隸
之至廣矣

和州 在寧遠州北一百二十里（元史地理志）初置和州屬大甯

路至元五年併入利州爲永和鄉按利州遼統和十六年置金因之
在今邊門口外（盛京通志）

瑞州 在甯遠州西南一百三十里唐貞觀十年以烏突汗達干部
落置威州於營州境後改瑞州又置來遠縣爲州治後廢（遼史本
紀）太平元年於來遠縣地置來州歸德軍領隰潤二州治來賓縣
金天德三年改爲宗州明昌六年改縣曰宗安泰和六年以避諱謂
本唐瑞州地復改瑞州領縣曰瑞安海陽海濱元省縣入州明洪武
二十二年改置廣寧前屯衛西至山海關六十里南至海二十里北
至邊二十五里西北至大甯衛三百七十里城周五里有奇門三清

康熙二年併入甯遠州（盛京通志）今分隸綏中縣

興城故縣 在寧遠州南（遼史地理志）本漢海陽縣地聖宗置

巖州保肅軍治興城縣屬錦州金皇統三年州廢以縣屬興中府元

省（全遼志）興城縣在寧遠城南四十里海中覺華島考金史縣

有桃花島今州南十五里海中桃花島上故址猶存 按遼志謂本

漢海陽縣地今考漢海陽唐時爲馬城縣遼改置望都縣在今直隸

永平府界不在此也（盛京通志）

海濱故縣 在甯遠州西南前屯衛城西本慕容皝所置集寧縣地（

遼史地理志）聖宗置隰州平海軍又置海濱縣爲州治金初封遼

主天祚爲海濱侯皇統三年州廢以縣屬瑞州元省明初置山海關

東遞運所（明一統志）海濱廢縣在廣寧前屯衛西八十里 按

遼志隰州所領爲海陽潤州所領爲海濱金志則謂潤州所統者海陽隰州所統者海濱二史志互異據松漠紀聞潤州西去平州一百四十里以道里計之當在舊榆關東今山海關西（全遼志）載海陽縣在前屯城西一百一十里其地亦在山海關西（明一統志）亦以海濱縣爲隰州治當從金志爲是（盛京通志）

古城堡

南古城 在城西三十五里周圍二百十六步門一建置年月無考
海防五城 在城南二里二百四十步周圍一百九十八步門一其二在城南四里半周圍一百九十八步門一其三在城南五里周圍一里一百步門一其四在城南六里二百八十八步周圍一百九十八

步門一其五在城南九里一百八步周圍一百五十八步門一以上五城皆明太監高起潛請建儲海運糧石於此今俱廢城圯

曹莊驛城 在城西南二十里週圍一里一百二步門一明時設驛於

此並築城防衛今裁

中右所城 在城西南三十里即沙後所城明宣德三年建週圍三里

七十二步門三東曰永和南曰南薰西曰右定今城圯池淤

東關驛城 城在西南六十里週圍一里二百五十二步門一明時設

驛於此並築城防衛今裁驛南曰三里橋村北曰望海甸村又西南

曰團河屯

北古城 在城西北三十里週圍一里一百二十步門四建置年月

無考

雙樹堡 在城東十八里周圍二里門二清天聰元年五月太宗率

兵迎擊明援兵於霧遠明兵大敗是日清軍還駐雙樹堡即此（土

址今圯）

楊安堡 在城西十二里周圍一里門一

團山堡 在城西三十里周圍一里七十二步門一

仙靈寺堡 在城西四十里周圍一里門一

黑莊寨堡 在城西五十里周圍二百八十八步門一

劉彥章堡 在城西七十里周圍一里門一（俗呼牛彥章）

鎮邊堡 在城北十八里週圍一里門一俗名寨兒山堡

鹽場堡 在城南二十五里週圍一百二十四步清太祖高皇帝辛

酉年征明撫降之設汎焉（汎久裁）

曲尺河堡 在城西南四十八里週圍二里四十四步門一

灰山堡 在城東北二十里週圍一里三十六步門一

興水縣堡 在城西北十八里週圍一里十四步門一南關廂三百八

十步（俗呼清水縣）

正安堡 在城西北二十里周圍一里二十步俗名白塔峪清太祖

高皇帝壬戌年征明撫降之以上諸城堡皆竄遠駐防分汎地（以

上城堡具見盛京通志）

古衙署

廢廣寧衛署 在寧遠州城內明宣德二年置全遼志衛與古瑞州錦

州接壤本廣甯前屯中屯二衛地永樂初大寧淪沒而虹螺山始入

外境於是利州之墟荆條之陽戎馬馳驅歲相抄掠總兵巫凱都御

史包懷德上狀乃割二州之地於曹莊湯池之北建衛治賜名寧遠

統五千戶所又於城東五十里別置中左千戶所於城西南三十里

小沙河別置中右千戶所今俱廢（盛京通志）

儒學公署 在學宮東內宅六間書房三間儀門大門各一座清乾隆

九年建（今改教育公所）

吏目公署 在城內西南隅路北大堂三間住房九間書吏房二間儀

門一間大門一間清乾隆三十九年增建書房三間（今圯舊址奉

省令拍賣

佐領公署 在城內西南隅（今圯廢以上各衙署俱見盛京通志）

古祠祀

社稷壇 在城東門外雍正十二年建

風雲雷雨山川壇 在城東門外雍正十二年建

先農壇 在城東南四里正殿三楹東西廡二楹大門一楹雍正五年

建

土神壇 在城西門外正殿一楹

厲壇 在城西門外（以上諸壇今俱圯沒無考）

城隍廟 在城西北隅正殿三楹配廡六楹香亭三楹大門三楹建於

明正統間嘉靖年重修（後經迭次重修俱有碑記可考）

土地祠 在州治大門內東偏正宇一楹（今廢）

忠義孝弟祠 在學宮內正宇三楹雍正九年建（今改鄉賢名宦各

祠）

曾公祠 在城內明巡按曾銑定邊卒之亂土人德之建祠碑僅存（

今俱湮沒）

金公祠 在北門內祠宇三楹今廢按寧遠舊志姓氏無考

按金國鳳於明崇禎十二年十月陣亡於寧遠北山岡明懷宗賜祭
葬有司建祠見明史本傳則此祠之爲金國鳳建可無疑義故附錄

之

楊公祠 在城內明時爲楊維藩建有許國碑記今祠址已廢

線公祠 在城內明時爲線補袞建今祠址已廢維藩補袞俱入忠孝

祠

節孝祠 在學宮西正宇三楹雍正五年建（詳見人物）

迦佛寺 在城內東北隅今廢

新安寺 在城內東北隅今廢

福德庵 在城內西北隅今廢

永壽庵 在城內西北隅今廢

觀音庵 一在城內中街正殿三楹大門一楹一在城東北十八里雙

樹鋪正殿三楹大門一楹（今俱廢）

馬神廟 一在城內今廢一在城北門外西偏正殿三楹佛殿三楹配

廡六楹大門三楹（後改修無極宮今已查封現縣立第四小學校

開辦於此

延壽庵 在城東門今廢

文殊庵 在城東門今廢

風神廟 在城南門今廢

甘露庵 在城南門今廢

彌陀寺 在城北門今廢

保安寺 在城北門今廢

青龍寺 在城東南三里今廢（以上諸祠祀俱見盛京通志）

龍神祠 在城東三里許俗呼龍王廟地勢隆起樹木陰翳東倚首山

南望大海爲夏日避暑佳境其西軒如舫形窗牖洞開涼陰滿座遠

山排闥送青胸襟爲之爽豁每逢伏暑文人學士率多携酒往遊於

於此俗曰賞青其間名筆題額甚多（詳見碑額）創建年月已無考

惟於嘉慶四年經州牧劉大觀重修時增建廊廡以便遊人憩息碑

記猶存正殿右側現供有劉大觀泥塑肖像相傳公重修此祠時工

人素感其德政因於工作之暇私塑公像以誌不忘置於正殿梁間

而他人未之知也嗣因拂掃殿堂乃得而供奉之按公知本州事時

在嘉慶初間迄今百餘年而儀容宛在瞻拜之下猶覺凜凜有生氣

焉爰附錄之一以見德惠之及人一以見民情之愛戴矣

石佛寺 城西十二三里許老邊村南山勢嶽崎嶇悉含畫意巔下

山石秀拔遠視如之老僧跌坐頭頂胸腹臂肘歷歷可數宛若削成

俗名石佛山土人因建寺其旁名石佛寺又名清聖宮亭台高聳花

木陰翳每當夏季林泉風景可與城東之龍神祠並稱避暑佳境焉

龍宮寺 俗呼大悲閣在城南三十里海中之覺華島（俗名大海山

）東南隅創自大遼圓融大師有明天順四年重修碑記可考居覺

華島八景之一

古石坊

祖氏石坊 在城裡南街其坊有二由南門起分頭道二道各四層頭

道坊頂有小石塔一因與二道坊齊皆高三丈六尺頭道南面第一

層豎額玉音二層橫額忠貞胆智三層四世元戎少傅四層誥贈曾

祖榮祿大夫提督遼東左都督少傅祖鎮誥贈祖榮祿大夫提督遼

東左都督少傅祖仁誥贈父榮祿大夫提督遼東左都督少傅原任

遼陽協守副總兵左都督僉事祖承訓欽差經理遼東掛征遼前鋒

將軍印總兵官左都督府左都督少傅祖大壽北面第一層豎額同

南二層廓清之烈三四層同南二道南面第一層豎額玉音二層橫

額登壇駿烈上款崇禎戊寅歲次仲秋吉立下款巡撫遼東兵部左

侍郎方一藻題三層誥贈榮祿大夫援勦總兵官左軍都督府左都

督祖鎮誥贈榮祿大夫援勦總兵官左軍都督府左都督祖仁誥贈

榮祿大夫援勦總兵官左軍都督府左都督祖承教特晉榮祿大夫

援勦總兵官左軍都督府左都督祖大樂四層無字柱聯桓糾興歌
國倚干城之重絲綸錫寵朝隆銘鼎之褒北面第一層豎額同南二
層橫額元勳初錫上款同南下款整飭寧前兵備左參政蔡懋德題
三層同南四層同南柱聯松檟如新慶善培於四世琳瑯有赫賁永
譽於千秋坊下爲舊魚市（今移南門甕圈）坊峽墜石在焉據父
老傳言於清道光年間魚販高雲步因賣青魚昧心宣誓被房石墜
下壓斃自此本邑青魚不再見迄今近百年矣按此說雖屬不經而
實蹟猶存殊覺有關風化焉因附錄之或可爲神道設教之一助云
貞節坊 一在城西南六里頭臺子村西爲趙智妻孔氏之坊聯云
處生男艱苦撫弱孤成立青年守節德徽樹巾幗典型一在城西南

十二里曹莊村東爲梁國翰妻穆氏之坊聯云恤悌敬始明大義撫
叔教子振綱常一在城東北二十里老和尚臺村爲姚法珠未婚妻
賈氏之坊聯云未出閨門明大義可爲巾幗作坊型一在城西北四
十五里小山台村爲吳文燿妻郝氏之坊其聯有四一壺範莊嚴履
冰式玉國恩優渥表里旌門一勒石紀芳型直如前代陶歐垂名不
朽建坊昭大節猶望少年巾幗着意來看一守節自青年閱盡菊霜
梅雪請旌邀紫誥來看鳳綵龍章一風雷守護石常在松柏蕭森木
亦貞橫額陶歐節義清白家風（並詳本志節婦）

古亭臺

萬壽亭 在縣署東南新安寺之北按本色清出尙無此亭僅於天寧

寺設當今皇帝萬歲牌位每逢登極晏駕及冬至萬壽等日地方官咸於此行朝賀舉哀祝嘏各禮殊不鄭重後租用新安寺隙地創建八角亭一座名曰萬壽亭所有一切典禮始行於此今寺久圯而亭亦邱墟所存者僅亭之遺址建置年月已無可考民國八年經縣知事劉士元以該寺地基列爲官有上詳省憲奉令拍賣久未售出現擬以其地留爲建築警察事務所之用

烽火台 在城東五里首山中峯之巔俗呼墩台高約三丈餘純以城

磚砌成台上舊有茅屋數椽杏樹一株尙有遺跡可尋未詳創自何代相傳昔年每有軍興即於台上舉火以爲烽烟告警之需臺之附近現有牆基數處或以爲前代軍壘焉按此臺本邑尙有數處除七

里坡係明崇禎年間建築餘皆無考

一在首山西北茶棚菴之後今已半圯

一在城東北五里窟窿山之巔今尙存

一在城西北十八里白塔峪村西臺子山今尙存

一在城西十八里龍王嘴村北台子山今尙存

一在城西南十五里七里坡村西北山今圯僅七里坡三字石匾一方

並刻有崇禎十年建修字樣（詳本志古碑額）

一在城西南六里頭臺村今圯

一在城西南二十二里王家窪山上今廢

古墳墓

吳氏先塋 在城東北五里窟窿山西北隅僅存石門一座有驃騎將軍吳公先塋八字橫額餘俱湮沒不堪辨識俗呼吳王坟又據土人云鮑官嶺下之姚家灣地方俗稱老龍頭亦係吳王坟父老傳聞因三桂在雲南犯順坟被清室所掘說亦近理按三桂本明高郵人跡其生平事蹟實無列入本邑人物之必要其擇塋兩處大抵係鎮守山海關時事故附識之

祖氏先塋 其塋有二一在縣城西關外里餘石棹石柱猶存圍牆半圯碑文殘缺可辨者惟有石門橫額祖氏先塋四字尙全一在護城河西四里許有鎮國將軍祖大壽墓碑及石刻清順治十三年御賜祭文（詳本志藝文）四圍磚牆以及各種石器猶多存者俗呼祖家

坟

蔡氏先塋 在城東南十二里釣魚台村外爲清淮安漕運總督兵部

尙書蔡士英之先塋一碑僅存係清內翰林國史館大學士范文程

撰文（詳本志藝文）餘俱湮沒俗呼爲蔡狀元坟考錦志蔡士英本
以漢軍佐領起家此塋爲太夫人夏氏之墓所謂狀元坟者殆附會
之說也

羅總兵坟 在城西四里佟家屯路北尙有石坊及頂鑄望天猴石柱

四根惟墓址模糊僅凸凹數處榛莽荒穢更無碑記可考相傳爲羅

總兵墳羅氏係明代末葉總兵屯戍是邦因築墳焉嗣清軍入關明

兵退去歲久無人祭田悉爲墳丁佔有墓基亦被掘毀無遺又恐坟

主查究並將碑碣擊碎藏之井底以滅跡果如此說良堪浩嘆其墳
丁某氏今己人盡流氓家無立椎想係冥漠中之報應不爽耶

朱光字墓 在城西南三十里沙河所其坊刻有春祀禴秋祭嘗可使

探源知本北郭山南城水長資繞綠來青（事跡詳本志人物）

柏氏先塋 在城北六里俗呼柏家墳村圍墻盡圯石器半沒土中石

門左側有皇明誥封龍虎將軍柏南岡夫人金氏墓碑字跡尙全餘

皆剝蝕不堪辨識惟查柏氏家譜並無南岡其人者想係發跡在修

譜之後歟亦未可知墳內有異樹一株幹高丈餘頂分兩杈葉尖長

子似花椒味甘而酸其生葉今年此杈先生彼杈後生明年彼杈先

生此杈後生兩杈先後按年更迭人亦莫名其爲何樹斯亦奇矣爰

附錄之

古浮圖

玲瓏塔 在城西北九窪山五里許八面四佛四碑高十八丈創建年

月無考九窪烟塔居本邑八景之一

西塔 在城西龍王嘴村西溝高約十餘丈下有穴闊約二三丈牧

豎每入穴避雨可容羊百餘隻創建年月無考

大石塔 在城西四十里大石塔屯之西山高約三丈週圍二丈五六

尺玲瓏高聳統係石塊砌成建築年月無考

古碑額

節孝碑 在城西南九里二台子村西爲蘇永利妻李氏之碑中間刻

有節烈冰霜貞靜幽嫻八字清光緒十八年奉旨建立（詳本志節婦）

上帝廟古碑 在城內北街廟之東院大士菴二門右側爲原任淮安

漕運總督兵部尙書都察院左副都御史蔡士英率子內秘書院學士蔡毓榮廕生蔡毓秀等於清康熙五年建

清涼寺古碑 在城西南荒地村之南山明東寧伯焦禮於天順五年

重修建

大悲閣古碑 在城東南三十里大海山明東寧伯焦禮於天順四年

重修建

玉皇閣古碑 在城東門外南偏一爲遼東總兵李鳴鳳於明嘉靖二

十三年興修建一爲州牧趙懋本於清乾隆庚申重修建

龍神祠古碑 在城東三里州牧劉大觀於清嘉慶四年重修建（係

劉牧自撰碑文詳本邑藝文）

三義廟古碑 在城西南湮台河村清太子少保戶部尙書總管內務

府大臣滿州都統福長安於嘉慶五年重修建

白衣庵古碑 在城內西南隅爲明總兵祖大壽及語封夫人左氏於

崇禎元年興修落成建賜進士及第經筵日講官翰林院左中允陳

仁錫撰文（詳本志藝文）

臧根嵩墓碑 在城東三里龍王廟之前其碑文云皇清誥贈奉置大

夫知甯遠州事臧公諱根嵩之墓乾隆四十四年五月立據父老傳

言此公知本州事時值清高宗東巡以請浴湯泉爲大臣和珅所陷後因尸立不仆始明其冤以清高宗之明不應有此信讒枉殺或者當日尙有他故未可知也故附誌之

劉氏先塋墓碑 在城西南二十五里亂石山屯後明嘉靖甲午孟冬

立碑文殘缺惟首刻劉氏先塋及劉均世爵長授武略將軍十餘字

模糊可辨後面銘詞爲於戲劉門世以朴勤高曾是承且賢且貞勇

冠千兵方期遠程山高海闊世德無窮三十二字略可辨識餘皆剝

蝕又城西南三十里沙河所馬神廟後有石坊一坊後篆刻佳城二

字右爲大明天啓元年三月昆孫歲貢孟春等立前面橫額武略將

軍劉氏塋七字按此兩碑均有武略將軍劉氏字樣殆一家而兩塋

也本邑墓碑當以此爲最古

娘娘廟古碑 在城西南六十里俗呼娘娘頂清平西王吳三桂於順

治庚寅年重修時建

海雲寺古碑 在城西南五十里俗呼長山寺其碑有二一爲嘉靖二

十一年歲次壬寅重修建一爲萬歷四十一年癸丑建碑文均模糊

不堪辨識

馬神廟古碑 在城西南三十里沙河所一爲明萬歷丁未年興修建

一爲崇禎五年重修建

興隆寺古碑 在城西南三十里沙河所南之沙河堡殿壁邱墟僅存

清乾隆四十年重修碑一座字跡尙全

縣署題額 在大堂正面有敬事堂三字橫額右書道光辛卯秋七月

左書知州事浙東陳瀛二堂有斯信堂三字橫額右書道光辛卯秋

九月左書坐斯堂也莅斯民也視斯事也敢經言自信乎敢不求其

可信乎因以名其堂知州事浙東陳瀛又大堂後面有州牧強上林

書清慎勤三字橫額惟未署上下款

退思草堂題額 在縣署院內西偏有州牧劉大觀書退思草堂四字

橫額清嘉慶四年己未孟春立現已無存

同壽藥局題額 在城東街路南有州牧強上林書三字橫額二一承

玉露一握靈樞在其商號匾額左右

地藏寺題額 在城北門外廟之山門有明兵部尙書陳新甲率土同

版四字橫額東院毘盧殿左側有明萬歷進士官南京禮部尙書董其昌書同登覺地四字橫額又州牧伊湯安書衆生普渡四字橫額清

乾隆丁未立

龍神祠題額 在城東三里其間名筆題額甚多最著者有清嘉慶年

鐵保書霖雨蒼生四字橫額右書己未調京吏部路經甯遠小憩龍

神祠書此以識神堂並質松嵐先生有勸勉之意焉左書梅菴弟鐵

保現移懸城裡南校堂壁間以便保存又嘉慶己未州牧劉大觀書

永懷靈祐四字橫額道光庚午州牧陳瀛書保合太和四字橫額祠

之東軒懸有漱石山房四字橫額字跡遒勁下署徐九德題四字

關帝廟石額 在城西南六十里東關站村廟之門墻前面鑲有東關

驛三字石匾一方原此處於清代設有驛丞官廳以傳遞公文道光緒季年改用電報驛站裁撤而一匾僅存土人移置於此亦一紀念品也

松雲寺石額 在城西南十五里七里坡松雲寺山門牆上面原寺之西北五里許山上有明崇禎十年建築之峯火台因日久傾頽磚石蕩然僅遺七里坡三字石匾一方土人鑲置寺牆亦存古意也

天齊廟題額 在城東門外有翁方剛書道光一氣四字橫額清嘉慶戊午立又州牧強上林書卽心是佛四字橫額

關岳廟古額 在城西門外其額有七一威靈顯赫山西河南商人於明崇禎十一年立一敬神如在山西各府縣商人會首於明崇禎丙

子歲立一英雄胆智山西太原府商人於明崇禎十年立一文武一人山西平陽府商人於明崇禎八年立一忠義千古暨陽錢世勳於清康熙五十年立一聖旨匾山西平陽府商人於明崇禎十年立一萬世人極清咸豐御筆

湯泉寺聖宗殿古額 在城東南五里有知州劉大觀所書大乘正宗四字清嘉慶二年二月穀旦立

古橋梁

西石橋 在城西關外北偏俗呼吊橋建築年月無考每逢執行死刑必過此橋俗又名斷魂橋

南石橋 在南關外建築年月無考備市猪市均在其側

三里橋 在城南六十里相傳爲明代修築凡三空長三丈許土人即以三里橋名其村橋上條石向皆順鋪年久易坍車馬經過輒生危險清代州牧朱克揚過此車輪墜下幾殆乃令改修橫鋪以期永固即今之橋也

永安橋 在城西南三十里沙河所之西肇建年月無考道光十三年經海上道人李合祥捐貲重修有碑在焉

長春橋 在城東北十八里老和尚台村中間創建年月無考緣村北山有溫泉流出經過於此土人築橋以便往來

古驛站

古驛站 全境有二一在城西關外南偏原名甯遠站一在城西南六

十二里東關站今俱裁廢

其他古蹟

溫泉 俗呼湯泉距縣城東南四里盛京通志其泉如沸明都指揮韓斌構亭其上旁爲堂引水於中以爲澡雪之所相傳經西人考查泉脈發自首山以其下有硫磺鑛故也垣外有隕星石（此石今已移在城裡南校）按縣屬溫泉共二其一在湯上屯距城西南七十里池有三水中含硫磺質較多亦堪供澡雪之用

龍潭 在城西龍王嘴山下有東西二潭中隔珠山俗呼爲龍戲珠潭水澄清每逢天旱遠近鄉人千百聚合頭戴柳巾手持柳枝鳴鑼擊鼓詣潭焚香禱告頃刻間龍由潭內石隙而出鄉農羣向羅拜佛號

鐘聲謂之祈雨按此舉雖近迷信而每獲降雨之效豈龍之靈耶抑盡適逢其會耶斯亦理之不可解者俗呼老龍頭即此

聖水盆 在城西北二十五里九窪山其峯最高處有石屏聳立每當風止雨收半山晚照濃翠欲滴屏下石棚內有石圓而凹如盆形盆之水經年盈滿清涼可飲遠近多取以療疾者故名聖水盆據該處父老云此山向多藥材藥根與盆水均發生於石隙中水帶藥質故可療疾理或然也

北石湖 在城西北五十五里松樹卯天桃寺之山北有石湖溝溝有石湖二俗名大石盆二石盆大石盆橫枕溝口寬方二丈其水碧綠深有數尋二石盆距大石盆十數步方圓丈餘水碧不深酷暑不涸

其水皆流自山中嗜景者多往遊焉

拴馬石 在城西北六十里雞皮嶺之雅路溝村高約七尺粗尺餘重約六七百斤土人相傳唐薛仁貴東征高麗行至此挾石立之以拴馬因名爲拴馬石亦附會之說也姑錄之以存古

刻石留題 凡七一在首山朝陽寺壁間係前州刺伊湯安九日偕友

登高所詠二律詳見藝文詩歌一在該寺後殿石階前面石壁係伊

湯安所詠五古一首當日僅記有雪花大如手之句此二石現已無

存一在龍神祠內致爽亭壁間係前州刺劉大觀所撰迎送神曲各

一詳見藝文詩歌現在尙存一在縣城東門東面女墻下作四角長

方形內題東面至東北角台起自東南角台止通長二百六十五丈

六尺八寸乾隆四十六年八月佐領依林保知州伊湯安修其餘西
南北三面大率類此現在尙存

夾石古字 城內北街天寧寺門外有石八片高約四尺寬尺許厚五

六寸每二片並立中距數寸即當年之夾桿石也每片刻有字一南
四片刻片石孤雲四字北四片刻說法點頭四字據邑紳吳景濂先
生在衆議院曾言此八字係唐柳公權筆蹟致有不遠千里來榻者
似非無所見而云然也惟其體態頗不類柳或又謂係明董其昌所
書究竟是柳是董一時尙難確定姑錄之以備考（現本邑官紳擬
將此石移置南校以便保存云）

鐵香爐 在城西北三十五里雜木林子望海寺中其爐共三節高約

八尺上節六角每角懸鈴鐸擊之各音不同爐上鑄有寧遠城南海
頭重建龍宮寺鑄造重一千斤弟子于化龍等發心鑄造綿力難爲
不免叩化十方商賈天啓七年正月十五日吉造等字尙全餘皆剝
蝕不堪辨識

仙靈寺石佛 在城西南四十里仙靈寺村石佛高四尺五寸形態宛
肖鄉人以祈禱多應故名其寺曰仙靈按盛京通志所載仙靈寺內
有古石佛三相傳明萬歷三十二年出自海中又清同治七年邑紳
李鵬揚撰重修仙靈寺匾記亦謂建自明萬歷三十二年內有石佛
三相傳出自海中他處謀共舁之百夫莫能舉我處以十餘人前往
叩請輕如漂木遂奉以還而建寺焉似此相傳由來已久石佛出於

海奇矣至三石佛齊出於海並不許他處昇請不更奇而又奇乎天
下事每多爲理之所不可解者此類是也

興城八景

九窪烟塔 在城西北二十里

三首雲冠 即首山在城東六里

溫泉漾碧 在城東四里

菊島晚潮 在城南三十里

湯沙垂釣 即東河在城東一里

湖泊采蓮 在後湖屯距城十八里

長山霽雪 在城西南六十里

致爽霜林 在龍王廟距城三里

按前電話局長張文友有興城十景一曰九龍寶塔二曰三首烽台三曰湯泉祛疾四曰石坊傲邪五曰怡暢鎮夏六曰朝陽賞春七曰釣臺帆影八曰湖畔荷風九曰蛇頂觀海十曰龍口噴泉雖與綴景之法稍有不合然措詞命意具見匠心茲並錄之以備參考

興城縣志卷之十一

禮俗

民風

婚娶

喪葬祭

歲事

批評風俗良壞之點

土語之矯正

興城縣志卷之十一

禮俗

周官一經備詳五禮文物衣冠彬彬濟濟降及輓近寢弛綱維富窮奢侈貧廢禮儀人生大端喪葬婚娶報本返始厥爲祭祀相沿陋習羣趨薄偷江河日下孰挽未流述禮俗

民風

舊俗賦性質直亦習文藝今務農力作尙信義重詩書（盛京通志）

縣境風俗樸厚士工文翰潔身自愛之士以干預詞訟爲恥自興辦學校以來民智日開婦女纏足陋習遂漸淘汰惟以科學分門並進苦無時間專修國文因之文理日見退化農力田灌園習勤儉工知加意製

造繪畫有擅長者商重信義習懋遷近復創鉅痛深知買空賣空之非
計社會日漸開通不剪髮者僅見晨星碩果惟童年結婚早嗟斷喪妒
婦無識晚絕宗祧雖占全境戶口之少數實爲美中之不足以其有乖
人道也茲舉四民習俗之大略覩縷述之亦可覘人羣進化之程度焉

婚娶

婚禮男女結婚大率藉媒妁之言以達兩姓意見或以門第相當或以臭味相同或以才貌相等或男女兩家各擇德焉其年歲以男及冠女及笄者爲普通其論財而結婚或遲早過甚或男長女幼或男女均在童年者殊不常觀議婚之初先由冰人索女家草庚命星士卜之或兩家互換草庚各命星士卜之謂之合婚即儀禮問名之義議既諧由冰人報告女家並索女家生辰八字開列於四寸寬一尺長之紅布條上謂之婚帖盛之以匣近多改寫簡帖者由冰人送往男家逾三日男家諸事平安然後將婚帖取出易以簪珥由冰人將原匣送還女家俗曰送婚帖於是始諏吉由男家備簪珥布帛之屬偕冰人躬至女家爲定

婚之証俗曰放定亦曰押婚即古者納采之禮婚期擇定百日內男家用紅箋書男女年庚及迎娶日期從俗禁忌諷吉請冰人通知女家俗曰通信蓋即古者請期之禮通信後男家定期宿冰人備衣飾豚酒等物送之女家俗曰下禮蓋即古者納幣之禮是日女家邀請戚友與男家會飲戚友各出銀錢或首飾之類贈與女家俗曰添箱親迎前一日女家備衣飾奩具等物送於男家俗曰安嫁妝豐儉無定各視其家貲之有無男女兩家各請女眷一曰娶親娘一曰送親娘男家另請親友中男子之衣冠整齊者半曰娶親客半曰送親客人數或四或八不等迎娶之時辰率在上午之丑寅卯各時從未有遲至辰巳午者屆時鼓樂響房新婿騎馬偕男女娶送親客備輿衛導燭馬鼓樂迎女俗曰親

迎婿至女家登堂拜女父母俗曰謝親蓋即古者奠雁之禮古時婚禮之贄皆用雁蓋一則取順陰陽往來之義一則取不再偶之義女家贈婿衣帽靴鞋之屬披以紅彩綢簪以金花用酒醑款待畢仍騎馬先行蓋即男先於女之義亦即古之親迎禮也若不行親迎禮者婿祇在庭相俟由女娶送親客迎娶之近以不親迎者爲夥新婦以紅帕蒙面由女娶送親客扶持升轎至婿家新婦到門未出轎時先用五穀之屬向新人擲之俗曰驅五鬼然後新婦出轎燃炸放炮鼓樂大作以幼女二各持寶瓶授新婦新婦左右抱瓶瓶中實以五穀金銀之屬外繫赤繩有幼童二迭鋪紅氈使新婦足不履地至喜棹（天地棹）前新婦北向立於棹左新婿拜天地畢先入喜房新婦隨入置馬鞍於門限覆以紅

氈使婦越鞍而入蓋即步步平安之義入房立牀前婚揭紅帕而出新婦向吉方端坐或坐於紅糧袋上俗曰坐福女娶送親客爲新婦梳妝加笄俗曰上頭戚友相率稱賀主人備喜筵欸之賀者必具喜儀至戚近友另備拜儀或且有送喜幛暨喜聯者婦家假男家酒筵循例款甥俗曰館飯即館甥遺意是日上頭後由女侍導新婦至堂前謁見祖宗舅姑及戚黨尊屬俗曰分大小客退至夕新婿入房由女侍侑新夫婦飲交杯盞俗曰合巹飲後同食蓋即同體共牢之義其食以水餃和麪條者俗曰子孫餈餈長壽麪大抵親迎者尠不親迎者甚夥館飯後女家戚友將辭歸必預定回門之期或九日或十二日婿與婦偕往母家俗曰回門亦曰回九踰月新婦歸寧以一月爲期俗曰住對月此歷來

婚禮之大略也昔時旗民婚禮稍有不同今則漸趨一致邇來間有行文明結婚之禮者縣屬民風習於禮讓如西俗之自由南省之鬧房無自而作亦差強人意者也

按文中子曰婚娶而論財夷虜之道也君子不入其鄉古者男女之族各擇德焉不以財爲禮司馬溫公曰凡議婚姻當先察其婿與婦之性行及家法如何今人於求淑問題一切無所措意銀屏金屋祇計妝奩究之我利其貲彼挾其富刑于乏術牝漸司晨欲其下氣柔聲俯首以就我範圍誠爲不易又况清狂自肆炫衣飾以驕人嗜好怡情習奢華而蕩產人事遞嬗轉眼淒涼有志齊家者體寤寐誠求之旨嚴繫援非耦之防其亦於人倫之始加之意乎

喪葬祭

喪葬祭之沿用禮節滿漢略同亡者於病革時合家環侍易衣服俟氣絕以衾褥斂於牀俗曰移牀即古之小斂首西向面覆帛以錢一枚納口中亦有納以小珠者蓋取含斂之義左右手各握麩包一枚或糕點俗曰打狗餠餠足縛以麻俗曰絆脚絲牀頭燃油燈晝夜不息俗曰長明燈亦日照尸燈供米飯一碗中插四五寸長禾莖三枚端縛以棉俗曰打狗棒亦曰倒頭飯焚紙糊車馬僕從於門外俗曰咽氣車即送死車之意施白布一端由尸牀引達戶外喪主登門限三呼亡者走明光路俗曰指冥路合家舉哀畢喪主率子孫有服者携壺漿燈籠詣附近神祠焚化香楮去哭而返不哭俗曰點漿水亦曰送紙日凡三次至大

斂乃止以竿掛紙旛於門男左女右旛剪三連白紙條爲之有奇偶多寡之別可望而知亡者之男女老幼俗曰過頭亦曰門旛取其招魂之義男女以粗白布爲衣冠衣曰孝衫冠男曰孝帽女曰包頭以麻爲絰束於腰長短粗細視其服之輕重爲之端垂身後父母俱沒者雙垂以衫帽布帶給戚友者曰散孝延術士開具亡者生終日時回煞需用禁忌等項謂之開殃榜即日通知戚友曰報喪戚友具香楮冥鏹之屬來弔喪主向之稽顙謂之叩孝頭至三日啓窆去覆面帛納尸於棺以酒拭尸之目謂之開眼光蓋棺後合家辟踊哭盡哀卽古之大斂柩停中堂祭奠成服喪主寢苦枕塊於柩側朝夕焚帛而哭朝曰開門紙夕曰閉門紙至出靈乃止書亡者官級封贈姓字年歲於木牌謂之靈牌書

於柩之前面謂之明堂戚友送麪包之屬爲祭儀者謂之益禮多有不收者喪主備筵歛弔客至日晡備塗車芻靈之屬喪主率男女有服者詣廟禮神女眷亦有不赴廟而跪候於大門外者儀仗鼓樂導於前戚友步行隨於後至廟門外喪主捧帚拖門旛入廟中繞階三匝呼亡者而招之焚香祭奠而返至家門外焚塗車芻靈等項向西方哭奠戚友以次焚香致奠謂之接三亦曰送行或曰送路卜期安葬多在單七貧家有至三四日即葬者除接三別無儀節之可言惟殷富之家有在五七七或百日者每逢七日必哭奠如儀亦曰辦七先期以開弔家祭安葬各日書於簡或單帖遍致親友謂之出喪帖其叙亡者官階生終日時謂之訃聞其叙亡者生平事蹟乞求銘誄者曰哀啓於開弔日設

鼓樂銘旌冥器紙旛之屬旛曰靈頭旛戚友贈送輓幛輓聯紙箔奠儀等類幛聯悉懸喪幕中喪主備筵宴訖跪送於門外稽顙以謝之士大夫之家則先期延請膠庠習禮之士四人曰大賓亦曰禮賓於家祭時備祭筵各執事人喪主暨子孫有服者咸出幛就位匍匐聽禮賓唱導行三獻禮奏樂陳鼎俎讀祭言合家舉哀亦曰五獻禮以三獻中有爵穀饌羹茗之五品也是爲家祭至戚有欲致祭者由喪家代治祭筵禮賓贊唱如儀祭畢謝禮賓賚樂工庖人諸執事者更延請題主官點主官各一人以本地紳耆素有名望者爲合格題主官先題木主供於室中以待加點（亦有另延文士書主題主官爲補神字末筆主字中畫者）屆期設公座更衣所於庭中備肩輿鼓樂儀仗導從迎請點主官

喪主去衰絰著素服於門外跪接點主官入室少憩更衣盥洗升公座
由禮賓唱導喪主跪拜如儀捧主進於公案曰移櫛出主於櫛曰出主
散置於案曰散主曰臥主以鷄血和硃潤筆曰受生氣先硃後墨先曰
點主後曰押主斂主立櫛中曰斂主曰豎主主成喪主捧櫛謝筆復供
於室曰安主（至小祥升主於堂）祭奠讀告文曰安主祭詣公座叩拜
如儀曰謝鴻題備筵宴訖跪送於門外鼓樂儀仗如前（其禮甚繁不
及備載）斯舉有費逾千金不止者出靈之前夕戚友以次哭奠曰辭
靈家中竟夕齋醮曰坐夜間有延僧道誦經者即代亡者祈免罪過之
義若在單七並哭奠於庭中曰供飯以梵經有七日上望鄉台之說蓋
取來復之義翌晨先焚亡者枕函於門外備儀仗前導與接三略同惟

有益之以銘旌冥器車轎之屬者（女眷乘車號泣幼童乘轎捧靈牌）

移柩於槨以夫役引行槨夫名數二十四三十二六十不等以二人扶

持喪主執旛哭泣退行於靈之前途子孫有服者隨之即古執紼之遺

義是日發引亦日出殯戚友及女眷送至郭或里門外喪主稽顙謝戚

友戚友返日送殯戚友設香案於途而祭之曰路祭撒紙錢於路曰陌

路錢至墓祀后土懸棺而端其方向曰撥正納棺於壙上覆以蓆凡柩

前所用陶器及男女麻經靈牌等物悉納其中蓋取古禮藏凶之義封

土爲墳插旛於頂焚銘旌冥器哭奠而返三日後詣墳填新土謂之圓

墳近多於葬時圓之者至百日男薙髮女除包頭墳遠者致祭於主戚

友送奠儀者備筵宴之謂之辦百日周年麻穀祭辦亦如之浮厝者則

詣柩前哭奠此歷來喪祭之大略也或有奢儉不同者率因家道之有無所致值此改良時代大體尙無今昔之殊民風尙古亦可見一斑矣

歲事

舊歷正月一日謂之元旦供天地牌於中堂晨起男女長幼具新衣冠叩拜神祇祖宗父母訖合家平等者互拜朝膳家家麪餃食畢戚友互相往來拜賀或投刺不絕如縷五日後始漸稀少商賈除鮮菓紙烟外餘皆停止貿易拜賀一如民家俗曰拜年

初五日朝膳捏麪餃食之俗曰捏破是日也撤供棹開箱櫃試剪刀過此婦女始外出拜賀亦曰破五

初六日爲商家開市之期晨起啓市門燃爆竹焚香拜財神漸行貿易

初七日至初十日爲新婿往岳家拜賀之期俗曰拜新年

是月上浣十日農民恒以天氣之陰晴占人物之興衰俗有一鷄二鴨
三貓四狗五豬六羊七人八穀九菓十菜之說婦女忌針相聚爲抓子
打鼓之戲子以豬羊蹄骨爲子鼓曰太平鼓

立春爲一歲之首按舊例節前一日地方官率諸色人等迎春於縣城
東門之外辦演秧歌雜劇隨之即古迎春東郊之禮俗曰演春以紙糊
芒神春牛像按干支定其服飾毛皮之色農民以占年景之水旱災祥
焉翌日昧爽縣監督率衆官員在署以鞭擊牛俗曰打春自入民國以
來此禮遂廢

十五日爲元宵節由十四日起商民各家張燈結彩所辦龍燈高躡旱

船獅子等雜劇各街跳舞俗曰歌秧即古鄉人儺遺之義至夜燈火輝煌爆竹聲鼓樂聲紛投耳鼓城隍廟燈火尤盛間有黏燈謎以較巧思者男女遊人填街塞巷夜半燈罷歸家以糯粉裹糖爲丸煮食之謂之元宵亦名湯圓如此三晝夜至十七日乃止故亦曰燈節更於十五日以肩輿抬城隍像四街遊行所經之處焚香致敬俗曰城隍爺出巡凡此節之前後日紳商士民互相備筵宴會俗曰換年茶亦曰會春酒二十五日以飯一碗或碟盛麩包一枚置米囤中或箱櫃上焚香祭之俗謂之填老倉

二月初二日俗呼爲龍抬頭日家家食春餅以薄爲尙捲以炒菜婦女剪紅紙爲剪刀貼於壁即引龍驅蟲之意

清明前三日家家多備餅餌食之蓋取寒食禁烟之遺義故曰寒食節亦曰禁烟節詣墳填新土焚香化紙以祭之插柳枝以房中民國以來改爲植樹節

四月十八日爲東關娘娘廟會城西南娘娘頂香火尤盛凡賣吃食玩物者畢集男女遊人燒香了願者穀擊肩摩絡繹不絕二十八日西關藥王廟會其香火之繁盛與娘娘廟同

五月五日爲端陽節於初一日家家以紅黃紙疊葫蘆或符印下綴桃葉貼掛於門小兒臂繫彩線胸帶小荷囊艾虎等件耳塗雄黃酒插艾於房中隙地蓋取避毒癘之意初五日商民各界放假休息午膳備盛筵食角黍俗名糉子飲雄黃酒宴畢小兒繫帶諸物均擲於門外道路

間俗曰午節亦曰天中節十三日爲西關關帝廟會此日歷來多下大雨故俗云大旱不過五月十三又名雨節

六月六日俗謂蟲王生日氈帽舖備酒席犒工人取防蛀之意農人聚會於附近之廟社議看守青苗事宜謂之青苗會若值初伏家家食麩條謂之伏麩蓋卽取古者伏日作湯餅以避惡之遺義

七月七日閨中婦女晒水一碗以針浮水面而覘其影之所似以乞巧是夜俗爲牛女相會之期賴燕鵲填橋以渡天漢古稱七夕殆本乎此十五日爲麻穀節取舊沒新升之義家家詣墳掃祭若有新喪者謂之新麻穀戚友餽送紙箔麩包之屬以祭之是夜有放路燈於城外護城河並延僧衆諷經者謂之盂蘭盆會藉此以超渡枉死之魂

八月一日俗爲孔聖生日舊日私塾放假休息謂之祭丁自改學堂以來此風已息十五日爲中秋節各界放假備筵聚飲一如午節至夜陳月餅瓜果於庭中燃爆竹焚香祭之謂之拜月祭畢家人分甘聚啖是日也月圓於上人圓於下故又謂之團圓節

九月九日爲重陽節文人學士携酒登高於城東首山龍王廟等處暢飲聯詩當此菊花盛開之際故又名菊花節十七日俗謂財神生日商民陳鷄魚肉麪以祭之

十月一日家家祭祖先掃墳墓焚紙箔包袱之屬謂之送寒衣蓋有事死如生之意

十二月八日俗曰臘八煮黍米雜豆棗栗之屬爲粥謂之臘八粥近多

煮乾飯者二十三日俗曰小年是夜以香燭紙馬飴糖祀竈神焚其像而拜送昇天俗曰辭竈有立天燈竿者亦於是日起至明年二月二日止三十日（小月二十九日）是日也糊春聯門神常鮮紙等類掛燈結彩門庭煥然祭祖先供財神備筵合家聚飲至夜具新衣冠遍拜尊長謂之辭歲合家或坐談或捏麩餃謂之守歲至五更移財神棹於院中張燈火燃爆竹焚香叩拜謂之接財神亦有茹素者供九佛不茹素者供龍駒之別再按財喜各神所在之方向以香燭接之謂之迎神歸煮麩餃食之謂之食元寶喝元寶湯此一年俗事大略如此若陽歷年惟各官家有行之者農商尙按仍舊云

按古者父母之喪既殯食粥齊衰疏食水飲不食菜果父母之喪既

虞卒哭疏食水飲不食菜果期而小祥食菜果又期而大祥食醯醬

中月而禫禫而飲醴酒始飲酒者先飲醴酒始食肉者先食乾肉是

古人居喪無敢公然食肉飲酒者晉阮籍居喪食蒸肫何曾面詆之

爲敗俗楚王馬希聲居喪食鷄臠潘起譏之曰何代無賢是五代之

時居喪食肉者人猶以爲異事迺今之人居喪食肉飲酒無異平日

見之者亦括不爲怪又父母之喪中門外擇樸陋之室爲丈夫喪次

婦人次於中門之內別室撤去帷帳衾褥華麗之物男子無故不入

中門婦人不得輒至男子喪次晉陳壽遭父喪有疾使婢丸藥客往

見之鄉黨以爲貶議今人之居喪者亦公然不避嫌疑又世俗迷信

浮屠凡有喪事無不延僧誦經云爲死者滅罪資福使生天堂不爲

者必入地獄殊不知死者形既朽滅神亦飄散雖有剉燒春磨亦何所施今人雖不深信其說然往往以延請僧侶爲維持自己體面佛而有知其謂之何流弊相沿習而不察殆所謂積重難返者歟

風俗

批評良壞之點

一城市晨起買菜愈早愈覺便利蓋自賣家之菜價既低廉又許選擇佳品稍過其時則菜蔬盡入小販之手即與前者呈反比例在無形中饒有獎勤之意城市習慣當以此爲最良

一鄉間每至農隙往往演唱影戲蹦蹦子以爲消遣影戲不過多演迷信鬼神使用法寶之類其害猶淺正宜飭其改良演唱忠孝節義勤儉

愛國等事以資觀感若繡子則淫詞醜態無所不至似惟恐世人不入下流蕩青年之心志生婦女之情癡傷風敗俗所不忍言似應在必禁之列

一迷信拜佛求福暨燒替身紙造之類婦女視爲必要之事富家辦喪至有製紙造費洋以百元計者富家婦人至有由四五十歲即按節令焚化金箔以待死後之揮霍者以有用金錢消耗於無用之地何民智不開至是其愚亦可憐矣若云非此不足以盡人子之心則儘可努力爲善以貽父母命令名若云家家不製紙造畫工將至失業則糊屋裱畫生計儘多特爲揭出以牖憤

一婦人信巫城鄉皆然甚至未滿一月之乳嬰有病亦延巫治之所開

方劑藥名雖久住藥肆者尙不能知除許香供神袍幔焚化金箔而外再無其他伎倆此雖不禁亦在天演淘汰之列

一女子自幼時即學習葉菸耗費金錢尙屬未節按本草云菸氣入口不循常度頃刻即周全身可解疲倦故一名相思草然火氣薰灼傷肺損年男婦之老而咳痰其明證也似不如戒之爲是

一鄉間爲女擇婿貧家每索重聘絕不爲婿家生活計算殊不知婿家若貧而失所則已女亦不免於凍餒父子天性何存忍心害理莫此爲甚

一使子早婚訂大妻二者流弊甚多更僕難數此等事鄉間富家且盛行之總由於不明生理學所致

一鄉間輪養父母一事於理未爲不合惟股分既多賢愚不等往往有入門蔑視以父母所遺之產業反類於乞食子媳者似不如采用擇賢擇愛主義即將父母所留養老貲產歸於所依之股經理較爲完善

一鄉間纏足陋習現在所存者僅餘百分之十似不難逐漸淘汰若城居人民則幾乎一律釋放

一婦人以出外謀生爲恥未爲不是然亦未免太拘例如做女工係爲他人作嫁彼以金錢易我勞力二者本處於對待地位無所謂榮亦無所謂辱如以爲辱則可辱之事固有甚於做女工者當此生活程度日高之秋似不宜過於拘執自窘生計

一城市胡同每有人對牆溲溺路遇婦女恬不知恥既碍衛生尤傷風化以上數事或有關風化或有碍衛生或有乖天性或徒耗錢財自應由本村讀書明理之人以身作則隨時講演以資表率若事事必俟官府禁止則吾人自治能力未免薄弱

言語

土語之矯正

壺中無酒難留客 按此語爲青年嫠婦再醮其母家戚屬之習慣語既嫌其傷風敗俗又嫌其儼不於倫亟應根本矯正

理由 酒爲速客必需之品酒罄客自應去若婦人則從一而終夫故自應守節其因家貧無贍或意外之障碍不獲已而再醮者乃人生

最大之不幸非於義理上爲正當也

填房偏房之不分 按此爲社會習慣之孟浪語

理由 填房云者人死房空復娶妻實之也人有嫡妻年逾商瞿不得不納蓋以謀嗣續謂之偏房偏房云者對於正室而言之也今人於戚友之女與人續絃統稱之曰偏房殊爲不合

家弟 按此種名辭不惟爲莊農人之習慣語即薦紳先生亦言之

理由 語云家大舍小令他人凡家父家伯皆尊之之辭也舍弟舍孫皆卑之之辭也令堂令正皆他人稱謂之辭也今人之稱家弟意不過謂此吾家中兄弟殊不知其義有未協

稱嫂曰姊 按此爲滿人呼嫂之名稱

理由 庶妻稱嫡妻曰姊其沿襲由於古之娥皇女英似屬尙可若弟及弟婦稱其兄妻亦曰姊此與稱其胞姊何異最爲悖謬此理易明爲待深辯

老嫂備母

按此爲鄉間之習慣語（源出於小說之包孝肅）

理由 古人叔嫂受授不親所以遠嫌今若以嫂即母也之概念凡母子間所一切不必拘之形迹一例施之於叔嫂間似屬不甚相宜此亦爲應行矯正者

大爺

按此爲社會猶子呼其伯父之名稱

理由

因嫌其與呼祖父之兄之名稱相混亦應矯正

老爺子

老頭

老太太

按此爲鄉間對於他人呼其父母之通稱

理由 爲人子者不應稱其父母與陌路人等

不乾不淨吃了糜病 按此爲婦人撫其子女之習慣語

理由 因此種無知識之言與衛生大有妨碍亟應根本矯正

興城縣志卷之十二


物產

特產

魚類

蟲類

貨類



興城縣志卷之十二

物產

土宜方物稅熟貢新秋菘春韭適口稱珍迨及瓜期文園消渴藥
籠收貯醫療用佐蟲魚鳥獸爾雅特詳動植與鑛博物大綱寶藏
速興地利盡闢無待外求萬彙萃聚述物產

夷考禹貢一書一則曰厥貢漆絲厥篚織文再則曰厥貢鹽絺海物維
錯古帝王欲制貢賦先辨土宜惟正之供初不外服食器用之物太史
公序貨殖亦曰山西饒材竹穀繡旄玉石山東多魚鹽漆絲聲色其因
勢利導使民勸業樂事致力於衣食之原實富國之要圖也縣境南瀕
渤海魚鹽之利銷路甚廣北峙羣山金砂鉛鐵石炭等質鑛產富饒南

部烟台六股諸河流域膏腴之田五穀尤美使經國者休養民力不違
農時則戶口之增商業之盛有不蘄其然而自然者全國統一之日即
實業發達之時地不愛寶可想見民豐物阜之景象焉

魚類

鱖 大者長二三尺小亦尺許脊高腹平鱗小味腴爲本邑夏季海產之大宗現外來之鱖魚肝油即此若能精研製造或可較盛於舶來品矣

鰻 身圓無鱗尾多三岐肉細味厚勝於鱖大者長二尺餘小者數寸俗呼鰻魚羔子一名霸魚

同勒魚 大重斤餘似鯉而頭微大鱗小而微黃出海中亦最多
骨董魚 一名大頭魚身粗而短肉細味腴爲魚中佳品

鱗 俗呼刀魚飲而不食形薄多刺亦名刀鱗

石首魚 俗呼白蜜子身微寬鱗細頭中有兩石白如玉又一種扁身

微小略有雜黃色者名曰黃花魚本邑不產所食者惟鹽醃來自他邑耳

鯊鮪 體圓而狹小有斑點張口吹沙俗呼沙根魚又一種沙魚之大者其髻爲海味珍品本邑不多見

羊魚 身圓色黃尾如羽箭能刺人相傳此魚胎生聞雷羣入母腹往往於大魚腹中得衆小魚又以其箭能刺物他魚遠遠避之爲漁人所最惡

河豚 俗呼蠟頭棒子頭大尾小形如科斗腹下白眼能開閉肉亦可食但血皮頭子皆有毒烹調失宜即遭危險相傳薤白能解食之者

其慎諸

鮫魚 俗呼梭魚身圓而長鱗色微黑肉細而肥美先他魚而見爲初

春之佳品

鱸魚 俗呼魯子魚身微扁而口大鱗細而色微黃有黑斑點長一二尺夏日正肥腹中多脂俗有春鮫夏鱸之說以其隨時而肥美也小二三寸者俗呼鱸渣子

海青魚 俗呼青魚身長五六寸相傳此魚上下有大魴魚尾而食之故至時海水有聲去時噴水如箭據鄉中父老所云此魚不產已近百年市上賣者率皆醃乾來自他邑非興產也

瓶魚 細鱗如形瓶而扁故名

鏡魚 其形如鏡肉細色白味極佳美

偏口魚 形薄口偏背青腹白先鰓魚而見

比目魚 俗呼鞋底魚形扁平而闊頭小口尖身分兩面上面細鱗紫

黑色下面平滑色白一眼須兩兩相合乃得行爾雅東方有比目魚

焉不比不行其名謂之鰈即此又一名鰈板魚亦此類也

烏鰂 無鱗形如革囊腹中有墨遇人或大魚則噴墨以自蔽口在腹

下八足聚生口旁如帶背上一骨色白質輕入藥名海鰂蛸

鱧殘魚 俗呼面條魚形狹而長若條然杜詩白小天然二寸魚是也

鯽魚 形似鯉而脊隆故又名鱗魚產河水中亦佳品也

鱒魚 同鱒似鰻鱺而細長似蛇而無鱗生水岸泥窟中有黑白黃數

種不多見

鮎魚 身圓而多黏液頭大口方而無鱗以其液黏滑故名

鱮魚 俗呼泥鰍以其穴於泥中也似鱣而有縻濡滑難握與他魚相

牝牡

箭頭魚 長七八寸頭大口尖形如箭頭故名又一種長二三寸黃色

有斑見人則喙插泥中名船丁魚

扔抓魚 一名能蹦頭大尾細鱗小微黑形似箭頭魚而小俗呼扔抓

頭魚

青皮魚 長二三寸許身薄多刺鱗細而色青故名夏季此魚最多漁

人每羣取之鹽醃食之尤美

榛子魚 似青皮魚而稍大肉細刺多腹肥如膏脂鮮醃皆可食味極

鮮美產數之多亦不減於青皮

青條魚 似鰻而狹小口有尖長寸餘皮青色無鱗肉細多刺味極濃

厚煎湯食之最美

裙帶魚 似青條而長扁如帶故名肉厚刺少亦稱佳品

海蛇 形如笠隨水常浮爾雅翼蛇生東海濛濛如沫又如凝血縱廣

數尺有知覺無頭目故不知避人衆蝦附之隨其東西故人謂其以

蝦爲目土人取之以灰鹽礬水去其涎汁名海蛇佐酒極佳

白眼魚 其色白類似鮫魚而眼白故名於刈穀時最肥美諺云白眼

刈穀

鯀 似鮎而小色黃者俗呼黃昂刺又一種名扒刺皆海中小魚之類

蟹 種類不一海產者有海基子鬼頭蟹紅夾子稍海子諸名今人統呼旁蟹以其側行故也八跪二螯隨潮解甲腹中虛實亦應月臍有尖團團者牝尖者牡立夏始見海基大且肥其殼兩端有尖甚銳河蟹殼圓而小螯有毛俗呼毛夾霜後正肥冬取者名子蟹冰蟹酒醃曰醉蟹佐以薑醃更別饒風味

蝦 正字通云磔鬚鉞鼻背有斷節尾有硬鱗多足好躍腸屬腦子在腹外大者產海中長數寸俗呼對蝦以賣者必以對計故也其小者有白蝦青蝦霧蝦狗頭蝦各種均與海蟹同時並見去殼曝乾曰蝦米帶殼曝乾曰蝦皮並可製蝦醬蝦油等類河產者小而味亦遜

螻 蚌屬生海濱泥水間噓氣成孔形似硯而長肉在殼中上下分兩

岐一長一短與月消長土人取之計日下鉤得之甚易獨脚者俗呼
筆管螳四足者俗呼美人螳

蚶 有白蚶麻蚶二種本草云狀如海蛤圓而厚殼外有理縱橫即今
之蚶也大抵麻蚶勝於白蚶麻者貴而白者賤具出東南各海口

蠣黃 本草云今海旁皆有之附石而生硨磲相連如房呼爲蠣房潮
落石出土人登石去殼取肉以充鼎食尤佳謝靈運詩揚帆採石華
即指此殼入藥名牡蠣

蛤 殼有花斑即蚶之類本草云生東南海中白殼紫脣大二三寸說
文云蛤蠣海蛤魁蛤三種皆鳥類所化

螺 俗呼海螺子種類大小不一殼硬如石而有鈍尖易離爲羸即此

蝥 似蝗而闊出海濱鹵地本邑不多見

海豚 俗呼海猪其形如豚鼻在腦上隨風潮出入舟人每以占風之
有無

海狗 身首皆如獸魚尾有足有毛腎可入藥名海狗腎海行者或見
之

蟲類

蠶 酉陽雜俎曰食而不飲者蠶也三眠三起二十七日而老自卵出
而爲杪自杪脫而爲蠶蠶而繭繭而蛹蛹而蛾蛾而卵卵而復杪亦
有胎生者與母同老蓋神蟲也其繭有黃白二色本草謂孕絲蟲也
種類甚多喜燥惡溼本邑多寒業蠶者少近年苗圃成立若於蠶桑

深加考察如盛京蠶業學校著有成績亦未始非一莫大利源也

貨類

鹽

世本黃帝臣夙沙氏始煮海爲鹽是也縣境西南沿海一帶爲產

鹽之區鹽之出處曰灘有灘者曰灘戶其製鹽之法鑿地爲池引海

水注之日光蒸晒積久漸涸所餘者卽成鹽矣晒鹽之期在春夏之

間雨少天旱則出鹽較多每年共產鹽約計三十五萬八千三百二

十八擔行銷各處爲出產之大宗灘之聚處曰場場設場知事一轄

灘務所九專司封坵開坵巡灘緝匪監秤事宜另有稽核所九專司

起票納捐過秤事宜餘見實業按本省鹽課於前清同治初間每斗

只捐制錢一百後此以漸增加今則每鹽百斤捐奉小洋十元矣孰

謂今不異於古耶亦可以觀世變矣

滷塊 即鹽下重濁之水也爲製豆腐必需之品或有煎製成塊以便行銷者

金 產於縣城西南五十里夾山暨縣城西北塔子溝等屯因開採者賠累不堪現已停採詳見鑛產門

鉛 產於縣城北五十里甘甯溝暨縣城西北五十里松樹卯等屯因開採者賠累不堪現已停採詳見鑛產門

錳鐵 產於縣城西北六十里黑松林屯鷄冠山等處因開採者賠累不堪現已停採詳見鑛產門

煤 產縣境西北諸山色黑質脆火力甚強可代燃料少烟耐煉與唐

山等處烟煤不同開採者約計有七八處著有成效居現今鑛產之大宗其餘脈已發現而開辦未能者亦有數處之多或乏於人材或限於資本徒深望洋之嘆亦良可惜也若能合羣策羣力提倡而擴充之將來煤鑛之興可爲東省之冠是在有心者惟利是圖之

石灰 產縣境西北諸山其製法掘地爲竈中架版石燒之逾半日止火間日取出即成石灰色白性熱用時以水泛之爲建築必需之品近來消毒亦用此灰行鎖境內爲數頗多

按物產原遵照盛京通志列穀蔬藥草木花果禽獸魚蟲貨共十二類茲遵

省批專詳特產特附誌之

興城縣志卷之十三

宗教

佛教

道教

回教

天主教

耶穌教



興城縣志卷之十三

宗教

多神一神古今教派禍福警勸宗旨莫外牟尼忍辱基督愛人異宗同趣克已則均法令濟窮天人演奧流弊輒滋妄誕致誚論厥精微不出儒書詩材畫景兼蓄並儲述宗教

嘗聞聖賢之教人無所欲而爲善無所畏而不爲不善士之修德砥行求安於心而已此董子謀利計功之說之所由本也自中智以下不能完其性之分大抵不勸不趨不懲不改聖人因而導之以禍福之故詩言出王游衍書戒惠逆影響易稱餘慶餘殃爲後世神道設教之濫觴洎亞洲之秦政統一六國歐洲之屋大維統一羅馬兩人均以力征

經營而得天下踵其後者率小役大弱飼疆運會所至理不勝氣有時
善者不必福不善者不必抵於禍於是天竺之釋迦牟尼猶太之基督
乃乘間而爲輪迴天父之說風聲所播漸染東來他如穆罕默德之以
兵行教張道陵之假託老子宗喀巴之改創黃教則又強迫妄誕更無
研究之價值近世道德教派（主教爲段正元住北京著有黃中通理
大同貞諦等書）謂將來世界大同雖地球之南北極亦可環遊此等
謬言本不值識者之一噓蓋人心至靈幻想百出既臆造一恐怖世界
以制情復臆造一極樂世界以生羨張皇幽渺別戶分門究之犧牲現
福以求程社於來生醉心萬能轉詆他人爲迷信宗風不振難了塵緣
祈禱奉行恃爲生計矯情者畏苦語誕者懷疑以其非中庸之道故也

佛教

佛之教祖曰釋迦牟尼降生天竺受姓瞿曇時在周昭王二十四年至漢明帝時因金人感夢乃遣蔡愔等往天竺訪佛寫取佛經四十二章馱以白馬遂起白馬寺於雒邑西門外中國有僧自此始洎高勾麗建國聘西僧宏通釋典佛教始輸入遼東其教以眼耳鼻舌身意爲六根色聲香味觸法爲六塵色受想行識爲五蘊戒定慧三言爲無上法門盛行於晉唐之際至宋而儒與釋攙雜而不可分一時名儒鉅公大抵皆先入釋教明心見性及深造有得然後遁而之儒周茂叔不除庭草以爲與自己生意相似李文靖藥欄不葺謂安可以此事動吾之心二子之偏於寂默皆釋教也其闢佛者傅奕詆浮屠爲以繼體悖所親韓

愈請焚佛骨而已任其咎司馬光謂其精微不能出吾書其誕吾不信
袁枚謂楞巖經頗類宋人語錄疑爲六朝人僞撰其曰大旨在曲引旁
証平易處忽生波折到吃緊處仍不說明可謂一語破的何之數人之
所見略同耶輓近縉流以功罪禍福誘脅檀越不以人品邪正分善惡
但以佈施有無分善惡福田之說興瞿曇氏之本旨晦矣然天地間有
一種虐姑悍婦其作事情理不能喻忠言不能入若因勢利導怵之以
佛法往往有效此其事惟紀昀所著之閱微草堂筆記五種言之詳矣
其書不佞佛亦不闢佛嘗謂儒如五穀一日不食則飢數日不食則必
死釋道如藥餌死生得失之關喜怒哀樂之感用以解釋冤愆消除抑
鬱較儒家爲最捷其禍福因果之說用以悚動下愚亦較儒家爲易入

特中病則止不可專服常服致偏勝爲患殆所謂持平之論乎今全國中華佛教總會既組而奉天支部亦接踵成立凡有關名勝之叢林寺院法律負保護之責從此龍華會上不渡無緣大闡真如同登覺地西方像教庶免於自然之淘汰歟

中華佛教會分部 設興城縣北街上帝廟內以提倡佛教開通僧界爲宗旨隸奉天佛教會支部總會設於上海民國元年十月成立呈請縣公署立案正會長一副會長二文牘會計評議庶務各一人會員無定額常年經費由會員會金項下酌籌每人一元會長三年一任由衆僧投票選舉至民國七年停辦

上帝廟 在城裏北街西胡同爲唐代以後之古刹明代宣德年間建

築弘治時代繼修正德間增修香亭一座萬歷二十年仲春重修正殿五楹東西廊廡各三楹大廳三楹正殿之西附建娘娘殿三楹廡神殿一楹山門一楹住持僧二人

大士菴 附建於上帝廟東院亦名聖宗殿清康熙二年癸卯創建正殿五楹東西廊廡各五楹古碑四內有清原任漕運總督蔡士英所撰碑建於二門內右側門房五楹大門一楹由上帝廟僧代管

財神廟 附建於大士菴東院清康熙五年丙午建修正殿三楹山門一楹由上帝廟僧代管

天甯寺 在城裏北街東胡同創建年月無可考明代崇禎六年癸酉重修清代光緒十一年繼修正殿五楹山門三楹住持僧一人

祖師廟 附建於天甯寺西院清康熙四十五年六月創建乾隆丙午
年季春重修正殿三楹東西配廡各三楹二門一座山門一楹由天
甯寺僧代管

城隍廟 在城裏北街西胡同明正統間創建嘉靖年重修清康熙五
十七年戊戌嘉慶二十二年丁丑兩次重修正殿五楹東西配廡各
三楹大廳三楹山門一楹附建呂祖祠正宇一楹在內東院正殿三
楹爲聖宗殿光緒十六年建修東西廂房六二門一大門一楹住持
僧二人

白衣庵 在城裡南街西胡同明代崇禎元年八月征遼總兵官祖大
壽暨妻左氏建正殿三楹東西廊廡各三楹草馱殿一楹山門一楹

地藏寺 在北關外明崇禎十二年己卯建清順治八年辛卯重修正

殿五楹東西廊廡各五楹大廳三楹山門一楹東院毘盧殿五楹東
西廊廡各五楹門房五楹山門一楹住持僧三人

慈愍庵 在北關外東偏清順治十二年創建康熙元年壬寅重修道

光八年補修正殿五楹前殿三楹山門一楹東跨院正房五楹東廂
房五楹由地藏寺僧代管

三關廟 在北關外路北清康熙年間建同治元年重修正殿三楹山
門一楹東上房三楹住持僧一人

馬神廟 在北關外西偏原名福興寺清代建修光緒九年孟秋重修

民國十年補修後殿五楹當中大樓一座高三層前殿三楹山門三

楹爲兩層樓左右分建鐘鼓二樓東大門一楹西院正房五楹廡房五楹東西廂房各六楹門房五楹大門一楹縣立第四小學校現設於此

玉皇閣 在城外東南隅明嘉靖二十三年十一月建清乾隆庚申年孟秋重修正殿三楹中建玉皇閣三楹左側鐘樓一架香亭一座東西廂房各三楹山門一楹兩旁角門各一由吉祥庵僧代管

吉祥庵 在城外東北隅清順治八年二月建嘉慶十八年五月重修正殿三楹二門一楹山門一楹東禪堂三楹住持僧一人

東嶽廟 在東關外明萬歷十三年甲申仲冬建正殿三楹東西配廡各三楹鐘樓一座山門三楹東爲文昌殿三楹萬歷三十八年建聖

宗殿三楹崇禎四年建香亭一座山門一楹前殿關帝廟三楹東禪堂三楹住持僧一人

娘娘廟 附建於東嶽廟西院正殿五楹清雍正十年壬子孟夏建香亭一座山門一楹由東嶽廟僧代管

關帝廟 在南甸子縣道北清順治年間建乾隆五十六年重修後殿三楹前殿三楹東西鐘鼓樓各一山門一楹外有旗杆一對東耳房三楹住持僧一人

湯泉寺 一名溫泉寺距縣城東南三里寺內有天然湯泉池水如沸歷代不涸供人沐浴因以命名該寺於明崇禎八年建清康熙五十八年乾隆五年兩經補葺洵稱古刹中央正殿三楹東西廂房各三

楹廂房兩旁各有一跨院每院平房十餘楹供浴人居住正殿之左

有龍干殿一楹右有關聖殿三楹前有山門一楹東院正殿三楹古

碑二山門一楹天湯池在寺後院高三尺分八稜徑闊一丈二尺週

圍用青條石砌成泉水薰蒸沸騰自池底石叢中湧南稜條石下

刻靈液長春四字池外有水溝西流入特別湯池俗名官湯池其地

新建沐室三楹極雅潔爲官長沐浴之所更流入西院爲普通湯池

其地新建沐室五楹宏敞光潔當中三楹爲一院內建兩大湯池爲

男子沐浴之所東西兩楹內各建一小湯池爲女子沐浴之所前有

大門一楹四時修禊之客不絕有不遠數百里而來者賃房坐湯兼

旬累月云可療癬疥麻木風寒等症寺僧二人歲收其茶資房稅焉

龍泉寺 在西河沿大道傍明崇禎年間建築正殿三楹東上房三楹

山門一楹由關岳廟僧代管

關帝廟 在一區曹莊村距縣城西南十二里清雍正七年建乾隆五

十二年道光十二年兩次重修堪稱古刹後殿三楹腰殿三楹前殿

三楹住持僧一人

臥牛寺 在一區海濱山上距縣城西南十八里初僅正殿三楹現改

名雲龍山興化寺民國八年另建正殿九楹東西樓各兩楹腰殿五

楹中央三層大樓一座旁建鐘鼓二樓樓式山門一座尙未竣工現

已查封

松雲寺 在一區七里坡村距縣城西南十五里明崇禎十年建清乾

隆五十三年咸豐三年光緒十八年三次修葺堪稱古刹後殿三楹

前殿三楹古碑三山門一楹東西角門二住持僧一人

清涼寺 在一區東荒地村距縣城西南十八里明天順五年東甯伯

焦禮建清康熙五十年重修後殿三楹前殿三楹山門一楹東廂房

三楹古碑四住持僧一人

娘娘宮 在一區四城子村南距縣城南十里明代建築年月無可考

後殿三楹前殿三楹東廂房三楹山門一楹住持僧二人

馬神廟 在一區沙後所村距縣城西南三十里明萬歷丁未年創建

崇禎五年重修正殿三楹東禪堂三楹古碑一山門一楹住持僧二

人

上帝廟 在一區沙後所村北面城牆上距縣城西南三十里明崇禎年間創建清康熙時代重修正殿三楹山門一楹上下石階十八級城隍廟 在一區沙後所村城裏北街西胡同距縣城西南三十里明萬歷年間建清康熙時代重修正殿三楹東西廊廡各三楹馬殿三楹外有古碑一甬住持僧一人

關帝廟 在一區沙後所村城裡南街距縣城西南三十里明萬歷年間創建崇禎時代重修清乾隆五十一年補修堪稱古刹正殿三楹二門一古碑四馬殿三楹由地藏寺僧代管

地藏寺 在一區沙後所村城西門外距縣城西南三十里明崇禎九年有總督柏公蒞此發願創建清順治十二年乙酉經僧人洪智募

化重修正殿三楹東西廊廡各三楹東禪堂三楹前殿三楹古碑二
鐘架一山門一楹住持僧一人

藥王廟 在一區沙後所村城西關距縣城西南三十里清康熙戊戌
年創建乾隆六年暨十三年兩次重修正殿三楹香亭一古碑四東
西角門二山門一楹由地藏寺僧代管

仙靈寺 在二區仙靈寺村距縣城西四十二里一名顯靈寺明萬曆
三十二年建相傳時有石佛三尊出於海中他處迎請沉重難移及
本屯請之則輕而易舉遂昇歸供奉廟內清嘉慶道光年間兩經修
葺同治七年戊辰又重修正殿三楹東西廊廡各三楹古碑一山門
一楹廟後有真武閣一楹住持僧一人

石龍寺 在二區團山堡村距縣城西北四十里清雍正甲寅年建乾

隆元年丙辰重修後殿三楹腰殿三楹東西廊廡各三楹前殿三楹

山門三楹住持僧二人

興隆寺 在二區紅崖子村距縣城西北三十里建築年月無考正殿

三楹東西耳房各三楹東西廂房各三楹山門一楹住持僧一人

關帝廟 在二區五王廟村距縣城西南二十五里創建年月無考正

殿三楹東西耳房各五楹中建大樓一座高三層現已查封

三義廟 在三區烟台河村距縣城西南三十八里明代建築年月無

考清嘉慶元年戶部尙書福長安重修後殿三楹腰殿三楹前殿三

楹外有樂樓一座(即戲臺)東院正房廂房各三楹大門一楹住持

僧一人

望海寺 在三區望海甸村距縣城西南四十五里清康熙癸酉年建

乾隆三十四年重修正殿九楹前殿三楹古碑三角門二住持僧一

人

地藏寺 在三區三里橋村距縣城西南五十七里清康熙五十三年

道光十六年兩次重修正殿三楹前殿三楹古碑二東耳房兩楹住

持僧一人

海濱寺 在三區東關站村距縣城西南六十里明天順七年癸未建

清乾隆五十一年重修堪稱古刹正殿三楹前殿三楹古碑二住持

僧一人

關帝廟 在三區東關站村距縣城西南六十里明萬歷年間創建清乾隆三十六年光緒二十五年兩經修葺正殿三楹前殿三楹東西耳房各四楹古碑二住持僧一人

藥王廟 在三區東關站村距縣城西南六十里清康熙五十年建光緒二十四年重修正殿三楹東耳房三楹香亭一石碑三山門一楹住持僧一人

娘娘廟 在三區朱家溝村距縣城西四十二里創建年月無考清光緒十八年重修正殿三楹西耳房三楹山門一楹住持僧三人

靈應寺 在三區大黑山科村距縣城西北六十里清乾隆十七年建光緒十八年重修正殿三楹東西耳房各三楹鐘架一山門一楹住

持僧一人

玉皇閣 在三區英茂山距縣城西六十里土人呼爲廟兒溝清雍正

五年創建高閣三楹古碑一山門一楹東耳房四楹住持尼僧二人

凌雲寺 在三區陳家屯距縣城西南六十五里民國九年創建正殿

五楹腰殿五楹前建大樓一座高三層工尙未竣現已查封

朝陽寺 在四區朝陽寺村距縣城西八十五里清康熙十二年建乾

隆年間重修正殿三楹東西配廡各三楹前殿三楹山門一楹住持

僧一人

湯泉寺 在四區湯上屯村距縣城西南八十五里土人呼爲西湯清

乾隆五年創建後殿三楹腰殿三楹前殿三楹東耳房三楹住持僧

一人天湯池在前殿右側距地高三尺砌以條石池口作八角形水自地下上湧深丈餘熱氣薰騰味含硫質冬夏如沸亦天然靈液也其西建浴室三楹中各一池男池二女池一中隔以牆惟規模狹小屋宇卑陋因之浴者稀少然土人浙米浣衣頗利賴之

保安寺 在四區靳家屯村距縣城西南八十里其地高岡如笠寺踞

其巔清乾隆二十年創建正殿三楹前殿三楹山門一楹住持僧一

人

關帝廟 在四區牛彥章村距縣城西南八十里建築年月無考後殿

七楹前殿三楹山門一楹住持僧一人

三教寺 在四區馬車哈屯村距縣城西南七十五里民國十一年創

建正殿五楹東西耳房各三楹廳房兩層每層十一楹東西廂房各九楹山門五楹住持僧

慈雲寺 在四區羅家屯村距縣城西南八十里清咸豐六年建正殿三楹前殿三楹山門三楹住持僧一人

長山寺 在四區台子裡村距縣城西南六十五里一名海雲寺明嘉靖二十一年壬寅創建萬歷四十一年癸丑重修清道光壬午同治癸亥兩經補葺後殿三楹腰殿三楹前殿三楹東院正房九楹住持僧三人

娘娘宮 在四區蛇山頂上距縣城西南七十里一名碧霞行宮東瀕大海地勢高敞明代古刹清順治庚寅年重修康熙三十四年乙亥

嘉慶十九年甲戌兩經補葺正殿三楹東西偏殿各三楹東西耳房各三楹前殿三楹角門二古碑十五住持僧一人

關帝廟 在五區北後屯村距縣城西七十里清咸豐六年建正殿三楹前殿三楹山門一楹住持僧一人

聖宗廟 在五區碾盤溝村距縣城西八十里清代建築年月無考正殿三楹東西耳房各三楹山門一楹住持僧一人

關帝廟 在五區東呂匠溝村距縣城西七十五里創建不知何年清咸豐五年重修正殿三楹前殿三楹東耳房三楹山門一楹住持僧一人

望海寺 在六區雜木嶺距縣城北三十五里明代建築年月無考清

乾隆二十三年重修正殿三楹東西耳房共四楹東廂房三楹古碑

一山門一楹住持僧一人

保安寺

在六區舊門村距縣城西北四十里明代建築年月無考清

道光二十二年庚子民國十二年兩次重修正殿五楹東西廊廡各

三楹馬殿三楹古碑一山門一楹住持僧一人

普德寺

在六區劉屠戶屯村距縣城西四十五里創建年月無考正

殿三楹東西耳房共五楹東西廂房各三楹山門一楹住持僧一人

保安寺

在六區古城子村距縣城北三十里創建年月無攷清光緒

三十二年重修正殿三楹偏殿二楹東西廊廡各五楹西院九聖祠

一楹山門一楹旗杆一對住持尼僧二人

廣岩寺 在七區白塔峪村距縣城北十八里清道光年建後殿一楹

正殿三楹東西耳房共五楹東西廂房各四楹山門一楹住持僧一人

關帝廟 在七區興水縣村距縣城西北二十里創建年月未詳正殿

三楹偏殿三楹禪堂三楹山門一楹住持僧無由村人供奉香火

藥王廟 在七區羊安堡村距縣城西十四里清乾隆年建民國五年

重修正殿三楹東西耳房各三楹前殿一楹山門一楹住持僧無

關帝廟 在七區新莊子村距縣城西十二里創建年月未詳正殿三

楹東西耳房各三楹山門一楹住持僧無

關帝廟 在七區十八家子村距縣城西十四里創建年月未詳後殿

三楹前殿三楹山門一楹住持僧一人

龍王廟 在七區龍王嘴村距縣城西十五里創建不知何年正殿三

楹西廂房三楹山門一楹住持僧一人

關帝廟 在七區蔣家市村距縣城東八里創建年月無考正殿三楹

山門一楹住持僧無

永寧寺 在七區茶棚庵村距縣城東五里創建年月未詳正殿三楹

東西耳房各三楹東西廂房各三楹山門一楹住持僧一人

天后宮 在八區釣魚台村海口山上距縣城東南十二里創建年月

無考清光緒二十三年丁酉重修正殿三楹前殿一楹左右廂房各

三楹住持僧一人

靈岩寺 在八區炭廠溝山上距縣城北三十里創建年月無攷正殿

一楹前殿一楹東耳房三楹東廂房三楹山門一楹住持僧一人

道教

宗教中奉太上老君爲教祖者昉於東漢張道陵至晉時稱天師道道陵爲子房八世孫以符水禁咒之術愚民不惟老子之所謂微明襲明和光同塵知白守黑等語彼固未嘗深造即清淨無爲之大旨彼亦未嘗問津其附會老子者不過爲五斗米計耳故又稱五斗米道攷道家之術雜說多端曰清淨曰煉養曰服食曰符籙曰經典科教蓋嘗即以數端而辨其是非曹參李沆尙清淨而不擾則足以致治何晏王衍託清淨而自肆則足以致亂煉養則歐陽文忠嘗刪正黃庭朱子嘗稱

參同契（魏伯陽撰）以二公之攘斥異端獨不以其說爲非因奉其術以養生全年尙未爲得罪於名教然形氣之合莫不有毀天下有自生之物而長生者乎此採精煉神之家所以不待攻而其說破也至於經典科教大抵皆蕪俚淺陋亦未必能爲世患遠不如世間所傳佛經以瞿曇氏能鼓舞舞天下之文人才士潤色藻飾故其書幽深奇詭尙能耐人玩味也獨服食符籙二者說本邪僻而惑之者往往殺身禍人家國術之不可不慎也有是夫昔漢梅福爲南昌尉時王莽顛政上書劾王氏不報一朝棄妻子之九江訪道久之仙去至今千載之下其忠君愛國之心猶昭然若揭唐呂巖嘗舉進士不第後遇鍾離雲房授以丹訣遂起修道之志故昔人惜其隱淪有未必無心唐社稷金丹一粒誤先

生之句可見既挺生爲人必須有功人世不當巧爲藏身甘心理沒作
自了漢彼秦皇漢武一生爲方士所欺究竟所謂長生不死之藥今果
安在亦可以廢然返矣然自丁仙化鶴以還真言仙訣久已波及遼西
本邑道家尙頗知潔身守法則所稱龍門靈寶各宗亦聽其自由皈依
可也

三皇廟 在南門外路西明代建築清乾隆己未年重修正殿三楹東

西配廡各三楹山門一楹東院呂祖祠正殿五楹東偏房三楹角門

一住持道一人

火神廟 在南門外路東明代建築清乾隆五十二年嘉慶十一年兩

次重修正殿九楹中爲財神左火神右雷神各三楹石碑三角門二

山門一楹外有旗杆一對東耳房三楹住持道一人

龍王廟 在東沙河左岸距城東門三里明代建築清嘉慶四年乙未

重修正殿五楹東廊廡西涼亭各三楹前殿三楹東院正房七楹綠

以花牆東廂房三楹大門一楹住持道三人

真武廟 在一區大明山村距縣城西南十二里創建年月無考後殿

三楹腰殿三楹前殿三楹山門一楹住持道二人

龍王廟 在一區龍王廟村山上距縣城西南二十八里明萬曆甲寅

年都指揮熊銓遼陽副總兵祖承訓建正殿三楹山門一楹東耳房

三楹住持道一人

毘盧庵 在一區後王屯村距縣城西南三十八里清康熙四十四年

建同治十三年重修正殿五楹土地祠一楹鐘架一山門一楹西耳房兩楹住持道一人

聖宗廟 在一區焦家屯村距縣城西南四十里創建年月無考清光緒年間重修正殿一楹山門一楹住持道一人

聖宗廟 在一區周家窪子村距縣城西三十六里建築不知何年正殿三楹山門一楹住持道一人

圭峯觀 在一區距縣城西南四十二里圭峯島(俗名小海山)上明萬歷年間建清乾隆甲午年重修正殿三楹前殿三楹古碑二山門一東禪堂三楹住持道三人

大悲閣 在一區距縣城南三十里覺華島(俗名大海山)東麓舊曰

龍宮寺明天順四年東寧伯焦禮建清道光三年重修高閣三楹古碑一山門一楹西院正房廂房各三楹住持道一人

石佛寺 在一區距縣城南三十里覺華島（俗名大海山）西北麓明代建築年月無攷觀碑文首列龍武各營遊擊都司等銜名知爲明代海軍所建正殿三楹前殿三楹古碑一山門一楹左右廂房各三楹廟外旗杆一對住持道三人

關帝廟 在一區頭臺子村距縣城西南六里創建年月無攷清光緒十七年重修正殿三楹山門一楹東院正房三楹住持道一人

聖宗廟 在二區前五臺村距縣城西四十八里創建年月無攷正殿三楹東西耳房各三楹東廂房五楹九聖祠一楹山門一楹住持道

一人

老母廟 在二區大山台村距縣城西北三十六里創建年月無考正

殿三楹東西廂房各三楹山門一楹住持道一人

聖宗廟 在三區前台上村距縣城西北五十里建築年月無考清光

緒十八年重修正殿三楹山門一楹東西耳房各三楹住持道一人

娘娘廟 在三區范家溝村距縣城西南四十五里創建不知何年清

嘉慶甲子年重修正殿三楹山門一楹住持道一人

太陽宮 在四區大道上村距縣城西南七十里清乾隆三十一年創

建正殿三楹前殿三楹東西耳房各二楹東西配廡各三楹山門一

楹住持道一人

朝陽寺 在七區首山塢距縣城東八里創建年月無考民國十年重

修正殿三楹東西耳房各二楹廳房三楹山門一楹住持道二人近年植樹節縣知事率各機關領袖暨各校學生在寺前植樹焉

龍王廟 在七區九龍山距縣城東北三十里創建年月無攷正殿一

楹西廂房三楹山門一楹住持道一人

聖清宮 在七區老邊村距縣城正西十里一名石佛寺民國元年創

建正殿二楹前殿二楹東耳房三楹東廂房三楹山門一楹住持道

二人

老母廟 在八區釣魚台村距縣城東十二里清乾隆年間創建咸豐

八年重修正殿三楹前殿一楹東西耳房各三楹東西廂房各四楹

古碑二山門一楹住持道一人

龍王廟 在八區雙樹鋪村距縣城東北十八里創建年月無考民國二年重修正殿一楹東廂房二楹山門一楹住持道一人

老母廟 在八區雙樹鋪村距縣城東北十八里創建年月無考正殿三楹偏殿二楹東西廂房各三楹禪堂五楹山門一楹住持道三人

龍泉宮 在八區砬子山溝內距縣城北十八里分上下兩廟上廟清光緒元年建正殿三楹山門一楹下廟光緒二十四年建正殿三楹西廂房三楹東院平房五楹住持道四人

藥王廟 在八區藥王廟村距縣城北十五里創建不知何年清乾隆六十年重修正殿三楹東西耳房各三楹東西廂房各三楹山門一

楹住持道一人

回教

考回教祖穆罕默德生於阿拉伯之默伽初爲行賈後傭於富孀家遂娶以爲妻暇輒獨居沈思旋自稱受神之使命出而說教爲居民所迫西歷紀元後六百二十二年避居默德那回教卽以是年紀元其教亦曰清真教禁拜偶像及食猪肉禽有蹠獸反芻乃食之義取潔也自稱爲聖智藉兵行教以征服異教爲莫大功德其嗣爲主教者得兼政教大權雖侵略諸邦綦衆然研究測量醫術星象詩歌諸學科及希臘羅馬文學學術頗有可觀至隋文帝時慕回教風化遣使至西域求其經典開皇七年穆罕默德命其臣賽一德幹歌士等賚奉天經三十冊

傳入中國首建懷聖寺以示天下此見於一統志殊域志周咨錄等書
確有可據其教規認主獨一講誠禮濟齋遊行割禮大旨無非欲人體
認本來去邪從正忠君孝親敦篤倫常如日拜五時每至七日赴寺行
大瞻禮每歲齋戒一月禁絕一切嗜欲雞鳴而食星燦而開竟日不飲
不食以消三毒五濁之愆此其犖犖大者本邑向無禮拜寺回民祇韓
姓一家分居興城暨沙後所惟其教民守規律熟經典輕死生善營業
果敢堅忍殆猶有武裝宗教之遺風歟

韓化民清真教徒住興城縣城裡南街世爲醫生領有試驗証書商號
潤德湧每年賣藥百斤左右男二丁女三口

韓振聲清真教徒住一區沙後所城裏東街世爲醫生領有試驗証書

商號福合堂每年賣藥百斤有餘男二丁女二口

天主教

中國古無天主教有之自利瑪竇始按利瑪竇爲意大利教士明萬歷八年航海至廣東後入北京建天主教堂從事傳教是爲中國有教堂之始其所譯幾何原本六卷徐光啓筆受最先洎清聖祖時比利時人南懷仁以耶穌教會宣教師遠至中國傳教聖祖信之任爲欽天監副俾佐定歷象而教始行明季湯若望精於天算以德國耶穌會教士入中國傳教頗蒙莊烈帝優遇而教益著其教信上帝闢他神重靈魂斥偶像立十字架作銅人肖耶穌被訂受難之形惟以席教皇專恣之餘威神權嚴重束縛自由故其傳入中國遂不免憑藉教會勢力欺壓平

民此庚子拳匪之亂所由起也今信教自由載在憲法而加特力舊教經路德排擊之後頓減其貪婪暴恣之風民教相仇當不至有死灰復燃之一日基督本旨今後庶昌明歟

鎮鄉天主教堂 在一區沙後所村距縣城西南三十里隸錦西縣連

山堂屋神甫係法國人歲一至焉總計教民十餘戶教徒二十餘人每日鳴鐘聚會誦經禮拜尙能恪守規則焉

耶穌教

耶穌教亦曰基督教其宗派大別爲二舊者爲保羅所傳屬於羅馬教皇曰天主教又曰公教新者爲馬丁路德所改革曰耶穌教又曰修教當十五世紀時教皇以討土耳其爲辭募財於教徒又因建殿宇廣徵

贖罪金有日耳曼賢士路德者怒其貪橫起而攻之列九十五款揭之
國門教皇指爲異端斥之教外後因不從日耳曼帝排解之命獲罪幽
居譯成新約全書以牖國人而全國始知有自由平等之樂其教尊自
由重平等崇博愛喜慈善富自治力與民無擾乃其所長而禁供祖先
不准納妾拚絕嗣以全夫婦感情置其父血統於不顧是其所蔽也自
達爾文之進化論出該教種種迷信盡失所據而上帝萬能之說終不
敵適者生存之理自尼采之笑獅哲學出該教之道德文化竟被完全
否認至詆該教爲保羅等之製造品且欲利用其教以馭奴僕其言曰
基督教觀念所以與他種觀念有並存之必要者以其有可以利用之
處誠如服耳退耳所言用此觀念施之於奴僕可以永免暗殺之禍故

基督教之順服的教訓於一般不能超出人上而其心中亦初不知高
尚爲何物者可爲適當慰藉物而養成其屈服之德性此基督教之大
用也侯官嚴復之譯原富也曰甚矣宗教之說之害學術也觀其次第
惟以名學入門爲有當而莫謬於先神理而終物理異乎吾國大學之
先格致而終於平天下者矣然海爾巴德曰人無宗教之情則薄弱而
無爲善之勇氣是宗教之情密與德行相關係乃道德之砥柱爲人生
所不可缺者故古今立教莫不說神或天孔子之言畏天命曾子之言
十目所視十手所指皆此物也由此點觀之教育上雖無授宗教之必
要然養成廣義的宗教之觀念亦教育上所不可少者也不甯惟是美
國爲世界最進化之國而著名之總統半係教徒其養成偉大之人物

謂非受宗教感化之力不至此自民國紀元以來其教徒順新世之潮流表同情於國體方且廣布福音振興義舉冀收彼教異日大同之果而善惡因果之說又能啓斯人自新之路滅國家政教之勞則耶穌一教尙爲差強人意者也

基督教會有四 一在本城北街長老一人教徒男六十一人女二十

三人幼童五人望友二十六人近擬組織青年俱樂部尙未成立一

在一區沙後所村西街傳教士一人教徒男二十三人女十九人幼

童十二人望友十五人一在三區望海甸村傳教士一人教徒男三

十五人女三十七人幼童八人望友五人一在三區二台子村傳教

士一人教徒男十七人女十四人幼童五人望友七人以上四處所

附設私立各小學校均詳見教育門

喇嘛教 無

道德教

近年屢有人由北京携到段氏所著書十數種代爲傳佈鄉民既無學識不求甚解以其印刷精良亦遂寶而藏之邪說惑民此爲濫觴

興城縣志卷之十四

慈善

賑糧

粥廠

義倉

義塾

捐產

施藥

義橋

婦孺救濟會



興城縣志卷之十四

慈善

與胞一視痾瘵若躬疴矣完聚哀此獨惻癘病殘疾一夫不獲揆
諸博濟終虧盛德旱蝗水溢天災流行履道有福任卹可風欽彼
西哲蜚聲博愛當仁不讓斯爲吉藹述慈善

世以富貴之族難期累葉衣冠之子莫繼家聲輒歸咎於北方地土磽
薄所致而抑知不然夫活千人者子孫有封按獄多所全活後世必有
三公固無古今無南北也蓋積而必散者天之道損有餘而補不足者
人事之常誠能體爲善最樂之旨存同仁一視之心將見行道有福子
姓善變明德之後必有達人夫固有如操左券者美國大慈善家賈尼

基君創鋼鐵廠於本國其營業發達推爲巨擘然賈君不專求一己之
富厚而以博施濟衆爲唯一事業跡其建萬國弭兵會於海牙以期世
界永久之和平於各國藏書樓孤寡院多所捐助近又於吾國增設完
備之醫校以求醫學蒸進施惠華人固不讓堯夫麥舟子敬困米西伯
施澤枯骨仁宗救疫碎犀獨輝煌東亞史乘世有抱兼愛主義者乎不
禁爲閩左編氓馨香祝之矣

賑糧

鄧氏賑糧 邑紳鄧瀛波字心齋清附貢生世居城西北茸角溝村於

光緒二十一年歲大饑請於賀前州刺照黑松林押兒山二界災民

戶口册按口施放賑糧經手人爲本邑商人信興號張洛凌和興裕

王洛振紅糧小米放罄繼之以芝麻綠豆共施糧約合現銀三千餘

兩賀前州刺擬代爲請旌瀛波婉言謝絕至光緒二十五年歲中饑

瀛波又施賑糧於黑松林一界由紅崖子商號福順永出糧數目約

在一二百石土人德之至宣統元年瀛波先生卒四子韡棠字萼樓

繼續先志於民國七年山地亢旱由五月初旬起至六月未旬止施

放賑糧於黑松林下城廠押兒山三界出糧商號爲本邑德興增綏

中縣福慶成躍魚汀柴家茸角溝本宅共施紅糧五百五十石民國八年因在直隸朝陽縣界施放賑糧該縣公署呈請省署轉詳徐大總統世昌褒以樂善好施字樣匾額並准在籍建坊是年直隸大饑難民靡至男女孩提不絕於路韓棠在興綏交界處六股河沿及報官嶺地方施捨賑洋每人票洋一元由七月二十五日起計三個月共施票洋二萬八千餘元統計自宣統元年起至民國十二年底止施糧施洋施衣施藥立義學辦義倉共需洋拾萬餘元（義學義倉列後餘見本志孝義）

按孔子曰富而能及人者欲貧而不可得也張子西銘云富貴福澤將厚吾之生使之爲善也輕可見人特患有救濟之心無周急

之力量苟充矣即不當坐視不救全無惻隱之心况貧富之相差過甚而博施之義舉無聞不平則鳴反響立至赤化隱患即潛伏於無形之中則何如早爲之計之爲愈也

趙氏賑糧 邑紳趙鈞培字鎔九清光緒癸亥歲貢生世居城西南六

十里方安堡於光緒三十一年自出小米六十石按年夏放冬收以周貧困以備凶年至民國二年因年景歉收各食戶不能如約償還由此亦遂停止約值現小洋六七百元

粥廠

劉氏粥廠 邑紳劉汝敬字慎齋清恩貢生同治元年孝廉方正世居城西北黑莊科村家素豐好施與於光緒初年設立粥廠乞食者接

踵歲以爲常光緒九年選授直隸南皮縣學官之任時囑家人曰博施濟衆是讀書人應盡事須體我心好爲之每寄家書猶殷殷以鄰里疾苦爲問卒於官（餘見本志鄉賢）

李氏粥廠 邑紳李暄字明作清歲貢生世居城西南新民屯豐於財樂善好施於道光間常年設粥廠凡附近鄰村之乏食者咸往領粥至道光十四年歲大饑除常年粥廠外另設粥廠四方就食者日數百計活人無算至今鄉人德之（餘見本志孝義）

義倉

鄧氏義倉 設於城西北茸角溝屯由鄧瀛波創辦於光緒二十六年開辦至宣統元年瀛波卒其子韡棠接續辦理其規章春放秋收每

斗加糧利二升遇歲大饑即作爲義賑秋後自備價收齊次年仍照每斗糧利二升施放如此者至數次糧石年有增減因係一家之糧故也

義塾

鄧氏義塾 設於四區馬車哈屯廟內由民國十三年成立學級四男女學生一百二十人教員四人常年經費由鄧韡棠捐助奉小洋二千元不足由學費項下補助

捐產

張氏捐產 邑人張廣建世居城裏清光緒末年將南街路東平房十餘間約值四五千元捨於宣講堂嗣民國初年經州刺曾有嚴將該

堂查封其房遂爲官有現電話局及圖書閱報社均設於此

施藥

李氏施藥 邑紳李賡唐字月秋清歲貢生世居城南關常年施捨自製紅傷藥頗有神效人多求之年約值洋四五十元現其子慶麟陰麟克繼父志遵行不怠云（餘見本志隱逸）

楊氏施醫施藥 邑人楊新亭世居城裡善醫紅傷及各種瘡症尤善接骨自製藥料所有藥資醫費概不取償歷有年所年約需洋四五十元

馬氏施醫施藥 邑人馬朝選世居城東關先是自患頂疽賴婦翁張洛俊施治痊愈從此矢志學醫濟人盡得婦翁張氏之傳凡有鄉人

患瘡症者無論家道貧富一經延治朝選必躬親施醫施藥其孜孜不倦蓋十餘年如一日焉計所施藥資年約需洋三百元

義橋

義橋 一在城西馬圈子木板建設義主劉先周一在城西大寨木板建設義主田潤久一在城西牛彥章桃楷木標建設義主張洛西

興城縣婦孺救濟會 係教會長老劉漢樞所創設以救濟戰時婦孺

使免危險爲目的由民國十四年舊歷十月十六日郭軍入城起至二十五日郭軍過境止前後收容避難男婦（幼童不計）少在二三十人多至一百餘人教會房間不敷至假用鄰近玉生恒商號祖師

廟房間應用每人每日攤伙食洋五角一連做教會旗幟僱工米薪

菜蔬油鹽爐煤在內。彼時街上軍隊拉夫至併米薪菜蔬不易購置。本會服務人役袖箍致被軍人褫去。

沙後所婦孺救濟分會凡兩處。一在南關張宅爲教民張紹周所組織。一在城裡教會暨王宅爲王慶恒所組織。由民國十四年舊歷十月十五日起至二十五日止計該兩處前後收容避難男婦少在百餘人多至四百餘人。其避難男婦幼穉伙食所需柴米油醬菜蔬等項皆由張紹周王慶恒兩人擔任不取分文。當日困難情形較興城尤甚。值闔境主臣自顧不暇之秋。該兩君獨能輕財好義庇護鄉鄰。仁智兩全救人適以自救。殆所謂識時務之俊傑歟。